

BWÀKABUULWIBWÀ, NSHAPÌTÀ

MWINÂYÌ CITUPÀ III



Twasàkidila Mwanèètù Neville. Mukalenge àkubènèshè peebe. Ne mwoyi wènù awu mu dindà emu, nwènù kàlaasà kàà Bible. Kàdi bantu bônso bàdi bàdyùmvwakù bishi mu dindà emu? Ndi ntékemena ne, mbîmpè. Amen. Tudi bu... eci cîvwa bu dimanyisha dya cintùluntùlu ditùdi benzè pa kwamba ne tuvwa mwà kwikala kaaba aka mu dindà emu, bwalu ncîvwa ne... mwanji kulongolola ndongamu wa lwendu pa bìdi bitàngilà dîbà dîmvwà ne cyà kuumuka to. Nènku bu mùdîbi mpindyewu ne byátèèkiibu bwà mu ngondo yisambòmbò yìdi yìlondà eyi, èè, dîbà adi, mèmè kwela meeji ne bìvwa bìmpè bu twètù mwà kwenza disangisha mu dindà emu bwalu nekùpitè cikondo kumpalà kwa mèmè kwalukila cyàkàbìdì, bwà ku dyànyì dimanya; pàmwàpa mu movù wà mabèjì àpòpoka ewu.

² Nènku nêngiikalè...netùumukè mpindyewu lumingu lùlwalwà elu bwà kuya ku Beaumont, mu Texas, mutwikalà mwà kubangila mwómò amu lumingu lùlwalwà elu bwà kwenza masangisha a matùkù mwandamukùlù anyì dikùmi kuntwaku ne nsangilu wa—wa bisùmbù bidikàdile ne èkèleeziyà mishìishiilàngàne. Mmatùudila mfrangà cyà bushùwà kùdì èkèleeziyà yà *Dìnà Dyà Yesù* mu Beaumont, mu Texas, mutwàkenzà masangisha manène awu kùkaadi cikondo kampànda, ànu dyàkàmwè paanyimà pàà fòtò ewu mukwàcìibwe. Nènku bóbò...Ndi mumanyè ne bàakalwa ne dikaadika kuntwaku ne, ngeela meeji, màkaadikà makùmi àbìdì ne mwandamutekètè...anyì kàwulù kiikàle ne màkaadikà makùmi àbìdì ne mwandamutekètè, kàakalwà ku masangisha à ku Beaumont awu. Kwòkò aku nkwàkenzà mulombodì wa cimenga lwendu lwà mindòlòlooci ne kuya mu misèsù, ne bônso abu. Twàkapìcila mu cikondo cyà dicyònkomoka mu Beaumont, ne tudi tukwàlukila lumingu lùlwalwà elu. Ne pashiishe tuvwa beelè meeji bwà mu San Antonio, kàdi katwàkwikala ne dîbà dikùmbàne bwà aku to, ambà ànu mu dipingana's.

³ Nènku tudi tuumuka aku tuya ku Phoenix, ku Los Angeles, too ne ku Long Beach. Ne pashiishe twalukila, bu Mukalenge mwà kwanyisha, twalukila ku Côte Est, twalukila tukabwela mu Virginie ne mu Caroline du Sud. Kwalukila dîbà adi kuya ku Bloomington, mu Illinois. Ne tuumuka aku tuya ku Lane Tech High School, lumingu lwà ndekeelu lwà ngondo mwinâyì, kùdì Beena Kìlistò bàà kantu-ku-byanza. Ne pashiishe nguumuka aku nya ku Colombie Britannique wa ku nord, mutàngile

ku Alaska, ne nshàalakù too ne ku ngondo mwisambòmbò. Nènku, díbà adi, tudi batèkèmène ne netùpicilè mu cikondo cyà dicyònkomoka.

⁴ Mwikàle nsambila díbà adi bwà ne dikenketa dyà. . . kùdì beena cibambalu cyà bitàdì dindì mupìcile kùkàadi cikondo kampàndà, pa bìdì bitàngilà èkèleeziyà ewu, ní dyàjikakù pa diine díbà adi. Nènku pashiishe netwikalè. . . Nèngìikalè mwà kuya dyàmwàmwà dyà mbù díbà adi byòbì nànkù, mu ngondo mwisambòmbò amu mene, ciikalè cikondo cìmpè bwà Àfrikè; bwà ngondo mwisambòmbò, wa mwandamutekète, ne wa mwandamukùlù, mu—mu Àfrikè. Pa nànkù ncyà bushùwà ne ndi djinga ne masambila ènù.

⁵ Kàdi tudi bindile dilwa dyà Mukalenge. Bintu byònsò ebi bìdì ne “cyòcì ciikàle diswa dyà Mukalenge,” nwamònu’s. Katwèna bamanyè to, Yèyè mmufwànyine. . . Byòbì ebi kabyèna ànu bulumbodi menemene to, tudi ànu basangishe mabiikila ònsò awu ne basambile pa bwalu abu, bakonkè Mukalenge ne: “Njila kaayi udi ukèngela twètù kuya?” Ne—ne mbimwèke bu ne, díbà adi, ncyèna ncilekela bwà kwikalacì bwànyì nkààyaanyì to, ndi ndekela bwà bakwàbò kwelanganabò pààbò meeji pa bwalu abu, ne kucisambidila. Ki díbà adi kumwèkabi bu ne twètù bònsò kwenza bu tudyùmvwà balombòdiibwe bwà kuya batàngile ku wesètè, ku sud ne ku wesètè mùsangu ewu. Pa nànkù díbà adi tuvwa ne mabiikila a ku myaba yònsò, pa nànkù twètù kupweka buludì. Nènku mwaba wà kumpalà wùvwà mumfikilè ku mwoyi wùvwà anyì Beaumont anyì San Antonio. Ki twètù kutàngila, nènku tuvwa ne mabiikila a ku myaba yònsò yibidì ayi. Nènku. . .

⁶ Twètù kubiikila umwe mu Beaumont. Ne bu mùvwàbo ne èkèleeziyà makùmi ànaayi ne yibidì yikwàcishangana mu mudimu, yà beena Mpenta Basanga ne bikwàbò, twètù kwela meeji ne ne dibàlaasà dinènè dimwèpelè bivwa bifwànyine kwikala bìmpè bwà twètù kubàpèèsha matùkù matwè ku dikùmi pamutù pàà kufila àtaanu pa kaaba àtaanu pa kaaba ne kaaba. Ndi mèmè ngeela meeji ne nwènù babitèeke pàmwè mùshindù awu mbitàmbe bwìmpè. Pashiishe, kùdì bantu mu—mu lukèngelu búngì cyanààná bàà mu myaba yònsò mu Beaumont ne mu citùpà cyà pitùloolù cyà mu Texas mwàmwa, ne pa nànkù tudi batèkèmène cikondo cyà dicyònkomoka mu Beaumont.

⁷ Nènku, mpindyewu, kacya katùtukù tuteeta bwà kuya kùdì maasantàlà manène ne myaba minène nànsha. Kàdi tudi tuteeta kuya mùdì Mukalenge muswè kutùlombola bwà kuya amu, nànsha ciikàle cikesè anyì cinène bishi, cìdì m’Mukalenge udi ulombola. Mpindyewu, díbà kanà dyònsò, Yèyè mmufwànyine kutùpèèsha dibiikila dyà beena *Makèdooniyà* adi ne tudi bafwànyine kushiya budimi bwà bwambi díbà kanà dyònsò bwà

cyônsò cidiYe mufwànyine kutùbùikidila bwà kwenza aci, ní mpenyi pônsò.

8 Ne ncyà bushùwà ne tudi basànkile cikondo cyà bwobùmwe eci banyungùlùkile Dìyi dyà Nzambì pàmwe neenù bantu balenga aba. Ndi mutwishibwe ne nenwikalè ne lulamatu mpindyewu ne nenùlwe mu èkèleeziyà ne nenùtumikilè malongesha a Bible a kùdi mwanèètù wa bukìtù ewu, Mwanèètù Neville, ùndi nnùshiila ne mwoyi mujimà bu musadidi wa Mukalenge Nzambì, ne mwikàle ùtamba kuya mu ndòndò ne Nzambì, ne mémè ndi ne disànkà dyàbùngi bwà cyôci aci.

9 Nènku nwènu èkèleeziyà mukese ewu, ndi nnùbela ne munu ku dísù mu Dìnà dyà Mukalenge Yesù bwà nùkolè mu ngàsà wa Nzambì, nwikalè biimàne kamungùlù ne batàngile dîbà dyônsò ànu ku Kàlvariyo, nuumusha miji yônsò yà bululu mu mwoyi wènu ne musùkà wènu, bwà Nzambì wàmòna mwà kukwàta neenù mudimu dîbà kanà dyônsò. Wèwekù umvwa bwà kwenza cintu kampànda, anyi dibuulula anyi cintu kampànda cìlwa kùdi mu mùshindù wà pabwàwù, cintu kampànda cyà didimwijangana anyi cintu kampànda, wadimuka! Sàtaanà ùdi ne budimù ne malambàkànyì ne mwèndè mwônsò. Nwamònu anyi? Ucitèèkè pàmwe ne Dìyi dyà Nzambì ne ùkonkè mpaasàtà webè. Nwamònu anyi?

10 Nènku nudi nusangana mapà ne bikwàbò bìvùlangana mu èkèleeziyà, ne dikwàtà dyà mudimu dyà miinè mapà awu. Kumpàlà kwà nwènu kuàlekela àkwàta mudimu ne bikwàbò, dyàmbedi...Umvwa bikucincimika mu mwoyi wèbè...Mpindyewu, mwena lukunà ùdi ne malambàkànyì a dikèma. Nwamònu anyi? Nènku aci ki citù ànu cipandulula maèkèleeziyà musangu wônsò, ndipà dilelèlè dikwata naadi mudimu bibi. Nwamònu anyi? Cintu kampànda cidi Nzambì ùteeta bwà kwenza, kàdi cikwàta mudimu bibi, neciikalè ànu—neciikalè ànu...Kaciyi ànu cikwenzela wèwè bibi to, kadi necipandululè èkèleeziyà yônsò nkòng. Nwamònu anyi? Cìkenkètaayi, nucìpicishila mu Bible misangu ne misangu, pashiishe nùcyèlè ku diteeta bwà kumòna ní n'Nzambì anyi to. Nùtungunukè ànu ne kuciteeta ne kucipima, bwà kumòna ní ncipwàngàne misangu yônsò ne cikumbànàngàne ne Dìyi. Dîbà adì nudi mu bulelèlè, nwamònu's.

11 Pàdi ànu Dìyi dyambè ne neciikalè kaaba aka, cikwàta mudimu mu mùshindù kampànda ewu, shààlaayi ànu naaci. Kanùseesukukù to, cidi ní nganyì ní nganyì wènta, nànsha cimwèka cilelèlè bìshi. Cyôci kaciyi cidileeja mu Mifùndu kuumukila ku Genèsè too ne ku Bwàkabuulwibwà, cilekèlaayi. Kanùnàyikù ne mudilu to, tudi mu matukù a ndekeelu mùdi Sàtaanà mwikàle ànu ùseeswishangana ne mwèndè mwônsò.

12 Mfwilaayikù luse piikalàbi ne ndi nteeta kwangata kaaba kàà sheefù; mémè ncyènàku sheefù to. Kàdi ndi ndyùmvwà

bwènù nwènù ànu bu mwàkambà Pólò kale wàwa bwà dyèndè disangisha musangu kampàndà ne: “Nudi mitootò ku cifulu cyànyì cyà butùmbi.” Pàngiikalà musabùke muyè mu buloba bwà luseke lukwàbò lwàlwa mwàmwa, ne mukatwilàngàne neenù mu ngiikàdilu mutùmbishiibwe awu, ndi muswè bwà nwikalè biimàne mwab’awu bwà kukenka bu mitootò ku cifulu cyànyì cyà butùmbi. Nwamònu anyi? Ne ndi—ndi muswè bwà nwikalèmu, ndi muswè ngiikalèmu.

13 Ne ndi mvùluka mu cikèèna—kumòna cyànyì pàngàakamòna Bwikadi bwà Mukalenge, anyi bantu Bèndè mu Buloba bwà butùmbi mwàmwa, mèmè kukènzakana, kubàmbila... Ki kungambilabò ne Yèyè neàndumbùlwishè mèmè dyàmbedi ku Èvànjeeliyò ùndi nyiisha awu. Mèmè kwamba ne: “Ànu menemene mwàkaMuyiishà Pólò amu!”

14 Ki mìliyò yà bantu ayi kwelabò lubilà lukolè ne: “Pa cyòci aci mpatùdi biimànyine!” Nwamònu anyi? Nwamònu’s. Mpindyewu, ndi muswè bwà biikalè nàнку. Nènku netùkatwilàngànèmu dîngà ditùkù.

15 Nènku Nzambì kàtukù mutùtùme mèmè ne Mwanèètù Neville bwà kwikala baashefù to, nànsha kakesè. Tudi ànu bânà bèènù cyanaànà, nudi numòna’s, bafidi bàà malongesha mu Èvànjeeliyò. Pa nàнку tükwatàayi bònsò mudimu pàmwè.

16 Ne musangu kampàndà bu—bu cintu kampàndà cìdi cikwàta mudimu cyòci—cyòci cikonkolojiibwa anyi—anyì bambà cintu kampànda bwàci, bacitàndishe anyi cintu kampànda cyà mùshindù awu, kàdi muntu udi ne dipà adi ùcibènga, vùlukàayi ànu ne... ùcibènga, vùlukàayi ne, dipà adi kî ndijaalàme to. Kacivwa Nzambì to ànu kwònsò aku. Nyumà wa Nzambì ùtu misangu yònsò ànu muswè bwà kulongolodiibwa, wa kalolo ne mudipwekèshe, ne budiswìle. Nwamònu’s. Cyòci cijuukila kuulu cyàmba ne: “Néncyènzè nànsha bìshi,” nudi bamanyè mùtù misangu mikwàbò... Vùlukàayi ànu ne, nyumà yà dyambu kayìtu yà kùdi Nzambì to. Nwamònu anyi? Pa nàнку bwà cinyi kwangata mupinganyi pàdi bintu byònsò, buloba bujimà, bùle tètè ne Butùmbi bwà Nzambì, nudi numòna’s, bukolè bwà cyà bushùwà bwà Nzambì. Tudi baswè kwangata cipinganyi bwà cinyi? Dìbà dikaadi dipìte bikolè mu ditùkù mpindyewu; kàdi, vùlukàayi ne, Bible mmwambè ne yèyè nealwe bu... ànu ne budimù ne mwèndè mwònsò, ne mufwànyine kuseeswisha ne Basungula mene bu byòbi mwà kwenzeka. Nwamònu anyi?

17 Nènku, mpindyewu, mîngà misangu tutu tudyàmbedila mutùdi Basungula, ne ndi ntèkemena ne ki citùdi, kàdi tùshaalàayi ànu buludì ne Bible. Ne dîbà adi maalù ònsò òwò miikàle makùmbànàngàne ne Mifùndu, mu bulongàmè mu Mifùndu, biikàle bìfila butùmbi kùdi Nzambì ne luumù lwà èkèleeziyà, ne bikwàbò, dîbà adi tudi tumanya ne mbyà kùdi Nzambì bwalu Bible ùdi ùbitwa nyama ku mikòlò. Kàdi

kí ng'ánu dilongesha dyètù dikwàtakaja dyàcítwà nyama ku mikòlò to, kadyàkwikala ne dikwàcisha to, cidi cìkatuuta kwà cyanààna.

18 Pa nàнку díbà adi cintu kampànda cyòci citùlengè, nànsha cyòci cimwèka cilelèlè bishi, cyòci kaciyi cijaalàme, kaciyi cyà mu Mifùndu to, ùcyùmùshè ànu mpindyewu mene; bwalu kùdi—kùdi Cyà cilelèlè cindile, nudi numòna's.

19 Pa nàнку, sambilaayi mpindyewu. Ne misangu yònsò, ne cyònsò cinùkènjì, nsambidilaayi. Nùnsambidilaayikù bwalu tuyàaya mpindyewu mu madimi a bwambi bwà misangu yà ndekeelu, bwà ku wanyì mmwènenenu. Tukàadi mpindyewu tuya . . .

20 Nènku, vùlukàayi ne, bintu binènè bìdi munkaci mwà kwenzeka, kí mbimanya munkaci mwà bàà pa buloba to. Yesù wàkalwa, kwikala ne mwoyi, kufwà, kufidiibwa bu mulàmbù, kwalukila mu Butùmbi, kàdi miliyò yà bantu kabàakamanya bwalu nànsha bùmwè to. Nwamònu anyi? Kí ncyà tuyaayi tükamòne, cinène, cyà ciyè ne mwà nàka to; cidi ne “Yèyè wàkalwa kùdi bàà Kwàbò Sungasunga,” nwamònu's. Nènku . . . “Ewu udi ne maci, ùmwè cidi Nyumà wàmbila maèkèleeziyà.” Kí nkùdi bàà pambèlu to, “nkùdi Èkèleeziyà.” Èkèleeziyà ngudi upeta dinyükushiibwa Dyèndè.

21 Kale wàwa mvwa ngeela meeji bishiilàngàne ne aci too ne pàakalwàYe kwakula naanyi dǐngà ditùkù; kungambilayè bwà mèmè kwalukila mu Díyi ne kwela meeji mùvwà baprófètà bònsò bambè bwà pàakalwà Yone, ne: “Myaba mitùmbùke neyipwekeshiibwè, ne myaba mipwekèle neyibandishiibwè.” Ne mùvwà bukolè bwà Nzambi mwà kwawàta mudimu! Nènku kùdi—kùdi . . . “Mikùnà yònsò neyitupikè bu twànà twà mikòòkò, ne mabèjì à micì neàtuutè bikàshì.” Èè, aci's cívwa cyùmvwika ànu bu ne bushùwà cintu kampànda necyènzekè's. Nwamònu anyi? Kàdi pààkenzekàci, cyàkenzekà ncinyi? Mulùmýànà mukùlumpè kupàtukayè mu cipèèlà, pàmwàpa ne mwedi mutòlòke ku cibàngà kwònsò ne mudijìngìle cipese cyà cisèbà cyà mùkòòkò. Kakùvwakù nsòmbelu wa dicyankama nànsha dikèsè mu cipèèlà amu to. Úvwà úsanganyiiwbamù kacya pàcívwaye ne bidimu citèèmà, ne ùkaavva ne bidimu makùmi àsàtù díbà adi. Kupàtukayè mu cipèèlà amu, wènda ùtwa mikùma, ùyiisha kanyinganyinga, mwimàne mu bitoci bimufikè too ne mu binù, pàmwàpa, ku mwelelu wà Yadènè aku. Nènku ki pààkapwekeshiibwà myaba mitùmbùke ne myaba mipwekèle kubàndishiibwayì mpòpò apu. Nwamònu anyi? Bìdi . . .

22 Bìkèngela wikalè ne ngumvwilù wa nyumà. Vùlukàayi ne, kacya Nzambi kàtukù mwanjì kusòmbela ne kàadyàkusòmbelakù, pa buloba apa, mu dibàlakana to. Yèyè ùtu ùbèngangana naaci. Yèyè kàadyàkucyènzakù to . . .

Mayiisha manène kaàdyàkwikalakù a “kwenza *cikampànda* ne *cikansan*- . . . cyà cinènaanènààlè” to. Kacyèna cyènta mùshindù awu nànsha. Basadidi Bèndè kabàtu bàkwata mudimu mu mùshindù awu to. Dyèndè dibàlakana ne butùmbi bìdi byà kuulu.

²³ Makèèlèlè awu, anyi kùkaadi matùkù àbìdi, biikàle tuya ku Kentucky, mu Kentucky ne mulundà wanyì mwìmpè, Mwanèètù Banks Wood, kùvwa mpùlushi mukàji mwimàne mwaba awu, ki mwanèètù kwambayè ne: “Mulùmyànà, mbìmpè tùtekeshe lubilu,” yèyè ne, “mukàji wàwa’s mmushilè wa biyooyi.”

²⁴ Ki mèmè ne: “Èyo, ncyà bushùwà.” Mèmè ne: “Pàdi ditungà dikafika mu mùshindù wà miliyò yà bantu kayiyi ku mudimu kàdi bikèngela bwà bóbò kwangata bantu bakàji, kubàvwija bampùlushi ne kubàtùma mwaba wàwa, ne bendeshi bàà tàksí ne bintu byà mùshindù awu, s’ndimwè dyà makeji a bukooyà manène pa ditungà dyètù’s.” Mukàji kènàku ne cyà dyaenza mwaba awu to ànu mùdi—mùdi kàlulù kakàyi ne cyà dyaenza mu mbìdikà wa màfutà. Nwamònu anyi? Awu kawènaku—kawènaku—mwaba wèndè to. Ki mèmè kwamba ne: “Kale wàwa cìvwa cìntàcisha bikolè mu lungènyi, kàdi bwà mpindyewu ndi mubangé kuvùluka ne: ‘Mòna’s, kabyèna bikèmesha to, ebu kí—ebu kí mbukalenge bwètù twètù to, katwèna bàà pa buloba ebu to.’” Bàdi ne. . . nwènù. . .

²⁵ Bwà cinyi bakàji (bakàji bèètù twètù) kabèèna—kabèèna ne nsukì mípì, ne bàlaaba bilaabu, ne bàja maja a bìdùndadùnda, ne bintu byònsò ebi? Mòna’s, bantu bàtu bàya ku èkèleeziyà yà ciibidilu eyi ne bikwàbò, beela meeji ne: “Bidi ànu bìmpè.” Mbwa cinyi? Cìdi. . . bóbò—bóbò mbeena Àmèrikè; bóbò mbeena Àmèrikè, bàdi ne nyumà wa cyena Àmèrikè. Twètù katwèna beena Àmèrikè to, tudi beena Kìlistò. Tudi basòmbele. . . nyumà wetù ngwa ku Bukalenge bukwàbò. Bu ne nyumà wetù ùvwa wa mu bukalenge ebu dībà adi’s nùnkù tudi tukuukwila ne bintu ebi, dībà adi nùnkù tudi tukuukwila misambu yònsò yà ciipanshì ne tukuukwila bìdùndadùnda byònsò ebi. “Mwaba wùdi mwoyi wèbè, ngùdi mabanji èbè.” Kàdi ètù mabanji àdi kuulu. Pa nànkù ki bwà cinyi twètù tuyààya ku Bukalenge kampànda.

²⁶ Apa kí nkwetù to, tudi ànu banjì kusòmbelapù pèètù cyanààna tuteeta bwà kupàtula beena—mwàbò bakwàbò mu mìdimà. Nènku ndi mbwela mu cimenga kampànda pàmwàpa ngenza kàmpanyè kàà cimenga cijimà, ntàpangana ànu ne cisuku munda mwà lumingu lujimà ànyi matùkù dikùmì, bwà kupàtulamù musùkà wùmwèpelè wà musinga mukolè; wùmwèpelè, ànu wùmwèpelè wùdi wùsanganyiibwàmu awu.

²⁷ Wèwè udi mufwànyine kwamba ne: “Masangisha awu àvwa matuutè dyàkalenga dinène be, binunu bitaanu bìvwa bilwè ku cyoshelu”; nkufwànyine kwikala kakùyì muntu musungìdiibwe nànsha umwe to, nànsha umwe wa kùdìbo aku. Nwamònu

anyì? Ne nkufwànyine kwikala . . . Udi mufwànyine kwela meeji mwaba awu ne: “Ànu bantu bàbìdì mbààkalwà ku cyoshelu”; kàdì umwe wa kùdìbo nguvwa mufwànyine kwikala dibwe dyà mushinga mukolè. Tudi ànu twela cyanàànà bukòndò mu kasulù. Nzambi ngudi ukwàta mishipa, Yèyè ngudi mumanyè ne mushipa ngwèpì ne cìdì kaciya mushipa ncyèpì.

28 Pa nàнку, nwamònu’s, twètù tudi ànu tuyiisha cyanàànà. Nènku vùlukàayi ne cintu cimwècimwè aci ncinùdì nwenza mu tabernacle emu. Kàdì vùlukàayi eci misangu yònsò ne: “Mikòòkò Yànyì mmimanyè Dìyi Dyànyì.” Ne Dìyi dyà mukana dyà Nzambi ki Dìyi Dyèndè.

29 Mvwà ngeela meeji ditùkù adi mùdì bantu bàdì bàmba ne kacya kakùtukù. . . Dìngumba kampànda dyà èkèleeziyà dyàmba ne: “Dyondopa dyà kùdì Nzambi kí ndyà cyà bushùwà to. Kacya muntu nànsha umwe kàtukù mupèeshiibwe dipà dyà dyondopa dyà kùdì Nzambi to pa kuumusha Pòlò Munsantu anyì bàpostòlo, dikùmi ne bàbìdì mu cibambalu cyà kuulu. Bòbò abu mbààkapèeshiibwà dipà dyà dyondopa dyà kùdì Nzambi, kwàjikì. Aci’s ncyàkakòsà bwalu.”

30 Kàdì, nudi numòna’s, ku dizòla dilenga didì Mwanèètù Willie, ewu, mutwènzèle mu mùshindù wà dikèma edi, kanshinga kakesè aku nkapicile mu maèkèleeziyà mwònsò too ne leelù. Ndi ndìkonka cìdì dìngumba dìmwedìmwè adi dyàmba bwà bwalu—bulonda bwà èkèleeziyà, bwà Irénée, bwà Martin Munsantu? Ne bafwile diitabuujà bònsò abu munda mwà bikòndò mwònsò, bwalu nkàmà yà bidimu paanyimà pàà lufù lwà bàpostòlò, bààkaakula mu myakulu ne bààkondopa babèèdì ne kubìisha bafwè ne kwenza bishimà, èkèleeziyà mujimà awu. Ndi ndìkonka ne kàdì bishi bwà bòbò abu, pùikalàbì ne cìvwa ànu bwà bàpostòlò nkààyaabò?

31 Nudi numòna mùdìcì mmwènenu mubùmàkàne amu anyì? Kabèèna ne luumvu lwà nyumà to, ki cyònsò cìdìku ncyòcì aci. Nwamònu’s: “Mpofo! Bafwè mu mpèkaatù ne matomboka!” *Mpèkaatù* mbwena kwamba ne “bupidyà.” Cyònsò cìdì mu bupidyà mpèkaatù. Muntu yèyè ne mwà—mwànzù bule *ebu* (wà D.D., L. yibidì, Ph.D., L.L.D.) kadi wàmba ne “cintu pààci ne ndyondopa dyà kùdì Nzambi anyì dibàtiiza dyà Nyumà Mwìmpè kacitukù to,” muntu awu mmufwè mu mpèkaatù. Mmufwànyine kwikala mwà kuumvwija maalu-masokoka a mishindù yònsò mu Bible, kàdì nsòmbelu wendè mwinè (bujaadiki bwèndè) ùdì ùjaadika ne yèyè mmufwè. Mmufwè mu mpèkaatù ne matomboka bwalu yèyè nngènzàmpèkaatù.

32 Mpèkaatù mbupidyà. S’bivwakù bikèngela bwà muntu kanà yònsò ewu . . . Mpèkaatù, kí nkwenza kwà masandi ne kunwà kwà mfwankà ne kujà kwà maja ne—ne kwenza kwà bintu byà lukutukutu byà mùshindù awu to. Abi kí mpèkaatù to, abi mbyambiibwà byà bupidyà. Kàdì mwena—mwena

kwitabuuja... Nànsha muntu kàyi ùnwa maala, kàyi ùnwa mfwankà, kàyi wènza bintu ebi, kacya kàyikù mwambè dīyì dibì to, ùlama Mikenji yònsò Dikùmi, ùdi ànu mwà kwikalà ngènzàmpèkààtù mufiike wa fitùtù ewu, nwamònu's, mubolè ne mwèndè mwònsò. Yèyè ùvila nì ncinyi nì ncinyi cyònsò cyà bukolè bwà Nzambì, yèyè nngènzàmpèkààtù! Mwakù mpèkàatù mbwena kwamba ne “bupidyà.” Mpindyewu, jandùlàbi, umòna nì ncyà bushùwà anyì kī ncyà bushùwà. Mwena bupidyà mu Dīyì dyà Nzambì, nngènzàmpèkààtù ne kèna mwà kubwela mu Bukalenge bwà mu Dyulu to.

33 Mpindyewu, kaa, mvwa mwelè meeji dībà adi mu dindà emu, mwikàle ndyàngacilaci ku diswa dyà Mukalenge, ku dīyì ditùmà dyà Nyumà Mwimpè, bwà kulwa cyàkàbìdì ku tabernacle ne pàmwàpa kunùlama mèbà àbìdì anyì àsàtù. Kàdi ndi muswè njikijèku mukàndà wà nshapìtá mwi4 wà Bwàkabuulwibwà kumpàlà kwà mèmè kuya. Nènkù mpindyewu ndi ntèkemena ne kabyèna binùcyòkeshá to, ndi ntèkemena ne cidi—cidi butùmbi kunùdi. Ndi ntèkemena ne ncintu ciikalà mwà kunwènzèlakù bìmpè ne kunùkwàcishá mu matùkù àcìvwavwà kumpàlà.

34 Nènkù mpindyewu pàmwàpa... Ndi mwambìle Billy bwà kulwayè mwaba ewu mu dindà emu bwà kwabanya twartà twà disambila kwòkò kwikàle beenyi munkacì mwètù, bwalu netùùmukè, ne... mpindyewu, ne ncyèna mumanyè ne netwàlukilè dībà kaayi to. Ànu Nzambì ngudi mumanyè aci. Nènkù mvwa muswè... mwelè pàmwàpa meeji ne disangisha dyà ndekeelu bu... ne pàmbiikidiyè ku tèlefonè dībà adi lwà—lwà pa dībà citèemà wamba ne: “Papa, kùdi ndambù wa bantu mwaba ewu bàà kusambidila. Ndi mubàkonkè, kàdi” yèyè ne, “mbantu bàtù—mbantu bàtù bàlwa mu èkèleeziyà dībà dyònsò.”

35 Mèmè ne: “Nànkù kwàbanyi twartà twà disambila to, wamònu's.” Mèmè ne: “Bwalu abu mbantu... Twètù basambidile babèèdi mu dindà emu, netùbiikilè bantu ne kubàsambidila.” Kàdi mèmè kwamba ne: “Piikalàbi—piikalàbi ne mbantu bàtù bàlwa mu tabernacle batùdi bamanyè... To, mèmè ndi nkèbakù beenyi.”

36 Ki kwambayè dībà adi ne, mmupàtùkemù kùdi ndambù wa tusunsa pàtwidyanganyiyè naanyì pàmvwà mwimàne mwaba awu apu, kwambayè ne: “Èè, ndi mwabànye ndambù wa twartà twà disambila.” Yèyè ne: “Kùvwa bantu ànu bakesè menemene mwòmò amu, ndi mwabànye twartà twà disambila.” Yèyè ne: “Wèwè udi mwà kwenza cyònsò cyùdi muswè kwenza aci.”

37 Mèmè ne: “Èè, netwànjì kumòna mwàyà diyiisha amu, kumòna mwaba wutwikalà, ne dībà adi netùye. Mèmè... ”

38 Yèyè ne: “Èè, bantu bààbùngì bàvwa bàjinga twartà twà disambila, mu bushùwà bwà bwalu, kàdi” yèyè ne “bàvwa mbantu bàà mu èkèleeziya.” Nwamònu anyì?

39 Èè, tudi bamanyè ne Nzambì ùtu ànu Nzambì. Nènku, ekèlekèlè, ànu bintu biinè bìdiYe wènza's wè! Mòna's, tè—tèlèfonè ùdi ùdila díbà dyònsò, mabiikila a kùdi bantu bwà maalu mashiilèshiiilàngàne, bwà tuntu ànu twà tukesè menemene etu mîngà misangu, ne mùshindù mwinè wùdi Nzambì wàndamuna ku disambila's!

40 Ndi ndikonka inábànzà mutekètè wa mu New Albany awu anyi bàyendè ní ùdi kaaba aka, bàvwà balwè dilòòlò adi ne mwàna wa mu dibòko uvwa mufùdisha mupùyyà wà munda dilòòlò adi, mwikàle ne dísaamà dyà bisùlùsùlù, mu nzùbù mwànyì lwà pa díbà dikùmi ne ibìdi, anyi díbà ùmwè awu? Nyèyè wàwa, mbîmpè. Mwàna awu ùdi bishi? [Mwanèètù wa balùme kampànda ùdi wàmba ne: “Bîmpè.”—Muf.] Bîmpè, mbîmpè, èyo.

41 Ngánjì ànu nnùleejè, nwamònu's, bwà ne ncintu kampànda cyùdi kuyìkù mufwànyìne kumanya to, cidi kaciyi citungunuka to pàdi Nyumà Mwîmpè wàkula. Fred Sothmann, mwanèètù wa mushinga mukolè, Fred, ngàamuumvù wàmba ne: “Amen,” katanci aka, kàdi ncìvwa mumànyè mwaba wùvwàye to. Ùdi penyi? Ùdipù anyi? Nyèyè ewu, apa mene, Mwanèètù Fred Sothmann. Ne bwà kuleeja mùdìci cipeepèlè. . . Kùvwa balundà kampànda bàvwà bàmulwila, ùvwa m'Mwanèètù Welch Evans, mùndi ndìcinkila, ncyèna mumanyè to. Bàvwa ne nzùbu wa bàntentemuna kuntwaku; bàvwa bakàngè biibi kàdi Fred mujìmìje nsapì, ne mukèbe myaba yònsò kàdi kàyìkù mwà kuyimòna mwaba nànsha wùmwè to. Kàdi Mwanèètù Welch ùvwa wènda ùlwa kùneeku. Ki ditùkù kulwadi dívwàye ne cyà kufika ne bikwàbò, kabàyi mwà kupeta nsapì ayi mwaba nànsha wùmwè to, ki yèyè kubiikila ànu ku tèlèfòne kwànyì kumbèlu, wàmba ne: “Mwanèètù Branham, nsapì ayi yìdi penyi? Tudikù bafwànyìne kuyipeta penyi?”

42 Mpindyewu, aci's ncifwànyìne kupìta bàmwè bàà kunùdi aku mutù, bwà muntu wetù ewu wèla lukonko lwà mùshindù awu. Kàdi anjì indìlaayi kakesè, nudikù bavùlùke bàna bàà Isàayi pàvwàbo bènda bàkèbangana ne tumpundu apu anyi? “Pa nànkù bu ne mèmè mvwàkù ne màtápishì kampànda mu cyanza cyànyì, nùnkù's ndi muyè naawù ne muleejè. . . mukonkè, kuàpèèsha mupròfetà, ne pàmwàpa yèyè mufwànyìne kutùleeja kùdi tumpundu atu túsanganyìibwa.” Nudikù bavùluke aci anyi?

43 Kàdi pàvwàye wènda wèndakana mu mùsèèsù apu ki kutwilanganabò ne mupròfetà. Kwambayè ne: “Nudi nwenda nukèba tumpundu atu.” Yèyè ne: “Mònaayi, alùkilaayi kumbèlu,” yèyè ne, “tùkaadi tumanè kwalukila.” Ncyà bushùwà anyi?

44 Mèmè kusambila. Fred kuyayè tàmakàtamàkà e kwambulayè nsapì ayi. Ki cyòci aci. Nwamònu anyi?

45 Mwanèètù Ed Daulton, udi lwà penyi? Ed Daulton ùdi penyi? Ndi mumanyè ne ùdi kaaba aka mwaba kampànda,

mvwa mumumòne kùkaadi katanci. Kaa, paanyimà mu . . . nyèyè wàwa. Ùvwa muntèlèjile ku ndongolwelu wa maatèlèfonè anyi ku ndongolwelu wa kufikisha mèyi kùdì batèèleji. Dilòòlò adi dibìikila kulwadì ne Mwanèètù Ed ùvwa ùsanganyiibwa mu lutàtù lukolè. Mvwa muswè kumukwàcisha. “Bwàlà,” mwàkambàye, “ndi muswè ànu bwà wèwè kulòmba Nzambi.” Mémè kulòmba Mukalenge bwà àmukwàcishè. Ki ditùkù dyà pàakacyàbu mukàjèndè kubiikilayè, muntu kampànda kulwayè bwà kumusùngila. Èyo. Ncyà bushùwà anyi, Mwanèètù Ed?

⁴⁶ Nwamònu’s, Yèyè ùdi ànu Nzambi. Ki cyònsò cidìku, Yèyè ùdi ànu Nzambi. Nwamònu’s, Yèyè ùdi ànu . . . Cìdi ànu díbà dyònsò ku musangu ne ku musangu ku mwaba ne ku mukwàbò, ku mwaba ne ku mukwàbò. Lutàtù nànsha lwikàle lwà bìshi, Yèyè ùdi Nzambi. Katwèna tutwà eku ne eku, tudìtwa makùmbù bwà bintu abi to, katwèna ne cyà kwenza nàнку nànsha. Kùlekedikù bwà cyanza cyà balùme anyi cyanza cyà bakàjì cimanyè cidì cyanza cyà balùme cyènta to. Tudi tubyàmbilangana munkaci mwètù kàdi katwèna tucikòbwela mu mwaba kampànda nànsha. Bwalu aci’s mmaditàmishi, bu ne: “Nzambi ùvwa mwà kucyènta bwà muntu ànu umwèpelè.” Yèyè mmufwànyine kucyènta bwà muntu kanà yònsò udi muswè—udi muswè kuMwitabuuja awu. Ndiitabuuja, diitabuuja! Cyònsò—cyònsò cyùdi muswè kwenza, cyònsò cidì meeji èbè aci, ndà naaci kùdì Nzambi. Yèyè—Yèyè—Yèyè—Yèyè ùtu ùfila bintu byònsò. Kì mmwòmò anyi? Pa nàнку Yèyè ùtu wàndamuna ku disambila. Yèyè ùdi . . . Nzambi n’Taatu mwandamunyi wa ku masambila.

⁴⁷ Mpindyewu, ki bwà cinyi mu . . . mvwa ndyàmbidila ne, nkàadi njikija mu masangisha a ndekeelu aa ne bikwàbò, bu mutùvwà . . . mutùdi twenza emu, tudi bafwànyine—tudi pàmwàpa bafwànyine kwenza dijingulula kampànda ku ndekeelu kwà masangisha, bu Mukalenge mwà kwanyisha, ne pàmwàpa mu díbà dyà disangisha adi. Katwèna ànu bamanyè cìikalàYe mwà kwenza to. Mémè ntu mucinangè mùshindù awu. Nciyi ndongolola cintu kampànda to, ànu kuMushiila Yèyè wènta cidìYe muswè kwenza aci.

⁴⁸ Mpindyewu, angàtaayi nshapità mwi4 wa Mukànda wà Bwàkabuulwibwà, ne nwimanyikè ntankù.

⁴⁹ [Mwanèètù wa balùme kampànda ùdi wàkula ne Mwanèètù Branham—Muf.] Èyowà. Èyowà’s, mwanèètù. [Mwanèètù awu ùdi ùtùngunuka ne kwakula. Katùpa kàa mukàbà wà mèyi munda mutupù.] Cyà bushùwà, mémè ndi ngiitabuuja aci. Kakùyì mpatà to, ndi ngiitabuuja aci.

⁵⁰ Mwab’ewu, Mwanèètù Welch Evans, ngeela meeji ne nyèyè udi musòmbe paanyimà pàapa mene wàwa. Ngánjì . . . Patùcìdì tubuulula mu Bwàkabuulwibwà 4 apa.

51 Àbìdì àdì panshì aa, nwênù bônso nuvwa bumvwè ne babalè mu bibèjibeji bwà musumbà wa bìvì ewu mu Louisville bàdì bìiba tùshinyì, bàya naatù ku Kentucky kwàka mu mwaba kampànda, ne lukàsà lwônso. Nènku mu Kentucky amu kabyèna nànsha bìkèngela bwà wèwè kwikala ne mukàndà wà bwena-cintu to, bàdì bàkwenzelawù mu Kentucky amu. Pa nàнку udi ànu...cintu cimwèpelè cìdì cikèngelà wèwè kwenza bwà wèwè kuya naakù kuntwaku ne kukàsumbisha. Pa nàнку bàdì bàngata tùshinyì atu bàya naatù ne bàtùlaabulula mùkubù, ne bàpàtuka ne tùshinyì atu bàtùsumbisha. Cyônso cìdì cikèngela kwikala naaci nnombà wa kumbèlu nènku bôbò—bôbò bàkwenzela mukàndà wà bwena-cintu. Nènku bàdì bùùmusha kàshinyì mu njila bàya naakù ne lùkàsà lwônso ne bàkàbweja mu cyapù kampànda, bàkàshintulula kônso nkòng, nwamònu's, ne—ne bàkàlaabulula mùkubù ne bikwàbò byônso, bàkàpàtula bàya kakàsumbisha. Bàdì bìiba tùshinyì bikolè, kàbìdì nangàngà mu États-Unis mujimà, ne citùpà cinènè—cinènè mmu Kentucky. Mwà mubalè kaabwalu mu cibèjibeji ànu àbìdì àdì panshì aa pa bwalu abu.

52 Èè, Mwanèètù Evans wa mushinga mukolè wa mwoyi munène, mulenga, ne dîkù dyèndè, bèndesha kàshinyì kuumukila ànu ku Macon, mu Géorgie, bàlwa kaaba aka dyàlumingu dyônso bwà kutèeleja Èvànjeeliyò. Kaa, mùshindù mwinè wùdibo ne lulamatu's wè, ne balundà bàà bushùwà! Pashìshe ùdì ùya ku Cafétéria kàà Miller kùdì . . .

53 Ncyèna ngenzela Miller kàmpanyè to, kàdì ncyà bushùwà ne ndi ngeela meeji ne bàdì ne cyàkudyà cyà citàmbe bwimpè bwà mu Kentucky; Nànsha twanji kwamba ànu bwà Louisville, mu Kentucky. Pàdìbì ànu ne . . . Mpindyewu, ncyèna nswà kwamba nwênù beena mèkù múnkaadiku mudyàdyàdye kuntwaku to, ndi nswà kwamba (nudi bamanyè) bwà bidìilù byà pambèlu. Nènku, ntu ndyà kàbìdì kwòkò aku. Ndi mwà kudiisha dîkù dyànyì muntwamu ku mushinga mushààdìle ku mùndì mwà kubàdisha kumbèlu. Ncyà bushùwà.

54 Pa nàнку díbà adi ntu mbwela mwômò amu, nènku Mwanèètù Evans ùdì ùbwelamù ne ùpetakù cintu kampànda cyà kudyà ne ùtèeka kàshinyì kèndè mwab'awu. Pàdiye ùpàtukamù (ne bilàmba byèndè byônso) ne dîkù dyèndè ne bônso abu, kàcìvwa kàbìdì ne kàshinyì anyì ne kantu nànsha kàmwè to. Byônso bìvwa biyè. Èè, mukwàcikwètù, Mwanèètù Evans ùdì ànu muntu mutùdì twètù bônso aba emu, ùtu ne kaamudimu kakesè kàà dyenza kuntwaku, ùtu ùkwàta mudimu wà tùshinyì, ùsùmba bibalakata ne ùbìlongolola. Mmuntu mupèlè, ne ùtùùla mfrangà yèndè bwà kulwa kaaba aka bwalu ùdì wìtabuuja Èvànjeeliyò wa mùshindù ewu. Ndi ndòmba bwà Nzambì àbàtùminèku mùsanjeelà kampànda kuntwaku, bwà kubàkwàcishayè mu ditunga adi.

55 Mpindyewu, Mwanèètù Evans kulwayè, pa nàнку kàvwa mumanyè cyà dyenza to. Ùkaavwa mumanyishe bampùlushi kàdi kabàvwa mwà kukàpeta to. Ki kulwayè kwànyì kumbèlu, yèyè ne Mwanèètù Fred ne bakwàbò, twètù kusòmba mu cibambalu amu e kwakulapù. Mémè ne: “Mpindyewu...” Ki mùshindù wutùtù twenza, tudi tusòmba mu cibambalu, tujandula cìdi cyènzekà, ne pashìishe tuya kùdi Nzambi. Nènku, patwàlòmbu Mukalenge bwà “kukùdimuna muntu uvwa ne kàshinyi aku awu, kumukùdimuna ne kumwaluja,” kwònsò kùvwàye ùsanganyibwa aku.

56 Pa ciibidilu bàtu bàya naatù lwà ku Bowling Green anyi mwaba kampànda, bàtùpàtula mu mpwilàmàmbù emu, nudi numòna’s, pa nàнку bàvwa mwà...too ne pàdìbo bàkakàlaabulwisha mùkubù ne kukàakaja. Kàvwa nkàshinyi kalenga be, ngeela meeji kàà mukokakoka. Cìvwa cyà bushùwà anyi, Mwanèètù Evans? Kàvwa nkàshinyi kàà—kàà mukokakoka.

57 Pa nàнку, nènku cyàkenzekà, twàkatwà binù e kusambila. Ki—ki Mukalenge kutùpèesha bujaadiki, byònsò bìvwa bìmpè, byònsò ànu bilenga. Ki dìbà adi bukolè bwà Mukalenge kubwelabù mutùvwà amu. Mwanèètù Evans kupàtukayè ne kwasayè lwendu, mulombòdìibwe bwà kupwekayè ùlonda njila kampànda.

58 Kwalukilayè buludì muneemu mu Jeffersonville. Kàshinyi aku kàvwa kiibila mu Louisville; ki kàshinyi kèndè nkòkò aka katèeka mwaba awu kiikàle ànu ne ndambù mukùmbàne wa kàsòloonyi bwà kuya naakù. . . kaa, kuumuka mwòmò amu, bwà kwikalabò bayè naakù pabwipi menemene ne Bowling Green ne kwalukila. Kupàtukabò mu kàshinyi aku, biimànyike kàshinyi, bashiyemù nsapi, baasè ànu lwendu bayè bakàshiyè kasòmbè mwaba awu, ànu muneemu mu Jeffersonville emu mùvwàye ne mùshindù wà kukàpeta; kì mmu Louisville to, muneemu mu Jeff., balwè naakù too ne muneemu bakàlùje.

59 Nudi bamanyè’s, Mukalenge ùdi mwà kwenzeja nyuunyi bwà kuMutùmikilayi, Ùdi mwà kwenzeja bantu bwà kuMutùmikilabò, Ùdi mwà kwenzeja mwena lukunà Wendè bwà kuMutùmikilayè. Yèyè...Èyowà’s, mukalenge, Yèyè’s ùdi Nzambi. Ki kàshinyi kèndè nkòkò aka kasòmbè kamùyi kantu nànsha kàmwè bayè naakù to, ànu ne cyàbibidi cimwè cyà ntanki wa kàsòloonyi uvwayè mwambè kafika nendè mu Bowling Green awu, ne Nyumà Mwimpè nguvwa ne cyà kwikala mwambè ne: “Kùdimukà! Alùkilà kwòkò aku ùye ne kàshinyi aku ku Jeffersonville. Kàshiyè mu mùsèsù emu mene, ne kìmànyikilè *apa* nùнку, (bwalu Mémè nèmmutùmè bwà àlondè buludì lwà *kùneeku* eku ne àlwilè lwà *kùneeku* bwà kukàpetayè).” Ncyà bushùwà anyi, Mwanèètù Welch? Ncyà bushùwà. Nwamònu’s.

60 Yéyè's ùdi Nzambi! Ûtu wàndamuna ku disambila's, Mwanèètù Roy. Ûdi ànu... Cìdi, Mwanèètù Slaughter, cìdi ànu cintu cimwècimwè aci's, Yéyè nguvwa mwondòpe kabwà kèèbè kakesè aku. Ne mèmè ndi mumanyè ne Yéyè ùtu wòndopa, Yéyè ùtu wàndamuna ku masambila, Ûcidi ànu wènza bishimà, Yéyè ùcidi ànu Nzambi, Ûvwa misangu yònsò ànu Nzambi, Yéyè neikalè misangu yònsò ànu Nzambi!

Yéyè—Yéyè ùdi Nzambi ku musongà wà nzùbu,
 (Ncinyi aci, citù mwanèètù wa balùme awu
 wimba mu èkèleeziyà emu aci?)
 Nzambi mu cìkukù, Nzambi mu ferme,
 Nzambi mu màshinyi a kàdyendelandelà, Yéyè
 ùdi Nzambi myaba yònsò,
 Yéyè ùdi Nzambi kuumukila ku—ku ntwàdijilu
 too ne ku ndekeelu, Nzambi.

61 Kaa, bilenga kaayi's wè! Tudi bafwànyine kudìtwa mu diyiisha paanyimà pàà katanci kàdi katùyikù tubwela mu dìleesònà edi to.

Éyo, twinyikààyaaku mitù yètù bwà katanci kakesè cyanàànà bwà disambila.

62 Taatù wa mu Dyulu wa musàngelù, tudi banangèpu Dìyi Dyèbè dyà Cijila mu mùshindù wà ne myoyi yètù yìdi yilàkuka kapyà munda mwètù, patùdi tumanya ne Nyumà Webè ùdi ùtùluka munkaci mwètù ne wàkula neetù, ne myoyi yètù yìya yìDikwàta. Ne tudi tumwèka ànu bu ne tudi tudyùmva bilenga byà dikèma bwàDì, Mukalenge.

63 Ne pa kumanya ne mu dîbà dyà mîdimà mùdi cibwejàkàjì búngì cyanàànà emu... Bu mwákambà mupròfètà ne: “Mu matùkù a ndekeelu nekùlwe ciyòlè cyà nzala,” cintu kampàndà cyà mùshindù ewu, “kaciyi cyà dyàmpà ne cyà màyi to, kàdi cyà ditèèleja dyà Dìyi dilelèlè dyà Nzambi; ne bantu bàvwa mwà kwenza ngendu buumukila ku esètè bàya ku wesètè, ku nord ne ku sud, bènda bàkèba bwà kupeta Dìyi dilelèlè dyà Nzambi.” Dìyi! Dìyi ncinyi? Yesù ngudi Dìyi: “Dìyi dyàkavwijìbwa mubidi ne dyàkasòmbela munkaci mwètù.” Pa kumòna dimwèneshiibwa dyà Dìyi dilelèlè dyà Nzambi dimwèneshiibwe bilondèshile Mifùndù ne mifikisha ku dyenzeke, ne, mùvwa bantu mwà kwenza ngendu bènda bàkèba ne bàpangila bwà kuDìpeta. Éyi Nzambi, tudi ne disànkà be, ne disànkà dyà diyiila ne panshì dyà mutùdiku twètù baMupetè kùkaadi bidimu, wa mushinga mukolè bwà myoyi yètù, ne kumòna ne katwèna mu cibwejàkàjì nànsha cikesè to.

64 Éyi Nzambi, Wèwè's wákamba ne: “Aba bàdi bamanyè Nzambi wabò nebènzè byenzi byà bulòbò mu ditùkù adi.” Kàdi's ki twètù aba mu matùkù a ndekeelu, munkaci mwà kumòna bintu byònsò byákambà Yesù ne nebyènzekè, biikàle bimwèneshiibwa munkaci mwètù mene. Bimanyinu mene

abi, maalu a kukèma, bishimà byènjiibwa, tubyènza ànu menemene mwàkabyènzàYe Yèyè amu. Bu mwàkambàYe ne: “Ànu mwàkadìbi mu matùkù a Sodomà, ki mwikalàbi kàbìdì ku dilwa dyà Mwànà wa muntu.”

⁶⁵ Nènku, Mukalenge, Ùtùlekèlèku, ku Nyumà Mwimpè, twòlolè cyaanza mu Díyì adi twàngatè bintu bilelèlà abi ne tùbitwàngàjè ne Kàlvariyo, ku Díyì, ne tùmònèku ne mu Yèyè mmutùdì ne kaabujimà. Ne mabanji ne mabènesha ne butùmbì ne byònsò biyaaya kùdì Yèyè Udi mukùmbànyìne awu, wàkalwa kwangata Mukàndà mu cyaanza dyà dyàbalùmè cyà Yèyè uvwa musòmbe pa Nkwasa wa butùmbi, ne kusòmbePù Yèyè mwinè, bwalu Yèyè ngwàkashipiibwa kacya ku difùkà dyà dyulu ne buloba.

⁶⁶ Tudi twakula bwà bwalu Bwèndè mu dindà emu, Taatù. Tudi tulòmba bwà Wabèneshakù myoyi yètù. Nyumà Wendè àkwatèku mudimu munkacì mwètù ne àtùbènèshèku, ne àfilèku bubanji ku dilabula dyètù, ne òndopèku mabèèdì munkacì mwètù, ne àtùpèèshèku ngàsà wa kucimuna nendè.

⁶⁷ Nènku, Nzambi, pàndì mpàtuka nya kuntu kwàka mu budimi bwà bwambi bwà kakùngamangana ne mulwishì apa, swàku bwà mmanyè ne ndi ku dîbà ne ku dîbà munyùngulukila kùdì disambila. Kaa, mùshindù mwinè wùndì ngeeyemena dinnyùngulukila adi's wè, mwena lukunà ùseemena, kàdì mèmè mumanyè ne dinnyùngulukila adi nkacya dyàkwàta bwalu baamaamù ne baataatù, ne bânà bàà balùme ne bàà bakàji, beena Kilstò, balediibwe cyàkàbìdì biikàle benzè dilabula, bantu bàdì mu njila batàngìle mu Dyulu biikàle ku binù bàsambila ne: “Éyì Nzambi, filakù disùngidiibwa!” Nènku, Taatù, tudi tulòmba bwà Wènzèku bwà tükabwelè mu milongo yà mwena lukunà awu mwàmwa ne kukwàta ku bukòòkeshi musùükà wònsò wà mushinga mukolè wùdì mwindile. Enzàku, Mukalenge, ne kuyipàtùla mu mîdimà kuyibweja mu Bukènkè. Bwalu tudi tulòmba nùnkù mu Dînà dyà Yesù. Amen.

⁶⁸ Mpindyewu, mu nshapità mwi4 wa Mukàndà wà Bwàkabuulwibwà. Twàjikijì nshapità mwi3, nènku twikalàayikù ne kaneemu nènku nénditacìshè bwà kubènga kunùlama mukùngulù mupitèpìte bule. Kàdì mu nshapità mwi3 ewu, Èkèleeziyà wàkabànda bu cifwànyikijilu, pàakangaciibwà Yone muulu. Èkèleeziyà wàkabànda, ne kubangila dîbà adi bàdì batàngila bwalu bwà Izalèlèlà, too ne pàdìYe ùlwa cyàkàbìdì. Kanwènaayikù numòna mùdìbì anyì? Bantu leelù ewu, mùdìbo ne: “Cintu kampàndà cyà cinène necinyukushè buloba bujimà ne bikwàbò byònsò.” Aci kî ncyà mu Mifundu to! To, mukalenge. Cintu cidì cilondà mu dilondangana adi ndiYa dyà Èkèleeziyà. Balàayi mu bikondo byà èkèleeziyà, nudi numòna cidì . . .

⁶⁹ Mpindyewu, bintu bikwàbò bìdì ne cyà kwenzeka ebi, mmu cikondo cyà Mushingà wà Dibàkà piikalà Èkèleeziyà ùkaadi

mu Butùmbi. Nzambì udi wàlukila ne maalu manènè a kukèma a dyanza, bishimà byà buloba bujimà ne bikwàbo, kùdì beena Yudà, kabìyikù bitàngila Èkèleeziyà to nànsha kakesè.

⁷⁰ Mu nshapità mwi3 mmùdì mùjikilà cikondo cyà Èkèleeziyà. Ncyà bushùwà. Nènku cikondo cyà Èkèleeziyà cìdì cìjika ne banyaàbanya baa menemene batùdì tusangana. . . Tèèlejàayi ànu kaaba aka. Ndi—ndi mubalè cyàkàbidì cyòci eci mu dindà emu, ncyambè kunsunsulula's, mwaba ne lwidì lwà Kilistò ku ndekeelu kwà cikondo cyà Èkèleeziyà, ùsanganyibwa kuumukila ku mvensà wa 20 too ne ku wa 22 wa Bwàbuulwibwà 3. Elàayi meeji pa bwalu abu ne Kilistò, ku ndekeelu, mwaba wùdìYe ùsanganyibwa! Yèyè ùdì penyì ku ndekeelu kwà cikondo cyà Èkèleeziyà? Pambèlù pàà èkèleeziyà Wendè, musàka pambèlù kùdì màngumba ne twitabàayi. Lwidì Lwendè lùdì bishi? Uteeta bwà kwalukilamù. Awu's ngiikadilù wa wènza luse's!

⁷¹ Pashìshe tudi tusangana kaaba aka ne, “paanyimà pàà maalu aa,” yèyè kuumvwa Dìyì dyàkula nendè ne. . . Kaa, cìvwa ncinyi? Nyumà wàkuumuka pa buloba. “Paanyimà pàà maalu aa,” mùdì nshapità wa kumpàlà ùbanga, anyi—anyi mvensà wa kumpàla ne:

Paanyimà pàà cyòci eci mèmè kutàngila, ne, mònaayi, cìibi cyunzulula mu dyulu: . . .

⁷² Bwàkabuulwibwà 4.1, paanyimà pàà Èkèleeziyà mumanè kuya, dìbà adi ci—Cìibi cìvwa cyunzulula. Ne tudi balongè byònsò abi ne basangàne ne ùvwa n'Kilistò, uvwa Cìibi aci. Ne Dìyì òmwèdìmwè òmwè òmwè dyènda munkaci mwà bitèekedi byà myèndù byà ngòlò mwandamutekète adi òmwè òmwè Dìyì òmwè òmwè òmwè mu Dyulu, dyàmbe ne: “Bànda kùneeku” adi. Yone kubàndayè. Cìvwa cìleeja Èkèleeziyà ùya mu Dyambwibwa.

⁷³ Yone wàkabànda mu Nyumà, wàkangaciibwa mu Dyulu ne wàkadyànjila kumòna bintu byònsò bivwà Nzambì mulyè ne mwambile bayiidi ne: “Bwalu bwèbè wèwè bùdì penyì bu yèyè mwà kushàala too ne pàNgàalwà?” Yèyè wàkamòna dilwa dyà Mukalenge ne bivwà mwà kwenzeka. Wàkamòna pa buloba bivwà mwà kwenzeka pa buloba too ne ku Dyambwibwa dyà Èkèleeziyà, ne wàkangaciibwa muulu ne bààkamuleeja too ne paanyimà pàà Bukalenge bwà bidimu cinunu. Kaa, abi kí mbilenga bilaya anyi?

⁷⁴ Mpindyewu, tudi bamushiye mu dyàlumingu dishàale mu nshapità mwi4 ku mvensà mwi4.

Ne mu nyungulukilu wa nkwasà wà butùmbi mùvwa nkwasà makùmi àbidì ne yinaayi: ne pa nkwasà ayi ngàkamòna bakùlù makùmi àbidì ne bànaayi basòmbe, bavwàle bivwàlù bitòoke; ne bavwa ku mitù yàbò bavwàle bifulu byà butùmbi byà ngòlò.

⁷⁵ Mpindyewu, tudi basangàne ne bôbò aba bàvwa mbakùlù. Kacya *mukùlù* kacitukù cyàngaciibwa bwà Mwanjèlo anyi Kampànda mukwàbò to. Mmuntu mupikula, bakùlù! Bwalu bàdi. . . Nkwasa yà butùmbi, bifulu byà butùmbi, ne bukòokeshi kacya kabitukù byàngaciibwe bwà, bwà Banjèlo nànsha. Kàdi bifulu byà butùmbi ne nkwasa yà butùmbi, ne bikwàbò, bìdi bitàngila bantu. Ne bakùlù aba bàvwa baashiibwe bifulu byà butùmbi ne bavwàdikiibwe bivwàlu ne basòmbe pa nkwasa yà butùmbi. Ne tudi tubàsangana mu bitùpà bikwàbò byà Mifùndu ne bàvwa mbàpostòlò dikùmi ne bàbìdì ne bàwà bankambwà dikùmi ne bàbìdì. Bôbò abu *makùmi àbìdì ne bànaayi*, byùmvwija “makùmi àbìdì ne bànaayi”: bàpostòlò dikùmi ne bàbìdì, bankambwà dikùmi ne bàbìdì.

⁷⁶ Nènku, tudi tusangana ne, nànsha mene cimenga cidi cìpwèkà cìfùmina kùdi Nzambì mu Dyulu aci. . . Paanyimà pàà bulòba bumanè kutaayika ne byònsò bishààle tusùnsukilà ne kakùciyi kushààle kantu nànsha kàmwè pa buloba to ànu butù bwà volcan (ki cyònsò ciikalà cishààle), kakwàkwikala kàbìdì mbù to. Mbù neàkamè.

⁷⁷ Mùmvwà ngaakula makèèlèlè dilòlò awu ne muntu kampànda, anyi makèèlèlè, mu mwaba kampànda, musangu kampànda buloba bùvwa bwimàne mùshindù *ewu*, bululàme, bùnyùngulukila ku díbà, luuyà lwikàle lwà mwomùmwe muulu mwònsò too ne panshì. Mu madimi a mabwe a mashikà a mu Grande Bretagne mwàmwa, udi mwà kutaayisha buloba kuya too ne mu mètres lukàmà ne makùmi àtaanu usanganamù mabwè a ngaji. Mbilwè dyàkàmwè, kubìvwija mabwè a mashikà ànu bu mu cyamù cyà mashikà mpindyewu. Byenzè mùdì *dymùsha dyà màyi* dyènù adi, ne bikwàbò, ne *dymùsha dyà ne mashikà* divwija mabwe didi dilamà mbèèlèbeele adi ne bikwàbò munda mwà bidimu ne bidimu bicìvwàvwà. Nwamònu anyi? Mùshindù wùmwe wùmwe awu ngùvwàbi mu cikondo aci. Ne lùkàsà lwònsò kulwakù kabùtù kàà mvùlà yà Noà ne kubwikilayi buloba bujimà. Ne pààkenzekàbi nànkù, makolè a bómbe bwà mùshindà àkabùtènkekaja e kubùumusha mu mpoko wabù, e kukwàtabù dibwe dyà mashikà ne kushààlabù nànkù awu. Nwamònu anyi? Umbùlà mu buloba neùbisangàne, mu bitùpà byà mu nyùngulukilu wa Pole Nord bìvwa byàbya ne bikwàbò, mabwè a ngaji ne bikwàbò. Bìvwa bìleeja ne kale wàwa yìvwa mmyaba milenga misòmbe kùdi bantu, milongolola. Kàdi mpindyewu buloba mbunyùkusha butùma paanyimà.

⁷⁸ Mpindyewu, kùndi ngeela meeji ne Nzambì wàkapeta màyi awu, pàdi Genèsè ùbanga apu, Genèsè 1: “Buloba bùvwa kabùyi ne mbùngakeenu, ne munda mutupù, ne màyi àvwa pamutù pàà ndòndò. Nyumà wa Nzambì ùvwa wèndakana pamutù pàà màyi wàmba ne: “Bukènkè bwikalèku.” Nzambì wàkatàpulula díbà adi buloba bùme ne màyi, ki cyàkenzà buloba. Kàdi buloba bujimà bùvwa bubwikidija. Mpindyewu, cyàkenzàYe,

Ûvwa ànu . . . mu bibwàshibwàshì mwònsò amu, Ûvwa ànu . . . cibwàshibwàshì cidi . . . Bibwàshibwàshì mbyùle tètè ne hydrogène ne oxygène, ne bikwàbò. Pashiishe kubibàndishaYè ànu kuulu kwà buloba ne kubitàpululaYè. Kakùvwa mbù pa buloba musangu awu to. Nzambì ùvwa ùmyamina buloba mâyi, kakùyì nànsha mvulà yilòka to. Ûvwa ùbùmyamina ne mâyi a tusùlù ne bikwàbò, dyela dyà mâyi ku bikùnyìibwà's. Pashiishe pàvwàYè . . . Cintu cìmwèpelè cyàkenzàYè dîbà adi . . .

⁷⁹ Pààkuumushà muntu buloba mu mpoko wabù, kubùtùma ku luseke lùmwè, cyàkenzekà ncinyi? Cyàkabùkùpa paanyimà mu . . . luuyà lukolè panshi *apa*, ne mashikà muulu *mwànwa*. Nènku luuyà ne mashikà, cidi cyùngwilà ncinyi? Cyùmvwàyi pa màdidiishi awu mpindyewu mene, luuyà lukolè munda emu ne mashikà pambèlù. Nudi numòna cisùlùlù anyi? Ne mvulà yidi ànu cisùlùlù cyanààna, cikòpàkànyì. Ne mâyi mbutù. Nènku pashiishe pàvwàbi . . .

⁸⁰ Ntu munangè musambu awu wà ne:

Wàkatèeka cyanza Cyèbè, Mukalenge wa
 mushinga mukolè, pa mpàtà,
 Wàkatèeka cyanza Cyèbè cyà cikemesha aci pa
 mulongo wà mikùnà;
 Mukalenge, Wàkiicikija mpokolo,
 Kujuula mukùnà,
 Éyi Mukalenge, lamàku cyanza Cyèbè cyà
 mushinga mukolè aci pambidi pàànyì.
 Wàkenza mavuba, kwenza mavuba àkenzà
 mvulà awu,
 Ku mvulà e kwenza mbù,
 Ku mbù kutwàla mavuba,
 Bwà kutùpèèsha mwoyi wà wùyiila ne panshi;
 Wèwè udi mukwàte buloba ne mauulu mu dîyi
 Dyèbè ditùma, Mukalenge,
 Kaa, swàku ùlamè cyanza Cyèbè cyà mushinga
 mukolè aci pambidi pàànyì. (Kaa, mùshindù
 mwinè wùdibi bilenga's wè! Éyowà's,
 Nzambi wa mu Dyulu.)

⁸¹ Pashiishe mu cikondo cinène eci, mbwalùkìlè bwèyemenè nùнку *ewu* mpindyewu, ne Yèyè mmutwènzèle mulayi ne: “Kabyàkwikala kàbìdì ku mâyi to, kàdi nkapyà bwà ewu musangu!” Pamutù pàà kubùkùpa . . . Bòbò mbakùpe buloba kule ne dîbà, mu bushùwà bwà bwalu, ki kukwàtabù mashika. Wèwè mubwèlè mu dîbà, nebwòshikè. Nènku ànu mwàkabùbùtulàYe ku mâyi ne kutèeka mwanzankòngòlò mu dyulu amu, Yèyè “kì mmufwànyìne kucyènza kabìdì to,” mpindyewu, Yèyè mmufile mulayi ne neikalè mwà “kubwòsha!” Pa nàнку ki nwènù bààfikì mwaba wùdì mpèkaatù ne dibàlakana dyònsò ne bukooyà bwònsò . . .

⁸² Nènku ànu àbìdì àdì panshì aa mvwa ngendela pa kabalù mu mpàtà. Pàmvwà mwànà mukesè mvwa ngenza kwela meeji, ngangata mikàndà yànyì yà maalu-malonda ne maalu a buloba ngeela meeji bwà mpàtà minènè yà ku wesètè ayi. “Dìngà ditùkù,” mungàakambà, “ngaadyàkusòmbelamù mu ditalala ne cinyàànyà mwaba wùdì kawùyi mpèkaatù to, ne nengìikalè ngendakana mu madimi ne nêngènzè bulembe bu Indien. Nènku nê—nènsombelèmu, nsòmbelu wa ditalala, matùkù àànyì ònsò a mwoyi.” Kàdi mpindyewu bìdì . . . mutòòke’s mmuyèmu. Mwaba wùdì mutòòke ùya, mpèkaatù ùdì nendè. Yèyè ki mushebeyanganyi mutàmbe bunènè ne mushebeyi ku bantu bònsò pa buloba, mmutòòke awu. Yèyè ki mupidyè diitabuuja ku makòbà ònsò!

⁸³ Mwab’ewu ànu àbìdì àdì panshì aa mu cibèjibeji (Mwanèètù Thom ewu, wa ku Àfrikè), mvwa mumòne katùpà kàà bwalu mu cibèjibeji kùkaadi mbingu yìbìdì, ngeela meeji ne mmùvwàbi, ki kwambayè . . . bàmba ne: “Bòbò ànu batùngùnùke ne kwanyishila beena Àmèrikè bwà kuya ku Àfrikè, mu bidimu dikùmi kuumukila ku mpindyewu nyama munène wa ntambwe wa mu Àfrikè awu kààkwikalakù kàbìdì to, ne nzevu ayi.” Bantu bapidyè diitabuuja abu bààsa bingoma mwaba kanà wònsò wùdìbo mwà kwasa awu. Kùdì fòtò wa nyama milùme yìbìdì yìteeta bwà kwimanyika mulùme mukwàbo uvwa mutàpìlwe mpùtà awu kuulu. Bìvwa bìmwèka ànu bu ne binsònjì bìvwa bìyìpweka mu mèsù. Kayìvwa miswè . . . milùme kayìvwa miswè bwà mukàjì awu àfwe to. Ne yònsò wa kùdìyi ùmukwàcila ku luseke lwèndè, nùnkù *ewu*, ùmulama bwà kàdìshìndì ku . . . panshì to. Bàyààsa bàyìsùnsula. Muntu uvwa wasa cintu kanà cyònsò mùshindù awu awu kì mmukùmbànyine kwikala ne cingoma mu cianza cyèndè to. Ncyà bushùwà. Kwènàku ne meeji makùmbàne bwà kumanya mwà kupita naaci to.

⁸⁴ Mpindyewu, kùkaadi ndambù wa bidimu, mvwà nteeta kusàka cisùmbù kampàndà cyà nyama, cyà mbudi, nyitùma kùdì mulundà wanyi mwìmpè, Mwanèètù Roy Roberson ne bakwàbò kuntwaku, pàmvwà mulombodi mu Colorado; mvwa mumanyè ne tuvwa ne cisùmbù cilenga cyà bimunà. Mèmè ne Jeff tuvwa naayi kuntwaku bidimu ne bidimu, nyama mitwè ku makùmi mwandamukùlù yà mbudi mu cisùmbù aci. Bàdi bàlekela bàmwè bàà ku bantu bàà bìrò bàà ku Denver bàlwa kuntwaku bavwàle tùpanù twà ne cyà kuulu bilamakaja, ne bimbuma-mootò byà nshinga abi. Abu mbaabilembi’s. Hmm! Kì bòbò aba bàlwa kuntwaku, musùmbà mujimà, mu tùshinyì twà jeeps ne bintu byà mùshindù awu, kubwelabò mu citùpà cyètù cyà buloba amu.

⁸⁵ Ne mèmè mvwa nsàka mbudi eyi luseke lukwàbò lwà mukùnà paanyimà pààbò, mu ntàntà wa wìpacila kilòmèètà umwe ne citùpà anyì yisàtù, ne yòyi yìvwa midikùngwìjilekù. Bìkèngela ùyilamè mishìilàngàne ntàntà, minènè yà mpànga ayi ne bikwàbò; kùyi mwenzè nànkù to, wànyangàkàjì cisùmbù

cyèbè cyà bimunà. Yidi ànu mùdì kumuna kwà ngombe anyi ní ncinyi cyónsò eci amu. Bivwa bikèngela bwà nyama yà cisuku kwikalayì mùshindù wùm wèwùm wèwè awu bwètù twètù. Kí nyà diludikila mikete nànsha. Wèwè muswè kulonga kwasa nànkù's bàtu ne mwaba wà diteetela bingoma mwaba ewu wà kulongela. Ncyà bushùwà. Mbundù be bwà kushebeya bintu mùshindù awu. Mbubi, ndipanga kaneemu bwà Nzambi!

⁸⁶ Mémè kubala mazàji lukàmà ne makùmi àbìdì ne àsàtù maashila ku bingoma byà mwambùyì, mùshindù awu, bààsa ne cingoma citèekela pa makaaya. Kì pààkacyàbu mu dindà, Mwanèètù Banks Wood ewu pàm wè naanyi, twètù kubànda ku mukùnà aku, mémè kubala myaba dikùmi ne citèèmà yà lubòlèlèlà lwà mashi. Kabàvwa bamanyè kantu pa bìdì bitàngilà dilemba dyà nyama to; udi mwà kwasa nyama munènè mùshindù awu, udi mufwànyìne kumulenga byà bibi bikùmbàne byà umushebeya. Kàdi bàvwa bóbò bàlekelela ànu, “mpàn, mpàn, mpàn,” bààsa ewu pashìishe bààsa mukwàbò. Mòna's, s'neyifwe. Kàdi ciikalà mwà... Paanyimà pàà mubidi kapyà mumanè kuyikwàta, wèwè muyisangàne kayicyena milenga mukana to, yidi yinyanguka dyàkàmwè; kì bidyàbibolè, mibwàbwà ne bikwàbò, yidi yiyidya. Dikùmi ne citèèmà milààle mu mashi, mpàngà minène, yà bikònò *mòna* bunènè myaba yónsò ayi, ne mashi bisòmpoka too ne mu ntàntà wa centimètres makùmi àsambòmbò myaba yìvwàbo batùbùle mùshindù awu ne bingoma abi ayi. Kabivwa bikèngela kwanyishilabò muntu mupidyè diitabuuja wa nànkù awu bwà kwikalayè ne cingoma mu cyanza cyèndè nànsha. Ncyà bushùwà. Yèyè kènàku ne meeji ètù aa bwà kumanya cyà dyenza ne cingoma to. Kaa, s'mbwalu bunène, bubì be bwà kwenza mùshindù awu.

⁸⁷ Aci's ncibi be, kàdi's ki mwena Àmèrikè nyèyè awu. Canada, nwènù bantu bàà musinga mukolè bàà ku Canada! Àmèrikè yèyè ànu mutungùnùke, Canada neikalè wa ciipanshì ànu mùdì Àmèrikè amu, paanyimà pàà cikondo kampànda. Ndà myaba yónsò yà ku mikàlù ne Canada ayi mwaba kanà wónsò, udi usangana cyuyüya cyà cyena-Àmèrikè aci. Àmèrikè ewu ki ndumbà wa matunga. S'ki cidìye menemene, ne neatambè kubìpa byà kacya mpindyewu. Úkaadi mutàngile ku ndekeulu wèndè! Bible ùdì wàkula bwà kabùtù kèndè, wàmba mwikalàye. Àmèrikè: wa ciipanshì, mubolè, wa bukooyà, kàyikù mwîmpè to. Ncyà bushùwà menemene. Úvwakù ditungà dinène. Úvwakù mwèndè ne mukenji wa Èvànjeeliyò. Ncinyi cidì cimuvwijà mùdiye emu? Mbwalu mmudyombòle Mukenji wà Èvànjeeliyò, ne mubènge Malelèlà. Úkaadi úkwàcisha bwòwà. Cikaadi cimuvwila, kanùtácishi meeji to. Mvwa mucimòne mu cikèènà-kumòna bu EMU MMÙDÌ MUKALENGE WAMBÀ! Cidi munkaci mwà kulwa. Yèyè's neàyoobè bwà mpèkaatù wèndè.

⁸⁸ Kale wàwa pàvwà Àmèrikè mwikàle Àmèrikè, s'ùvwa ditungà dinène. Ditàmbe bunène dyà kacya buloba

bwikalakù kacya ku Izalèlèlè, s'dìvwa ng'Àmèrikè, kàdi patùdi twakulangana apa wādikooyishì ànu yèyè mwinè bushuwa. Wábengi Mukenji. Wángàci ànu...Patùdi twakulangana apa mmudìvwjè...S'nudi mwà kumòna mwaba wùkaadiye mpindyewu. Bwà aci kaayì muntu yònsò mmumanyè, mu masungulangana a ndekeelu aa yèyè's mmuleejè mwaba wùdi cipidi cyèndè cyà nyumà. Uh-huh. Kí mmumanyè to.

⁸⁹ Mpindyewu, bakùlù bàdi basòmbe pa nkwasa yà butùmbi ne bifulu byàbò byà butùmbi aba. Mpindyewu, mvensà mwi5, netùbangè:

Ne ku nkwasa wa butùmbi kùvwa kùpàtuka mikenyi...mikungulu...mèyì: ne kùvwa myèndù mwandamutekète yiteemà mudilu kumpàlà kwà nkwasa wa butùmbi aku, yivwà miikàle Nyumà mwandamutekète yà Nzambi.

⁹⁰ Kaa, mèmè ndi munangèpu eci's wè! Kàdi nwènù? Kaa, ndi ndyùmvwa ànu bu ne kàzakù kàanyi nkankùmbàne, nudi bamanyè's. Ndi ànu...pàdi...Kaa, ndi muswè kwamba ne mmu kàzakù kàanyi kàà nyumà, mu bushùwà bwà bwalu, nudi bamanyè's. Èyo.

⁹¹ “Ku Nkwasa wa butùmbi.” Twǎnji twàkulààyikù bwà Nkwasa wa butùmbi ewu mpindyewu bwà katanci kakesè. Ewu kàvwa Nkwasa wa ngàsà nànsha. Bwà Nkwasa wa ngàsà mbujikè; kakücyèna kàbidì luse to, kùkaadi kaküciyi luse to. Mmunyi mutwikalà mwà...Mmunyi mwikalà nkwasa wa cilumbulwidi ne cyà kwikala nkwasa wa cilumbulwidi wa Kilistò, nkwasa wa cilumbulwidi, Nkwasa Mutòoke wa Cilumbulwidi? Mwômò amu nemwikalè luse dîbà adi anyi? Kakwèna kandambù nànsha kakesè kàà luse kààfidiibwà to. Ku Nkwasa wa cilumbulwidi aku wèwè udi mufwànyine kwela mbilà yà “luse” too ne pawikalà kùciyi kabidì mwà kuyèlèla to, ne cidi, ànu bu ne udi wela mbilà mikolè mu lupeepèlè mwaba kampànda, bwalu kakücyèna kàbidì luse to.

⁹² *Mpindyewu* ki ditùkù dyà luse! Mpindyewu, twàlukilàayi mu Dipungila Dikùlukulu emu bwà katanci kakesè cyanààna bwà tujandulè ne luse ncinyi. Twàlukilàayimù bwà tùmone cìvwà cyènzekà ku mwinè Nkwasa wa butùmbi ewu. Nkwasa wa butùmbi ewu, mu bushùwà bwà bwalu, ùdi nnkwasa wa—wa cilumbulwidi. Ne kwikala...cidi cyèenza ne leelù ewu kwikalè luse, mbwalu nkwasa wa ngàsà mmumyamina ne difuta dyà cibawu. Mashi! Ne pàcidì ànu Mashi pa nkwasa wa cilumbulwidi dîbà adi kacicyèna kàbidì nkwasa wa cilumbulwidi to, nduse, bwalu Cintu kampànda ncifwè bwà kupangisha cilumbulwidi. Nwènù bacimòne, ambàayi ne “Amen.” [Disangisha didi dyamba ne: “Amen.”—Muf.] Bu mùcidì ànu Mashi pa nkwasa wa ngàsà, mbileejè ne Cintu kampànda ncifwè bwà kupangisha

cilumbulwidi. Kàdi pìikalà Èkèleeziyà mwambwibwe, nkwaswa wa ngàsà ùdi ùlwa nkwaswa wa cilumbulwidi!

⁹³ Mwàmwa, nudi bamanyè's, mu Dipungila Dipyadìpyà emu, kàbìdi: "Ne mu mwaba wà cijila." Ki mùvwà beena kasùmbù kàà—kàà bangaci bà mapàngadika...mu mwaba wà cijila, mulumbulwishi pa nkwaswa mu mwaba wà cijila. Mpindyewu, nkwaswa wa cilumbulwidi awu mu mwaba wà cijila wàkalwa mùle tètè ne mwìshì. Cìvwa ncinyi? Bu Mukùnà wà Sinaayi, cilumbulwidi! Luse lùkaavwa luumùke ku—ku Nkwaswa wa butùmbi wa Nzambì. Nzambì neàlumbulwishè bàà pa buloba kakùyi luse to. Mbanganyì bàdi bamanyè nàнку?

⁹⁴ Kùdi cintu ànu cìmwèpelè cìtabàYe mu ditùkù adi, Cìdi ncinyi? Mashi. Ki cintu cìmwèpelè cìvwa cìtuuyishà cìiji cyà Nzambì ncyòci aci.

⁹⁵ Adàmà ne Eva bààkenza kaalubondya kìmpè ànu mùdi kàdi Méthodiste, Baptiste, Presbytérien kanà yònsò ewu, anyì mwena Mpenta mufwànyine kwenza aku, kàvwa kàjika butakà bwàbò. Kàdi Nzambì ùvwa mwà kumòna too ne dyàmwàmwà dyà kòkò aku, pa nàнку Yèyè kushebeya cintu kampànda ne kwangata bisèbà bifwè byà—bisèbà byà nyama mufwè ne wàkabùbwikila. Mashi ngàvwà ne cyà kwangata kaaba kàaci. Aci cyàkapangisha cìiji Cyèndè cìkolè aci, Wàkamòna Mashi ne wàkaalukila cyànyimà, bwalu cintu kampànda cìvwa cipòngòlòle mwoyi wàci. Èyi Nzambì wa yààya!

⁹⁶ Anjì elàayi meeji ku cyòci aci! Cintu cìmwèpelè cyàpingajà Nzambì paanyimà m'Mashi. Ne kùdi Mashi ànu àmwèpelè ìkalàYe mwà kwalukidila paanyimà, ngàà Mwan'Èndè Sungasunga awu. PàdiYe ùmona ne m'Mashi a Mwan'Èndè Sungasunga, Yèyè neàalukilè cyànyimà. Bwalu ki dipà didi...Nzambì mmupèeshe Mwan'Èndè, bwà kupikula aba bàakadyànjilàYe kumanya abu, ne ki cidì cyàluja Nzambì paanyimà kumpàlà kwà cilumbulwidi Cyèndè. Kàdi pùumushiibwà Mashi awu, ne pààbìikidiibwà bònsò bàvwà badyànjila kumanya abu bwà kubwelabò mu Kubidi wà musinga mukolè awu, Èkèleeziyà Wendè mumana kulongolola ne mwambwibwe, dìbà adi cìiji cìkolè cyà Nzambì cidì pa bantu.

⁹⁷ Kaa, mwanèètù, kùjingikù bwà kwimana kuntwaku to! Lekèlà ngiìmanè kumpàlà kwà cingoma cyà mwambùùyì, lekèlà bànkòsòlòlè tutùpà tutùpà, lekèlà bànkòsè ne scie kaacentimètre ku kaacentimètre, lekèlà cintu kanà cyònsò cyènzekè (bu mu mucipù wà Babàndi bàà pa tubalù bàà Colomb), lekèlà bàmpandè difù ne bòshè ne soufre byònsò bìdi munda mwànyì, ne mabòkò ne mikòlò yànyì bikoshiibwè, cyònsò cidì mwà kwikalakù aci, kàdi kùndekèdiku nkiìmana ku Cilumbulwidi cyà Nkwaswa Mutòòke aci kumpàlà kwà Nzambì nànsa.

⁹⁸ Kaa, lekèlà ngàngatè nkwaswa mukesè wa butùmbi ewu kumpàlà kwà nkwaswa wa Kilistò ne ngiitabè Mashi Èndè.

Ncyèna ne cîndi ntwàla mu mabòkò àànyì emu to, Mukalenge.

Kakwèna mpokolo mukwàbo ûndi mumanyè
to,
Ànu Mashi a Yesù. (Ki cyònsò cîndi mumanyè
ncyôci aci.)

Ki dyànyi ditèkemenà dyònsò ne ciikishilu,
Ànu Mashi a Yesù.

⁹⁹ Kabyèna bìkèmesha to pàvwà Eddie Perronet... badyombòle misambu yèndè. Pàvwàye mwena Kilistò, mwena Kilistò wa lulamatu lwà menemene, kabàvwa baswè kusùmba misambu yèndè to. Dîngà ditùkù kwambayè ne: “Nèmfùndè mukwàbò, ne dîngà ditùkù...nebàwitàbè.” (Bwalu bantu bàvwa bàjînga cintu citàmbe kwikala cyà bwena leelù mu misambu yà Nzambi.) Dîngà ditùkù kuntwaku Nyumà Mwîmpè kumupyà, ki yèyè kwambula kasàlà ne kufùndayè ne:

Bònsò bàsekelelè bukolè bwà Dîna dyà Yesù!
Banjèlò bàponè mikookwela;
Lwàyi ne cifulu cyà butùmbi cyà bumfùmù,
Ne nùMwasè cifulu cyà butùmbi bu Mukalenge
wa bakalenge.

Bwalu pa Kilistò, Lubwebwe lushindàme,
mpàndi mwimàne;
Myaba mikwàbò yònsò nduntekà,
Myaba mikwàbò yònsò nduntekà.

¹⁰⁰ Nànsha ciikàle èkèleeziyà, nànsha ciikàle mulundà, nànsha ciikàle mulwishi, nànsha ciikàle ditùnga, nànsha ciikàle mabanji, nànsha ciikàle bupèlè, nànsha ciikàle cîmpè, anyi nànsha ciikàle cinyi, myaba mikwàbò yònsò nduntekà! Ki cintu cîmwèpelè ncyôci aci, ndekeelu wa byònsò nebiye. Kàdi:

...Kilistò, Lubwebwe lushindàme, mpàndi
mwimàne;
Myaba mikwàbò yònsò nduntekà. (Kanùpu aci
mwoyi to.)

¹⁰¹ Mònaayi! Tùyaayi mu Lewitiki 16, bwà túbalè paanyimà apu, lwà paanyimà menemene mu Bible amu mpindyewu, mu mikenji ya beena Lewi, bwà tùmone kaaba aka mu Lewitiki—Lewitiki nshapità wa 16. Nènku kubangila ku mvensà wa 14 wa nshapità wa 16. Kaa, mèmè ntu—ntu munangè kwangata dîbà dyàbûngi pa bintu ebi, bwà kubipàtula. Lewitiki mwinây... anyi Lewitiki 16.14.

Ne yèyè neàngatè ndambù wa mashi a cimpàngà cyà ngombe, ne àamyaminè ne munu wèndè pa nkwasà wa ngàsà! (Pa nkwasà wa ngàsà! Tàngilàayi, netùbwelè mu cyôci eci paanyimà pàà katanci)... lwà ku esètè;...

¹⁰² Kanùpu mwoyi mwakù awu “Lwà ku esètè” to! Yesù neáfuminè penyi? Ku esètè, mu ditutu dyà Butùmbi. D-ì-b-à

ditu dipàtukila penyi? Ku esètè. M-w-à-n-à neàpatukilè penyi? Ku esètè. Nkwasa wa ngàsà ùvwa musòmbèlè lwà penyi? Lwà ku esètè. Ndi munùsòmbèshe bònsò mùshindù ewu batàngile ku esètè bwà cinyi? Bwà cinyi? Cyoshelu cìdi lwà ku esètè. Netùcimònè paanyimà pàà katanci, mùshindù wùdìbi bilenga bilayà, nèncizòlè. Ndi mulòmbè bààbùngì bàmvwàku mwà kulòmba abu bwà kulwabò ne mabèji ne bikwàbò, bwà nwènu kupeta twartà etu mu katanci kakesè emu. Èyo:

... àamyaminè... lwà ku esètè; ne kumpàlà kwà nkwasà wa ngàsà neàmyaminè... mashi ne munu wèndè misangu mwandamutekète.

¹⁰³ Kaa, aci kí ncilenga anyi? “Misangu mwandamutekète lwà ku esètè.” Ncinyi ciinè aci? Bikondo Mwandamutekète byà Èkèleeziyà nebìikalè bibwikila kùdi Mashi. Àlèluuyàh! Mashi a Yesù Kilistò miikalè ànu makùmbàne mu wòwò, makèèlèlè, leelù, too ne kashidi, ne ku cikondo cyònsò, bwà kusùngila ngènzàmpèkaàtù yònsò, kwondopa mubèèdi yònsò, kufikisha cishimà cyònsò, cimanyinu cyònsò ku dyenzeka. “Misangu mwandamutekète,” kale wàwa mu Dipungila Dikùlukulu, bidimu cinunu ne nkàmà yinaayi ne makùmi citèèmà kumpàlà kwà Kilistò kulwaYè. Anji elàayi meeji pa bwalu abu! Cimfwànyì, “misangu mwandamutekète neyiikalè...”

Pashùshe neàshebeyè mbùji... mulàmbù wà mpèkaatù, wùdi bwà bantu awu, ne neàlwe ne mashi èndè pàmwè ne... mu cilàmbà cikùdika, bwà kwenza ne mashi awu mwàkenzàye ne mashi a cimpàngà cyà ngombe amu, ... kuàmyamina pa nkwasà wa ngàsà, ne kumpàlà kwà nkwasà wa ngàsà:

Ne neènzè difuta dyà cibawu bwà mwaba wà cijila, bwalu... bwà... bwà bukooyà bwà bânà bàà Izàlèlèlè, ne bwà matomboka àbò mu mpèkaatù yàbò yònsò: ne mùshindù awu ngwènzàye ne ntentà wa kusambakeena wa disangisha, udi musòmbèlè munkaci mwàbò udi munkaci mwà—mwà bukooyà bwàbò awu.

¹⁰⁴ Aci civwà ncinyi? “Nkwasa wa ngàsà.” Bìdi penyi mpindyewu? Nènkù munda mwà mushèète wà cipungidi amu mùvwa cinyi? Mikenji. Nènkù mikenji, kushipa díyì ditùma òmwèpelè kùvwa nkufwà kakùyi luse to. Kàdi bu mùvwàbi ne wèwè uvwa mwà kupeta luse, bivwa bikèngela bwà mashi kwikalawù pa cyoshelu. Bàvwa bàmyamina nkwasà wa ngàsà. Nènkù nkwasà wa ngàsà ki cyoshelu kùdi utwà binù ulòmba luse. Nzambi kanyishikù bwà twètù kucyùmusha mu èkèleeziyà yètù to, cyoshelu cyà cyena kale kùdi bantu mwà kutwà binù ne kusòka Nzambi bwà kulòmba luse aku. Ne kùdi luse lubanjìke, ne lùpòngoloka ludilekèlèlè lùumukila mu Mashi a Mukalenge Yesù. Mpindyewu, kàbìdi, ki luse ndwòlò alu. Ki nkwasà wa ngàsà nyèye awu.

¹⁰⁵ Kàdi nudi numòna mwómò emu ne, kàvwa nkwasà wa ngàsà to, bwalu kùvwa “mikenyi ne mikungulu ne méyi.” Kakwénakù mikenyi ne mikungulu ku luse to. Aci ncilumbulwidi.

¹⁰⁶ Tùbuululààyaaku mu Ekèsòòdè, nshapità wa 19 wa Ekèsòòdè ku mvensà wa 16. Ekèsòòdè, nshapità wa 19 wa Ekèsòòdè, nènku túbangilàayi ku mvensà wa 16 aku:

Nènku byàkenzeka . . .

Tèèlejàayi cidi . . . pààkabàndà Nzambi pa Mukùnà wà Sinaayi:

Nènku byàkenzeka mu ditùkù diisàtù mu dindà ne, kùvwa mikungulu . . . mikenyi, ne divuba dyà mupumbu pa mukùnà apu, ne díyi dyà mpungi dikolè dyà menemene; (Díyi dyà mpungi ncinyi? Mmwarkanjèlo.) mu mùshindù wà ne bantu bònso . . . (Tèèlejàayi!) . . . bantu bònso . . . bàvwà mu citùùdilu amu bààkazakala.

¹⁰⁷ “Cilumbulwidi’s!” Yoyöyò! Bàvwa bendè baye kuntwaku ne Nzambi mubàpèèshe ngàsà bwà kwenzabò lwendu, kàdi bóbò bàvwa balòmbe mikenji. Bóbò . . . Nzambi ùvwa muswè bwà kwikalabò kabàyi bàsungulujangana bilondeshile mangumba to; bóbò bàvwa baswè kwenzelapù dngumba, cintu kampànda cìvwàbò bafwànyìnèkù kukòkelanganapù, pamutù pàà kulonda ànu Nzambi cyanàànà ne kwikala ne mwoyi mu bukòòkeshi Bwendè, mu bukolè Bwendè. Ngàsà ùvwa mubàpetèshe mupròfetà, ngàsà ùvwa mufile difuta dyà cibawu (mwànà wa mùkòòkò), ngàsà ùvwa mubàpetèle bintu byònso ebi, kàdi nànsha nànku bóbò bààkajinga cilumbulwidi. Bàvwa bàkèbakù cintu kampànda cìvwàbò bóbò mwà kwenza.

¹⁰⁸ Nzambi kwambaYè ne: “Bàkùngwìjè bònso, Nèmbàmanyishè cidi bwalu. Nèmbàleejè cidi bwalu.” Balàayi! Tèèlejàayi! Ki díyi dyà mpungi kwikaladi dyènda dikola dyènda dikola mu mùshindù wà ne dyàkanyükusha buloba. Nudi numòna cidi cilumbulwidi’s. Mémè ncyèna muswè aci to. Mpèèshè mémè luse!

¹⁰⁹ [Mwanèètù Fred Sothmann udi wàmba ne: “Mwanèètù Branham?—Muf.] Nènku . . . [Mwanèètù Branham?”] Yé? [“Mufùndù wà ndekeelu wuwàbadi awu—awu ngwèpi?”] Cìvwa ng’Ekèsòòdè, nshapità wa—wa—wa 19 ku mvensà wa 16, Mwanèètù Fred. Ekèsòòdè 19.16.

¹¹⁰ Mpindyewu, mònaayaaku mvensà wa 17:

Nènku Mòsà wàkapàtula bantu mu citùùdilu bwà kutwìlanganabò ne . . . Nzambi; (Kaa, ekèlekèle! Mémè ndi muswè katwìlangana Nendè mu ditalala, kabiyi byà mùshindù awu to.) ne bààkiimana ku luseke lwà kwìnshì kwà mukùnà. (Kule menemene.)

¹¹¹ Vùlukàayi ne, mukùnà awu wùvwa ne mikàlù myela mu nyùngulukilu wawù amu. Nànsha ngombe yèyè ànu mudìdinge mukalengè ku mukùnà awu, bìvwa bikèngela kufwàye ànu

mwaba awu, kèna mwà kubwela mu Bwikadi bwà Nzambi to. Nènku Nzambi. . . “Ki Mòsà kulwayè ne bantu abu.”

112 Mpindyewu, mvensà wa 18, mvensà udi ulonda awu:

Ne mukùnà wà Sinaayi mujimà wùvwa mu . . . mwìshì, bwalu MUKALENGE wàkatùùlukapù mu kapyà: . . . (Mwikàle ànu wùtùuka mìshì ne wùteema kapyà bu cikùtù cyà kapyà.)

113 Wàkatùùluka mu cinyi? Kî mmu Butùmbi Bwèndè bwà Shekinàh to, kàdi mu cijji cicolè cyà dilumbulwisha Dyèndè.

. . . ne mwìshì wàwù wàkabànda byenzè bu mwìshì wà cikùtù cyà kapyà, ne mukùnà mujimà wàkakanka bikolè. (Mwanèètù, mèmè ncyèna muswè kwikala mwaba awu to!)

Ne pààkadilà dîyi dyà mpungi ntàntà mule, ne kwikaladi dyènda dinànguka dyènda dinànguka bikolè, Mòsà ùvwa wàkula, ne Nzambi ùmwandamwina ku dîyi dyà mukana. (Mòsà nguwwa wakula; kî mbantu to, bôbô bàvwa bàkanka cyàkàcyàkà.)

Nènku—nènku MUKALENGE wàkatùùluka pa mukùnà wà Sinaayi, ku lusongo lwà mukùnà: ne MUKALENGE wàkabùkila Mòsà bwà kubàndayè ku lusongo lwà mukùnà; ne Mòsà wàkabànda.

Ne MUKALENGE wàkambila Mòsà ne: Tùùlukà, ne ùdimwijè bantu, bwà kabùkadi bàalwa kuseemena pabwìpì ne MUKALENGE bwà kutàngila, ne bààbùngi bàà kùdìbo kabùkadi bàalwa kubùtuka.

114 [Katùpà kàà mukàbà wà mèyi munda mutupù—Muf.] Bantu basòmbe mu ndekeelu mwà èkèleeziyà biikàle bàseka muntu kampànda udi wakula mu myakulu, anyi ùja maja mu Nyumà; bwàbò's mbutùùke, bààpendi Nyumà Mwîmpè, batwìbwe citampì bwà kashidi! “Ewu yònsò udi wamba dîyi dibì bwà Nyumà Mwîmpè kààdyàkufwìdiiwbakù luse to mu eci cikondo, anyi mu cikondo cicilwalwà.” KùCitàngidikù to! Shààla kule naaCì anyi Citàbùùjè!

115 Mbîmpè tùshiyàayi Mufùndu awu. Nùtungunukàayi ne kucibala, citùpà cyàwù, nùmonè cidi Nzambi mwambè. Ki bantu kwambabò ne: “Kaa, Mòsà, akùlà wèwè. Nzambi kààkulukù kàbìdì to! Tudi tujinga mpindyewu ne katùvwakù ne cyà kwikala balòmbe ciinè eci to.” Nwamònu anyi? “Akùlàku wèwè neetù, Mòsà. Nzambi Yèyè mwakùle, twètù bònsò tufwàfwa.” Nwamònu's, Nzambi ùvwa mwenzè difuta dyà cibawu.

116 Mpindyewu: “Dîyi dyà ku Nkwasa wa butùmbi.” Mònaayi mu Nkwasa wa butùmbi ewu, “kumpàlà kwà Nkwasa wa butùmbi kùvwa mitootò mwandamutekète,” Dîyi dyà mitootò. “Mèyi,” nudi numòna's. Kùvwa àbùngì mu Bwàkabuulwibwà 4 emu, anyi 5, mutùdì tusangana ne: “Ne ku Nkwasa wa butùmbi

kúvwa kùpàtuka mikenyi, mikungulu, ne mēyi.” Kadiyi diyi *dimwèpelè* to; “mēyi,” ku búngi. Cívwa ncinyi? Nzambi wàkula ne èkèleeziyà, ùDileejila mu Nyumà mwandamutekète ayi. Pàdi mulaaba mulelèlè wa Nzambi wàkula, n’Díyi dyà mukana dyà Nzambi! KuDibènga nkuumusha kwà citèekedi cyà mwèndù. Nwamònu anyi? “Mēyi,” Díyi dyà Bikondo Mwandamutekète byà Èkèleeziyà (lwà mu ditumba emu), mēyi àkula ne mikungulu ne mikenyi.

117 Leelù ewu ngukaadibo ne: “Èè, twètù katùtu twitabuuja bàmba ‘ifernò’ mu cyambilu to.” Kaa, luse wè! Kacyakacya! Hmm! Bidi bitùkèngela balùmè bàà Nzambi, balùmè bàdì kabàyi bàshàala balamè bwalu kabàyi bàbwàmbila bantu to!

118 Mpindyewu, muntu yònsò kèna mwà kwikala muyiishi to, kàdi wèwè udi ne díyi dyà mukana’s. Ne pawikalà kùyi mwà kuyiisha bantu diyiisha to. . . Pawikalà muyiishi, udi mubiikidiibwe bwà kubànda mu cyambilu bwà kuyiisha. Wèwè kùyi mubiikidiibwe to, udi ànu muyiishi, kàdi yishà bantu diyiisha ku *nsòmbelu* webè. Diyiisha dyèbè diikalè dyà ku *nsòmbelu* webè, nènku ki cidì Díyi dyà Nzambi dyàfwishà bundù aba bàdì bàDibènga. Bàdi bàmba ne: “Muntu nànsha umwe kèna mwà kutwà munu pa nsombelu wa mulùme awu anyi mukàjì awu to. Ùdi ne kalolo, mu nsòmbelu. . . Yèyè. . . Bu ne kúvwakù mulùme wa Nzambi, mmulùme awu anyi mmukàjì awu.” Nwamònu’s, yishà mayiisha ku nsòmbelu webè. Kùteeci bwà kuàyiisha pawikalà kùyi mubiikidiibwe bwà kwikala muyiishi to; neùbwejakajè byònsò’s, wèwè mwine, ubivwija cimbòndambònda, ne neùbwejè bantu mu bwalu bwà mwandanjinga, ne kwàkumanya. . . Èè, kàbidì, ne—neùbàbùtwishè pamwè ne wèwè mwine. Yishà diyiisha dyèbè ànu ku nsòmbelu webè!

119 Muyiishi mmubiikidiibwe bwà kuyiisha dyèndè, ne kudiyiishila kàbidì ku nsòmbelu wèndè. Wèwè kùyi mwà kuCiyiishila ku nsòmbelu webè, dîbà adi imànyika diCiyiisha. Kàdi udi ne cyà kuyiishila mayiisha èbè ku nsòmbelu webè.

120 Èyo, apa pàvwa “mēyi.” Kaa, mùshindù mwinè wùdibi bitùkèngela mu Jeffersonville binunu byà mēyi maleeja mu nsòmbelu’s wè, mukungulu wà Nzambi wùkungwila mu kalolo ne cijila, bukezùke, nsòmbelu yà kayi mikooyike to, yèndakana pa buloba leelù ewu, kàyi ne kalèma to. Èyowà’s, mukalenge, beena Kilistò balelèlè, aci mmukungulu wà dilwisha naawù mwena lukunà. Dyabùlù kèna ùcyùka mùdì mwà kutuuta mikòbolò mikolè amu to; dyabùlù kèna ùcyùka mùdì mwà kutùpika anyi mùdì mwà kwenza *bikampànda* anyi kwela mbilà mikolè amu to. Kàdi cidì citàpa dyabùlù ku mwoyi nkumòna nsòmbelu mujidila, wa cijila mudilàmbùle kùdì Nzambi awu; umwamba cintu kanà cyònsò eci, umutwà dînà kanà dyònsò, yèyè ànu ne kalolo ne mwèndè mwònsò ne mutùngùnùke ànu

ne kuya. Kaa, ekèlekèlè! Aci's cidi cimwimansha ànu kwàka, ki mukungulu wùdi wünyükushà dyabùlù ngwòwò awu.

¹²¹ Mbyenzè ànu bu ne: “Èè,” mùdi wamba, “bu yèyè mwà kuyiishakù bu Billy Graham anyi Oral Roberts, anyi bu muntu kampànda, mwakudi munène wa bwenzeji, mmufwànyine kwikala . . .” Kaa, to! Míngà misangu dyabùlù's ùtu ànu ùseka abi. Yèyè kàtu ùtàmba kutùma ntèmà ku abi to mubìmòne bu kakùyi bwalu. Udi upeta tèdòlòjì—tèdòlji yònsò ùvwà ukèba ne dilongeshiibwa dyònsò dyà mu sèminèrè adi, kàdi dyabùlù ùdi ùshààla musòmbe ànu pòlàà mwikàle ùbìseka. Kàdi pàdiye ùmòna Mwoyi awu!

¹²² Tàngilàayi bayiidi abu kuntu kwàka, mwànà mubùlùke uvwa ditùkù adi ne disaamà dyà ciseki awu, bàmba ne: “Pàtukà munda mwèndè, démon! Pàtukà munda mwèndè, démon! Pàtukà munda mwèndè, démon!”

¹²³ Démon awu musòmbe mwab'awu, kwambayè ne: “Mpindyewu, kanwènàku munkacì mwà kudifwisha nwènu biinè bundù anyi? Mpindyewu, nudi numòna cinùdi nwenza aci anyi? Yesù mmunwàmbìle, mMunùtùme ne mudimu, bwà kulwa kungiiyata. Nànsha umwe wa kunùdi kàyi mwà kucyènza to.”

¹²⁴ Kàdi, mwanèètù, pàdìbo bàMumòna ùlwa, Kampànda ùlwa wènda ne ditalala dyònsò. Uh-huh. Kaa, ekèlekèlè! Kabìvwa bìkèngela Àmbè cintu nànsha cimwè to. Démon awu ùkaavwa mumbè mukwàcike ne bwòwà ànu apu. Úvwa mumanyè ne bìvwa bìkèngela bwà kuumukayè, cyà bushùwà, bwalu ki Mwoyi wùlwalwà awu; kacìyi ànu diyiisha to, kàdi Mwoyi. Yèyè ne: “Pàtukà munda mwèndè.” Kaa, ekèlekèlè! Aci's cyàkenza bwalu! Ne ditalala dyònsò; Yèyè ùvwa mumanyè civwàYe wàmba, Úvwa mumanyè civwàYe wènza.

¹²⁵ Mpindyewu: “Mèyi,” mèyi a mpungi mwandamutekète awu, àvwa mmèyi a mìtootò mwandamutekète, baamìsànjeelà mwandamutekète. Kàdi mpindyewu tàngilàayi apa:

. . . ne . . . myèndù mwandamutekète . . . kumpàlà kwà nkwasà wa butùmbi, yìdi Nyumà mwandamutekète yà Nzambi.

¹²⁶ “Myèndù mwandamutekète.” Tùzòlèku ndambù kaaba aka, Nkwasa wa butùmbi, mwaba wà cijila, disangisha. Nènku ànu apa ki pàvwà (ùmwè, ibìdi, isàtù, inaayi, itaanu, isambòmbò, mwandamutekète) mìtootò mwandamutekète, myèndù mwandamutekète, baamìsànjeelà mwandamutekète, Nyumà mwandamutekète; kabiyi menemene byùmvwija ne Nzambi ùdi mu Nyumà mwandamutekète to, kàdi “mamwèneshiibwa mwandamutekète a Nyumà Mwímpè umwèumwè awu.”

¹²⁷ Nyumà Mwímpè ùdi penyì? Ku Nkwasa wa butùmbi eku, mwikàle ùkenkesha mu cikondo cyònsò cyà èkèleeziyà. Eci cikondo cyà èkèleeziyà cidi cidìleejila mu mùshindù ewu, mèyi a Nzambi, Yesù Kìlistò umwèumwè awu makèèlèlè,

leelù, too ne kashidi. Nwamònu's, mwandamutekète, kùwva “mèyi.” “Ne myëndù mwandamutekète yiteema kapyà,” Nyumà mwandamutekète, “yìdi Nyumà mwandamutekète yà Nzambi.”

128 Nudi bavùlùke ne kùkaadi maadyàlumingu ndambù àtùdi bafikèku, dibwe dinènè dya mbongò adi anyi? Kàdi ndisonga mu mishindù yàbúngi mishilèshilàngàne bwà kuleeja kapyà ne makènkè byùmukila kudìdi. Ki mùshindù ngwòwò awu's: “Yesù Kilstò ùdi cibangidilu cyà bufùki bwà Nzambi,” Bwàkabuulwibwà 1. Ncyà bushùwà anyi? Nènku Nzambi wàkafùkiibwà dībà kaayi? Yèyè ùdi cibangidilu cyà bufùki bwà Nzambi. Ne Nzambi ngwa Cyendèlèlè. Ncyà bushùwà anyi? Kàdi pàakafùkiibwà Nzambi . . . mpààkiimiciibwà mwànà mukesè munda mwà maamù, virgò. Ne maamù awu wàkabanga kwibaka tubùlù twà mashi etu munda mwèndè bwà kulelayè mwànà mukesè ewu, mwine uvwa cibangidilu cyà bufùki bwà Nzambi awu, “Bwalu Nzambi wàkavwijiibwà mubidi ne wàkasombela munkaci mwètù, ne wàkalwa *Èmanùwèlè*: ‘Nzambi neetù,’ cibangidilu cyà bufùki bwà Nzambi.”

129 Pashiishe mu Cilengà cinène cyàkafùmà ku lupwishi aci . . . bwalu Yèyè ùwva mwenza ne lupwishi. Ncyà bushùwà anyi? Yèyè ùwva ùdya byàkudya ànu mùndi mèmè ndya emu, Ùwva ùdya byàkudya ànu mùdi wèwè udyà amu. Mbwenza kwamba ne, lupwishi lwà mubidi, Yèyè kulwa kàlisyumù, binshidimba, mpiitùloolù, bukènkè bwà mu cibwàshibwàshì, kàdi munda Mwèndè mùwva musòmbèle Bukènkè bwà Cyendèlèlè. Kabyèna bikèmesha to pàakambilà beena meeji abu Mùtootò awu ne: “Tùlombòlèku ku Bukènkè Bwèbè bupwàngàne.”

130 Bàwva bàleeja ànu Bukènkè bwà Bukènkè bùmwèpelè bupwàngàne. Nènku ki Yèyè uvwa mwaba awu awu, Bukènkè bupwàngàne bwà Nzambi, cibangidilu cyà bufùki bwà Nzambi. Mpindyewu, mwòmò amu Yèyè ùwva . . .

131 Mmunyi mùvwàYe mwà kuDìleeja kùdi mìtootò Yèndè yà pa buloba, paanyimà pàà beena meeji abu bamanè kuMumòna mu Dyulu, ne balwè nyumà mikwàcishi pa buloba apa? “Wàkatàpiibwà mpùtá (Dibwe dinènè dya mbongò adi, disonga) bwà dishipa dyètù dya mikenji, muzaajìbwe bwà bubì bwètù, dinyooka dya ditalala dyètù dyàkapòna pambidi Pèndè, ku mibùndàbùndà Yèndè twàkondopiibwà.” Divwa dyenza cinyi? Dìdìleeja!

132 Muntu kanà yònsò udi wàmba mùdiye musadidi wa Nzambi, mwikàle ùvila dyondopa dya kùdi Nzambi ne bukolè Bwèndè, kèna ùpetela bukènkè bwèndè ku Dibwe dya mbongò adi to, kèna ùpetela bukènkè bwèndè ku Nkwasa wa butùmbi awu to. Bwalu Dyòdi didi dìMuleejila Yèyè umwèumwè awu makèlèlèlè, leelù, too ne kashidi mu mìtootò mwandamutekète ayi ne mu Bikondo Mwandamutekète byà Èkèleeziyà.

133 Kaa, butumbi kùdi Nzambi's wè! Ndi ngeela meeji ne mbyàkàne bwà mwambi kukuukwilayè Nzambi mwikàle ku cyambilu, ne disàkidila ne ditumbisha ne luumù ne bukolè. Kaa, mùshindù mwinè wùdibi bilelèlà, wùdibi ànu bitùpisha musùùkà wànyì ne disànka mu mùshindù wà ne ndi ndyùmva ànu bu mufwànyine kwela mbilà mikolè, ne kunyeemakana ne kutùpika kuya muulu ne mwànyì mwònsò, bwalu kùdi Cintu kampànda munda mwànyì cidì cinshintùlùle cinguumùshe ku cìmvwà. Ncyèna cìvwà cikèngelà bwà mèmè kwikala to, ne ncyèna cìndì muswè kwikala to, kàdi ndi mumanyè ne ndi mushintùlùke muumùke ku cìmvwà kale wàwa. Cintu kampànda ncyenzèke, cintu kampànda ncyenzèke!

134 Nènku kwimana apa ne kumòna Dìyì dyà Cyendèlèlèlè didi dicimùne cipeepèlè cyònsò cyà mvùla edi! Pààkateetàbo bwà kwosha Bibles ne bikwàbò, Yèyè's wàkatungunuka ne kupeepa ànu bu ne kakùvwa bwalu, bwalu mMwambè ne: "Maulu ne buloba nebijiminè, kàdi Dìyì Dyànyì kadyàkujiminakù to."

135 Mwab'ewu pabwìpì ne mu Chicago emu mpindyewu, ne Bible kampànda—kampànda ùdi ùsanganyibwa pa cyambilu cyà èkèleeziyà. Kale menemene kumpàlà kwà Mvità yà Kumpàlà yà Buloba bujimà, mpandanjila kampànda wàkamupeta ne muntu kampànda mukùdimùne mucìma, ne ùvwa muswè kupèèsha mpandanjila awu Bible wendè, kwambayè ne: "Ncyèna mwà kukupèèsha ewu nùnkù to, mààmù nguvwa mumpèèshe ewu nùnkù." Yèyè ne: "Mèmè, pàngìikalà mwalùkile kwànyì, nènkutùminè wa cyanànà."

136 Kwalukilayè dyàmwàmwà dyà mbù kàdi màzùwà kampànda a mwinshì mwà màyì a beena Àlèmanyè kutaayishayè màzùwà a—a màyì awu. Kabààkapeta nànsha kasùnsukilà kààwù to. Kàdi bidimu bibìdì bimanè kupìta, kwìnshì menemene lwà ku mwelelu kwà mbù, kumònabò kashèètè kalèlème pa màyì. Bàmwè kwelabò meeji ne cìvwa cìfwànyine kwikala cintu kampànda cìvwà cidìnè mu màyì, ki kupàtulabò kashèètè aku ne kukàkàngulabò, bantu bàbìdì mbàvwà bènda bèndakana kuntwaku. Kàdi mwòmò amu, cintu cìmwèpelè cìvwà cipàndùkekù, mùvwa Bible awu uvwayè ùtùmina mpandanjila awu. Mmutèeka pa cyambilu pabwìpì ne Chicago apa leelù ewu, mu èkèleeziyà kampànda wa ba-Méthodistes. "Maulu ne buloba nebijiminè, kàdi Dìyì Dyànyì kadyàkujiminakù to."

137 Mu cikondo cyà dipaasalala dyà màyì mùneemu emu, mu cidimu cyà 1937, kaèkèleeziyà kakesè kàà kale aka, pàvwàku panshì bitoci ne bikwàbò bìvwàmu abi, tuvwa twendela kumutù kwàkù mwaba ewu mu—mu bwàtù bwà diita. Màyì àvwa mabànde. Nènku, èè, dilòòlò adi pàngààkamanà kuyiisha Èvànjeeliyò ne mushiye Bible wànyì mutèeka pa cyambilu apu pàngààkalukilà kumbèlu; mwikàle ndyànjlila kwamba ne dipaasalala dyà màyì adi òvwa mwà kulwa, mèmè kwamba ne:

“Ndi mumumòne ùpima mètres àsambòmbò ne citùpà kumutù kwà mùsèsù wà Spring Street eku.”

138 Mwanèètù wa kale Jim Wiseheart ne bakwàbò kunsekabò. Udi uvùlùke aci anyi, Mwanèètù George? Mémè ne . . . Yèyè—yèyè ne: “Kaa, Billy, mu cidimu cyà ’84’s bivwa ànu bu ne centimètres dikùmi ne yìnaayi mu mùsèsù wà Spring Street.”

139 Mémè ne: “Mémè ndi mumòne muntu ùpweka ùfùmina mu maulu, ne wàngata mucì wà dipima naawù ne ùwása mu mùsèsù wà Spring Steet mwàmwa, wàmba ne mmètres àsambòmbò ne citùpà.”

Yèyè ne: “Cyùdì udi ànu musalùke cyanààna.”

Mémè ne: “Ncyèna musalùke to! Cidi ng’EMU MMÙDÌ MUKALENGE WÀMBA!”

140 Nùbàkonkàayi ne mmètres bùngì kaayi kumutù kwà mùsèsù wà Spring Street aku. Mètres àsambòmbò ne citùpà jaa—jaaaja! Menemene.

141 Kàdi Bible wa kale mwaba wùvwàye muyiishìbwe dilòdòlò adi awu. . . Mvùla kubangayè kulòka, dipaasalala dyà mâyi kubweladi myaba yònsò ne bikwàbò, ne èkèleeziyà wa kale ewu. . . Nkwasa kubàndayi muulu e kukatwàyi too ne mu pàlàfò, Bible kubàndayè buludì too ne mu pàlàfò amu, dipaasalala diyè mu myaba yònsò ne mâyi mamubàndishe. Cyambilu kubàndaci buludì. Kupwekabi; ne nkwasa ne nkwasa kwalukila e kusòmbayi mu kaaba ànu kàmwèkàmwè aku, ne Bible kwalukila e kusòmba pa kaaba ànu kàmwèkàmwè aku, ne mâyi ònsò awu, ne mucikàle ànu mubuulula, nshapità umwèumwè awu pa kaaba ànu kàmwèkàmwè aku.

142 “Maulu ne buloba nebìjiminè, kàdi Dìyì Dyànyì kadyàdyàkujìminakù to.”

143 Mùshindù mwinè wàkalèlemà Bible awu mu mâyi a mukèlè awu munda mwà bidimu bìbìdì kabìyikù nànsha binyanga myakù yìvwà mifùndaMù ayi’s wè! Mèyi a Nzambi mmalelèlà. Amen.

144 Ndi muvùlùke paanyimà pàà cyòci aci, Mwanèètù mukùlumpè Jim Wiseheart wàkasànkishiibwa bikolè bwà cyòci aci, musangu wònsò wùvwàye ùpeta dikùyila pa dibòkò dyèndè. . . Wàkapeta disaamà dyà mùshindù kampànda pààkaavwàye ne bidimu bu makùmi mwandamutekètè ne bitaanu, kupetayè binyòka. Dikùyila adi òvwà òvwà dimusaamisha *apa*, ùvwà ùnyeema ùkangata Bible awu, ùmubuulula, ùmutèèka mwaba awu, dikùyila dikwàbò lwà kwìnshì *eku*. Mémè kufika kuntwaku dínghà ditùkù ne yèyè ùvwà ne Bibles bùngì cyanààna pambidi mu mùshindù wà ncìyikù mwà kumòna Mwanèètù Jim mwinè to, ùvwà ne Bibles bùngì cyanààna pambidi pajimà! Yèyè ne: “Mmulayi wà Nzambi!” Ki cyòci aci’s.

145 “Maulu ne buloba nebìjiminè, kàdi Dìyi Dyànyì kadyàdyàkujìminaku to.”

146 Ndi mvùluka ne mukùlumpè awu uvwa ne ciibidilu cyà kulwa mwaba ewu bwà kummòna. Ncyèna ngeela meeji ne muntu nànsha umwe wa mu fàmiyè wèndè ùdi kaaba aka to. Nènku mvwà ne ciibidilu cyà kumukwàcishakù ndambù, nudi bamanyè’s, ku musangu ne ku musangu, bwalu ùkaavwa mukùlàkaji ne ùvwa ne dijinga dyà mfrangà ne ùvwa ùlwa. Kwambayè... Dìngà ditùkù mvwà mwasè lwendu nya ku Canada, dyà nkùdimuka anyi, mpàtuka ànu mu ciibi cyà lupangu nùnkù, ki yèyè ne: “Billy, mwanàanyi wa balùme, òmwè dyà ku matùkù aa newàlukilè ne Tatwèbè-mukwàbò Jim kààkwikala kàbìdi wa ùbànda ùpweka mu njila ewu to.” Ki wùvwà musangu wà ndekeelu’s. Pàmvwà mu Canada apu, mèmè kupeta mukenji wa ku nshinga; wàkafwà ànu mwaba awu mene mu mabòkò a Mwanèètù wa bakàji Morgan. Wàkapeta disaamà dyà mwoyi mwimàne, ne bààkaya nendè lubilu ku lùpitaadi, kubàndulukayè e kumutàngila kàdi ki kutùulayè nkìnda’s.

147 Mwanèètù wa bakàji Margie, udi kaaba aka mu dindà emu anyi? Pa ciibidilu yèyè ùtu ùlwa mwab’ewu. Nwènù bònsò nudi bamanyè. Dimwè dyà ku màsaamà manènè a kànsèrè mu Lùpitaadi lwà ba-Baptistes mwàmwa mwàkamubalàbo bu mufwè kùkaavwa bidimu dikùmi ne mwandamutekète, mu Clinique Médicale pa mikàndà yà bibùcìlu ayi ne, yèyè “mmufwè disaamà dyà kànsèrè,” kùkaavwa bidimu dikùmi ne mwandamutekète. Mmusòmbèle mu Mùsèèsù wà Knobloch ku nombà 412, ùkwàta mudimu wà buumungàngà mu lùpitaadi alu mùneemu emu. Kaa, ngàsà udi ukèmesha, mùshindù mwine wùdi dìyi adi dyà kalolo’s wè!

148 Jim Tom Roberson, mwakwidyanganyi mu Louisville, ne twètù bònsò tudi bamanyè Jim Tom awu. Ki cyàkamufikishà ku diitabuuja Mukenji ewu, wàkaya kuntwaku. Ne tatwèndè ngumwe wa ku bamfùmù bàà cisùmbù aci mu lùpitaadi alu. Wàkaya e kukenketayè bwalu abu, bwà kujandula ní ncyà bushùwà ne mukàji awu ùvwa ùpùnga ne lufù lwà kànsèrè, bamulekèle ne bamupingàje kumbèlu, ne beelè meeji ku dyàbò dimanya ne ùkaavwa mumanè kufwà. Ki tatwèndè kucikenketayè munda ne paanyimà, kàdi mbulelèlè. Ki Jim Tom kwambayè ne: “Mmafi; mmusòmbè ànu mùneemu emu patùdi twakulangana apa, mèmè ndi mwà kuya neebè kùdiye.”

149 Kaa, kaa, Yèyè—Yèyè’s n’Nzambì mulelèlè, kí mmwòmò anyi? Mèmè ndi ne disànka dyàbùngì mùdiYe mwà kutàngila bilèmà byètù kàyi ùbimòna, kàdi wèwè? Ki cidi citùfikisha ku diMunanga ne mwoyi wètù wònsò.

150 Nkwasa yà butùmbi, mikenyi... Cinyi? “Myèndù mwandamutekète,” anyi myèndù, anyi mìtootò mwandamutekète, yibìkidiibwa ne “Nyumà mwandamutekète,”

yùmvwija mamwèneshiibw- . . . mamwèneshiibwa mwandamutekète a Nyumà Mwímpè a Bikondo Mwandamutekète byà Èkèleeziyà mu nkwasà yà ngàsà mwandamutekète bwà bantu. S'ki yòyi eyi: nkwasà yà ngàsà mwandamutekète, nkwasà mwandamutekète, èkèleeziyà mwandamutekète, mìtootò mwandamutekète, mamwèneshiibwa mwandamutekète, Nyumà mwandamutekète, myëndù mwandamutekète. Kaa, ekèlekèle, mùshindù mwinè wùdi Nzambi mupwàngàne menemene's wè! Yònsò . . .

¹⁵¹ Bitèèka muntwamu mu bulondyanganyi bwà nombà yà Bible; bulondyanganyi bwà nombà yà Bible ki cintu cidi citàmbe kwikala cipwàngàne cidiku pa buloba. Kwèna mwà kupeta cilèmà nànsha cimwè kuumukila ànu ku Genèsè too ne ku Bwàkabuulwibwà to, mu bulondyanganyi bwà nombà yà Bible. Kakwènakù mukàndà mukwàbò wà mifündù yà kubala mùdi kùyi mwà kupeta cilèma kumpàlà kwà kubala mvensà yisàtù to; kàdi kî mmu Bi- . . .

¹⁵² Mbateetè munda mwà bidimu bipite pa nkàmà yìbìdì bwà kusàkidila katùpà nànsha kàmwè kàa cyambilu ku Disambila dyà Mukalenge, anyi kuumushilaKù kàmwepelè. Ndipwàngàne! Kwèna kàbìdì mwà kusàkidila anyi kuKùùmushila to. Bàvwa bèèla meeji ne mbafwànyine kulengejakù disambila adi ndambù. Nebàteetè kufunyikaMù *cikampànda*, ne kwelaMù *cikansanga*, anyi kuumushaMù *cikankènga*; kabyèna ànu bìmpè to. Nwamònu's, nDipwàngàne! Njila yònsò yà Nzambi mmipwàngàne.

¹⁵³ Ki bwà cinyi twètù katwèna bapwàngàne to, kàdi Yèyè mmwambè ne: “Ikàlaayi bapwàngàne mùdi Taatù wenù mu Dyulu mupwàngàne.” Tudi mwà kuciikala munyi? Ku Mashì a mushinga mukolè a Yesù Kilistò, bwà kudìpwà twètù biinè mwoyi ne kwikala ne mwoyi ànu munda Mwèndè. Ki bwalu mbwòbù abu. Mùshindù mwinè wùdiWu à mushinga's wè!

¹⁵⁴ Èyo, mvensà mwi6 mpindyewu bu twètù mwà kubwelamù. “Myëndù mwandamutekète.”

Ne kumpàlà kwà nkwasà wa butùmbi . . . kùvwa mbù wa lumwènù mufwàngàne ne ntàlatalà: ne munkaci mwà nkwasà wa butùmbi, ne mu nyùngulukilu wa nkwasà wa butùmbi, mùvwa nyama yinaayi myùle tètè ne mèsù kumpàlà ne paanyimà. (Kaa, ekèlekèle! Tàngilàayi eci!) . . . nyama myùle tètè ne mèsù—myùle tètè ne mèsù kumpàlà ne paanyim- . . . (Mpindyewu, indilaayi.) . . . kumpàlà kwà nkwasà wa butumbi . . . kùvwa mbù wa lumwènù mufwàngàne ne ntàlatalà: ne munkaci mwà nkwasà wa butùmbi, mùvwa yinaayi . . . ne mu nyùngulukilu . . . nkwasà wa butùmbi, mùvwa nyama yinaayi myùle tètè ne mèsù kumpàlà ne paanyimà.

155 Mpindyewu, “mbû wa lumwènu.” Nwènu bìikalà mwà... Ndi... Eci kaciyèna citàmbe kwikala cimfwànyi kaaba aka to, kàdi ndi muswè kukùpula eci bwà katanci kakesè. Mpindyewu, mpindyewu tudi baswè ànu kulongakù mwab’ewu kakesè cyanààna. Mbû wa lumwènu awu mmufwànyikija mu ntempèlù wa kale, bwalu Mòsà ùvwa mupetè diyì dimutùmina kùdi Nzambi bwà kwibaka ntempèlù pa buloba mùvwàye muMumòne mu maulu amu. Bantu bònsò mbamanyè aci. Èyo.

156 Nènku ngànji ànu nzolè ndambù kaaba aka mpindyewu, ngamba ne, eci ncivwà mushèètè wà cipungidi wà Dipungila Dikùlukulu, èyo, cintu cidì cilondà, civwà cibìikidiibwà ne “Mwaba mutàmbe cijila.” Ne mwaba wùvwà wùlondà wùvwa ncyoshelu, wùvwà wùbìikidiibwà ne “mmwaba wà cijila.” Ne kumpàlà mene kwà *apa* kùvwa “mbû wa cyamù cyà kabanda,” mùdiye ubìikidiibwa. Mu ngaakwilù mukwàbò, wùvwa mmwaba wùvwà mulàmbù...milàmbù yivwa yisukudiibwa—yivwa yisukudiibwa *apa* kumpàlà kwà kwitabuujiibwayì...ku cyoshelu; ku cyoshelu cyà cyamù cyà kabanda, anyì cyoshelu cyà cyamù cyà mitakù kùvwàbo bòshila mulàmbù aku.

157 Mpindyewu, tudi baswè kutàngila eci mpindyewu mwaba wùvwà...mwaba wùvwàci awu. Nènku, mpindyewu—mpindyewu, mu mbû wa lumwènu ewu...ùvwa kumpàlà kwà Nkwasa wa butùmbi ne kumpàlà kwà mwaba wa cijila. Ànu...Mpindyewu vùlukàayi ne, bitèèkedi byà myèndù mwandamutekète abi bìvwa bitèèkiibwe *apa* mùshindù ewu, ne kulwa dilòngò kampànda dyà cyowelu. Nwamònu anyi? Mpindyewu, ki wùdi wùfidilà bukènkè mwaba wà cijila too ne *apa*. Mpindyewu, pawìkalà...to, kabyèna bikèngela bwà wèwè kufùnda eci to ànu pèbè muswè kucifùnda, kàdi aci cidì... Ndi ne cintu kampànda cikwàbò mwab’ewu cìmvwà mudizòlèle, cìndi njinga kunùtwàdila. Kàdi mpindyewu, nudi numòna’s, eci civwa cibìikidiibwa ne mbû wa cyamù cyà kabanda; kacivwa ànu bunène abu menemene to, civwa citèèkiibwe mu mùshindù kampànda bilondèshile mwaba mu ntempèlù. Civwa citèèkiibwe bu mu mùshindù *ewu* *apa* nùku, civwa mmbû wa cyamù cyà kabanda, civwa ndilòngò dyà cyowelu dyaena ne cyamù cyà kabanda mùvwàbo bàsukwila milàmbù. Kumpàlà kwà milàmbù kwoshiibwayì anyì kwitabuujiibwayì, bìvwa bikèngela kusukudiibwayì.

158 Kaa, aci kì ncifwànyìnekù kwenza diyiisha mpindyewu mene anyì, wèwè Ngàngàbukà? Kaa, ekèlekèle! Aci kì ncifwànyìnekù—aci kì ncifwànyìnekù ànu... Cìdi ànu cìdenga’s, “bàyisukula.” Kumpàlà kwà mulàmbù kanà wònsò kwitabuujiibwawù kùdi Nzambi, bìdi bikèngela kwanji kusukudiibwawù. Bishi? Kì mmu disaluka nànsha, kàdi musukula ku Dìyì. Mpindyewu, tudi bafwànyine kwalukila cyànyimà bwà kafika mwaba wùdi laabi wa beena Yudà ewu...pàmvwà nyiisha diyiisha dyà màyi a ditàpulula adi, ngombe mukunze wa lukùngùlù, màyi

àvwà malama awu, àvwàbo bènza mâyi a ditàpulula. Nèngu kumpàlà kwà twètù kufikakù kùdi Nzambi ne diitabuuja dilelèlà, bikèngela twǎnji kulwila ku mâyi a ditàpulula. Èyowà's, mukalenge. Bikèngela ùlwilè ku cinyi? Ku Dìyi!

¹⁵⁹ Kaa, ngǎnji mmonèbi ní ndi mwà kwakula ànu mu mùshindù wà ne newikalè. . . muntu yònsò neàcìpetè. Mpindyewu, vwàla ngeelèlù webè wa meeji wa nyumà awu. Umùshà kafulu kàà cijèngù kàà mvità aku kàdi ùvwalè ngeelèlù webè wa meeji wa nyumà mpindyewu, bwalu ki cintu kampàndà cìlwalwà eci. “Ùsukudiibwa kumpàlà kwà kwitabiibwawù ku cyoshelu,” wùdi ne cyà kwanji kusukudiibwa mu mâyi a ditàpulula.

¹⁶⁰ Mpindyewu, buulùlaayi pamwè naanyi ne lùkàsà lwònsò mu Efèsò 5, lamà ànu kaaba kèèbe aku kàdi wàlukilè cyànyimà, mabèji makesè cyanàànà paanyimà, mu Efèsò nshapità mwi5 ku mvnsà wa 26:

Bwà wàmòna mwà kumujidila ne kumukezula. . .
(Èkèleeziyà, ngudiyè wàmba awu.)

¹⁶¹ Nwamònu's, mpindyewu, ngǎnji ngàalukilèbi cyànyimà ndambù kupità apu. Alùkilaayi lwà ku mvnsà wa 21, panùcidi nukèba apu:

Nùkookelanganè muntu kùdi mukwèndè mu diciina
dyà Nzambi.

¹⁶² “Nùkookelanganè.” Disangisha, kòòkelàayi mpaasàtà wenù. Mpaasàtà, kòòkelà disangisha dyèbè. Kaadingumba kakesè kòkò kajuukè, kwikadi anyi ku elu luseke anyi ku lukwàbò to, kòòkelà disangisha dijimà. Disangisha, nwènù babangè kaadingumba kampànda, kòòkelàayi mpaasàtà wenù mu diciinà dyà Nzambi. Nwamònu anyi? Kaa, mwanèètù! Hmm!

Bakàji, kòòkelà bàyeebè sungasunga, bu udi ukòòkelà
Mukalenge, (Bwalu yéyè mmukalenge webè.)

¹⁶³ Mbanganyi bàdi bamanyè nàngu, nwènù bakàji? Ncyà bushùwà menemene. Bible ngudi mwambè nàngu ku cibangidilu. Cìcidi ànu mùshindù wùmwèwùmwè awu.

Bakàji, kòòkelà bàyeebè sungasunga, bu udi ukòòkelà
Mukalenge.

Bwalu mulùme ùdi mutù wà mukàji, ànu mùdi Kilistò
mwikàle mutù wà èkèleeziyà; ne yéyè mmusùngidi wa
mubidi awu.

¹⁶⁴ Ki mùdi kàbìdi mulùme. Nwènù bònsò nudi bamanyè aci, nwènù bàdi mu dibàkà ne bakùlumpè, anyi bânà bàkaadiku bakolè bwà kumanya mùshindù wà nsòmbelu abu. Èyo.

. . . bu udi ukòòkelà Mukalenge.

Bwalu mulùme ùdi mutù wà mukàji, ànu mùdi Kilistò
mwikàle mutù wà èkèleeziyà; ne yéyè mmusùngidi wa
mubidi awu.

Ki bwà cinyi bu mùdì èkèleeziyà ùkòòkela Kilistò, pa nàнку bakàji bàkookelè baabàyaabò mu kantu ne kantu kònsò.

Balùme, nùnanngàayi bakàji bèèni, ànu mùdì Kilistò munangè èkèleeziyà, ne mudifile yèyè muwinè bwà bwalu bwèndè; (Kùmudyatàkàji ku makàsà to! Wèwè wenza nàнку, kwèna mukùmbànyine kwikala mulùme to. Ncyà bushùwà!)

Bwà wàmòna mwà . . .

Tèelejàayi, ncyôci eci! Cyūmvwàayi mpindyewu:

Bwà wàmòna mwà kumujiidila ne kumukezula ku disukula dyà mâyi awu ku . . . [Disangisha didi dyamba ne: “Diyi.”—Muf.] Hmm!

¹⁶⁵ Dìbà adi, mukuukwidi yònsò udikù ùpeta mwà kubwela mu *Eci* bìkèngela àlwilè ku Dìyi. Kùdi bààbùngì menemene bàdì bàlwa mu mùngà mùshindù. Ntu ngiitabuuja tuumaalu-tulonda twà tukesè twà ne “maamù wàkafwà kùkaadi bidimu byàbùngì ne mmukwindile mu Dyulu” atu, aci cidi cimpè *paanyimà pàà* Dìyi dimanè kwangaciibwa. Bantu bààbùngì bàtu bàlwa ku cyoshelu bwalu mbaswè katwilangana ne mamwàbò nu Dyulu. Abi bidì ànu bìmpè, bìvwa bìkèngela wèwè kwenza nàнку, kàdi kì mbwà aci bùdì uvwila ku cyoshelu nànsha. Udi ulwa ku cyoshelu mwikàle utonda mpèkaatù yèbè bwalu Kilistò wàkafwà pa kaaba kèèbè, ku Dìyi!

¹⁶⁶ Pashiishe, mulàmbù kanà wònsò wùdì kawùyi wùlwa bilondèshile Dìyi kawèna wìtabiibwa dìbà adi to. Ncyà bushùwà anyi? (Kaa, mwanèètù, ntu ngumvwa bibì bwà kwamba eci. Kaa, ntu ngumvwa bibì bwà kucyàmba’s. Nùmfwilèku luse bwà dicyàmba.) Ki bwà cinyi Byenzedi 19 mmwimàne mu Bible ne: “Nukààdi bapetè Nyumà Mwîmpè kacya nwìtabuuja anyi?”

Bòbò kwamba ne: “Twètù . . . to ne kùtukù . . .”

Yèyè ne: “Dìbà adi, nwàkabàtijiibwa mùshindù kaayi? Bwà cinyi kanwèna babwelè Mwômò emu?”

¹⁶⁷ Bàvwa balwilè njila wa cyanàànà kàyi wa Dìyi to! Bòbò ne: “Kaa, s’tudi bapicile ku mèyi àdì àkèngediibwà kwamba’s, twàkabàtijiibwa . . . Yone.”

Yèyè ne: “Aci kacyakukùmbanakù to. Yone wàkabàtiiza ànu bwà kanyinganyinga cyanàànà, kacivwa bwà dilekelediibwa dyà mpèkaatù to.”

¹⁶⁸ Nènku pààkumvwàbo Cyôci eci, bààkabàtijiibwa cyàkàbìdì. Bwà cinyi? Ku Dìyi! “Basukula ne mâyi a Dìyi.” Dìyi ndyambè ne: “Dìnà dyà Yesù Kilistò!” Cyònsò cidi cilamika ní ncinyi cyònsò cikwàbò ku Cyôci aci ncyà mafi!

¹⁶⁹ Mpindyewu, mwanèètù wanyì wa mushinga mukolè, ndi mumanyè ne eci cidi kàbidì mukàbà wà mèyi. Mpindyewu,

kusalukukù to. Lekèlè ngàmbèku eci ne dinanga dyà cijila, dîbà dyàseemènyì dyà nciyikù kàbìdì mwà kushààla mupùwe nciyi ngamba maalu aa to, twatàmbi kuseemena pabwípì ne Dilwa. Nwamònu anyi? “Ci-Trinitaire ncyà dyabùlù!” Ndi ngamba ne EMU MMÜDÌ MUKALENGE WÀMBA! Tàngilààyi kùdici cifùmine. Ncifùmine ku Concile de Nicée pààkangatà èkèleeziyà wa Kàtòlikè bukòokeshi. Mwakù “bùsàtù” kî mmutèèdiibwekù nànsha mu Mukàndà mujimà wà Bible to. Kàdi bwà Nzambì *yìsàtù* kaayi, aci ncyà mu ifernò. Kùdi Nzambì umwèpelè. Aci ncyà bushùwà menemene.

¹⁷⁰ Mpindyewu, dîbà adi udi wamba ne: “Udi witabuuja ne bantu bônso bàdì—bàdì ba-Trinitaires aba mbàà mu ifernò anyi?” To, mukalenge. Mémè ndi ngiitabuuja ne mbeena Kilistò. Kàdi dîbà dikaadi diseemena, mwanèètù, diikalàbo bapiile pààbò ne meeji matòoke.

¹⁷¹ Muntu kanà yónsò, mwaba kanà wónsò, dîbà kanà dyónsò, udi muswè kwakula pa cyena-bwalu aci, àlwe kùndì mémè; mwambi kanà yónsò, mwèpiskòpò, mwèpiskòpò mutàmbidile, cyónsò cyùdi mufwànyine kwikala aci. Ne eci cìdi cikwàciibwa pa mikàbà yà mèyi, neciye pa buloba bujimà. Ndi ndòmba mu dinanga dyà bwànà bwètù, bwà muntu kanà yónsò udi untèeleja pa mukaba wa mèyi ewu pa buloba bujimà, wíkala mwà kulwa kùndì kundeejakù kantù kàmwè kàà mu Mifùndu anyi kasaka kàmwè mu bwalu-bulonda kanà bwónsò (bwikàle bwalu-bulonda bujaadiikiibwe) mùvwàku muntu nànsha umwe mubàtùjiibwe mu dîna dyà “Taàtù, Mwànà, ne Nyumà Mwìmpè” too ne pààkalwàbo kudyenza bulongolodi pàmwè ne èkèleeziyà wa Kàtòlikè, nènshintululè dilongesha dyànyì. Muntu yónsò wàkabàtùjiibwa mu Dîna dyà Yesù Kilistò! Nénku bânà bèètù bàà musinga mukolè, mèsù ènù mmafofomija ku bintu abi. Sambilaayikù bwà Nzambì ànùpèeshè Bukènkè!

¹⁷² Mpindyewu, wèwè ne Mufùndù bwà kucitwa nyama ku mikòlò, mémè nènshaalè mukwindile anyi ntèeleja bwà kupeta dibìikila dyèbè. Wèwè udi...udi...Paanyimà pàà mumanè kuumvwa mukàbà wà mèyi ewu, udi wendela ne budiswìle bwónsò mu dipanga dyà mu nyumà pawikalà kùyi ungeela kadyòmbò pa bwalu abu. Nwènù baswè kumanya cìdi Bukènkè ne cìdi mîdimà, twèbejàayi Nzambì. Vùlukàayi ne, ndi ngamba EMU MMÜDÌ MUKALENGE WÀMBA! Nwènù biitabùuje ne mémè ndi musadidi Wendè...Ne piikalàbi ne aci kacivwa bilondèshile Dìyi to, ncifwànyine kwikala cyà mashimi. Dîbà adi cyòci kaciyi bilondèshile Dìyi to, bùdì naabù mbwà kulwa kundongolola, uh-huh, ùmonà cìdi cyènzekà. Uh-huh. S’nantùpàkànyì!

¹⁷³ Mémè ndi ngiitabuuja ne binunu ne binunu byà ba-Trinitaires bàdì biitabùuje Nzambì yìsàtù abu mbasungìdiibwe, bwalu kî mbamanyè dishiilangana to. Netùkafikè ku cyòci aci mu diyìsha edi kumpàla eku.

174 Mpindyewu, kanwìmanyikikù mukàbà wènù wà mèyi nupàtuka mu nzubu amu to, nwènù bàna bèètù ba-Trinitaires; tèèlejàayi Eci. Kàdi sòmbaayi ànu talàlà ndambù wa tusunsa. Nudi beena dibànzà kunùdi nwènù biinè. Nudi beena dibànzà kùdi disangisha dyènù. Nwamònu anyi? Kanùlekedì kwikala kwangata mikàbà yà mèyi to, shààlaayi ànu naaCì. Cìkenketaayi ne Dìyi kàdi nùmonè nì nCilelèlà. Bible mmwambè ne: “Nùkenketè bintu byònsò.”

175 Ndi mumanyè ne kî nCyà mwasàkanaayi to, ki mùvwà pèndè Yesù, ki mùvwà Mukenji pàawù, misangu yònsò. Nuvwa bannangè pàmvwà ndwa ngondopa babèèdi ne beena ntàtù munkacì mwènù apu, nuvwa nudyàmbidila mùvwàci cinène, misùmbà minène yà bantu ne nudyundisha èkèleeziyà. Mpindyewu, Yesù wàkenza cintu cìmwècìmwè aci too ne ku ditùkù dyàkafikàYe ku Bulelèlà. Kàdi dyà Wènza nànkù, ne makùmi mwandamutekète mene kuMushiyabò. Kì kukùdimukaYe kùdi bakwàbò abu, dikùmi ne bàbìdì abu, kwamba ne: “Nudi baswè pèènù kuya anyi?”

Ki Peetèlò kwambaye mèyi a mushinga mukolè awu ne: “Mukalenge, nkùdi nganyì kutùdi bafwànyine kuya, bwalu Mèyi Èbè Wèwè nkààyaawù ngàdi a Cyendèlèlè?”

176 Ne Dìyi dyà Nzambì nkààyaadi ndìdi dyà Cyendèlèlè! Nènku ndeejàayaaku mwaba nànsha wùmwe wùkaadìku Nzambì mwenzè ne muntu kampànda àbatiijibwè mu dìnà dyà “Taatù, Mwànà, Nyumà Mwìmpè.”

177 Nudi nuya mu Maatàayi 28.19 ne: “Taatù, Mwànà, ne Nyumà Mwìmpè,” mùdi Maatàayi mwambè ne: “Ndààyaaku, nùkalongèshè bàà matùngà ònsò, nubàbàtiiza mu Dìnà dyà Taatù, Mwànà, Nyumà Mwìmpè” amu anyi? Nènku muntu yònsò udi wela meeji ne “Taatù, Mwànà, Nyuma Mwìmpè” ndìnà, aci cìdi cìleeja ne kùdi cintu kampànda cipampàlámùke mu dilonga dyèndè dyà tùlaasà. (Mpindyewu, bwà mulongi wa kàlaasà kàà mwandamutekète wàmbila aci bèèpiskòpò bàdi munkacì mwà kutèèleja Eci abu.) Taatù kî ndìnà to, Mwànà kî ndìna to, ne Nyumà Mwìmpè kî ndìnà to. Bìdi mmyànzù yìdi yitàngila Dìnà (dyà Taatù, Mwànà, Nyumà Mwìmpè), didì Yesù Kìlistò.

178 Vùlukàayi ne, aci kî mmu ciiji to, ncyamba mu dinanga ne kaneemu kàà cijila, ne dinanga ne ditwàngana dyà mushinga bwà Mubidì mu kaabujimà wà Kìlistò kùndì mubiikidìbwe kùdi bàna bèètù bàà ba-Trinitaires (ne pa buloba bujimà) bwà kulwa kuyiisha mu disangisha dyàbò. Kàdi ncìtu ncìtèèlakù to pàndì munkacì mwènù apu. Mémè ntu muswè kwikala... Ambà ànu wèwè mwinè munkonkè, ne nènye neebè ku nzùbù wa mpaasàtà bwà kuyiikila neebè pa bwalu abu. Kàdi kumpàlà kwà disangisha dyèbè, s’mbifwànyine kubàbìndulula. Nkaaba kèèbè wèwè bwà kupeta Dibuuulula ne kuya kayiisha cisùmbù cyèbè cyà mikòòkò, wèwè kì mulami wa cisùmbù cyà mikòòkò aci. Bàndì

ngambila aba mbambi. Wêwè kùyi muumvwè to, lwâku, tûsombè tûnanè lungènyi pàmwè. Bible mmwambè ne: “Nùkenketè bintu byônsò, ne nùkwatè bikolè ku cidi cîmpè.”

¹⁷⁹ “Mbû wa lumwènu,” mùvwà mulàmbù wùsukudiibwa... Ne twètù twâkasukudiibwa... Kaa, kanùpukù aci mwoyi to, tudi twalukilakù paanyimà pàà katancì ne: “Basukula ku màyi a Dìyi.” Dìbà adi bikèngela ùteelejè Dìyi kumpàlà kwà wèwè kumòna mwà kubwela mwômò amu, bwalu kùdi mùshindù ànu wùmwèpelè wûdiku mwà kuseemena kùdi Nzambi, nku diitabuuja. Mmwômò anyi? “Diitabuuja didi difûma ku dyumvwa, dyumvwa dyà Dìyi,” disukula dyà kondò keètù kàà mwoyi. Kí mbwà kutwilangana ne muntu, kí mbwà kutwilangana ne taatù, kí mbwà kutwilangana ne maamù, kí mbwà kutwilangana ne mwânà wa mu dibòko (abi byônsò mbilelèlè, netwènzè byòbì abi), kàdi cintu cyà kumpàla kutùdi ne cyà kulwila mmùsèèsù wà Nzambi wà dikùseemenena; netùsukudiibwè patùdi tuumvwa Dìyi dyà Nzambi.

¹⁸⁰ Ku diitabuuja nkutùdi twenda. *Ngàsà*, “cidi Nzambi mukwenzèle.” Ncyà bushùwà. Udi witabuuja Nzambi, udi witabuuja mu Nzambi; pàdìbi ànu ne wànyingàlàdi, wàmanyi kufwidiibwa luse.

¹⁸¹ Mûmvwà ngaakula ne mwanèètù kampànda wa balùme makèèlèlè awu, mupele ndambù wa cibwejàkàji pa bwalu abu, kí mèmè kwamba ne: “Tàngilà, mwanèètù, pawikalà mwambè cintu kampànda bwà kutàpa mukàjèèbè ku mwoyi, dyàkàmwè udi unyingalala bwà bwalu bwèndè, udi unyingalala mùdi mucyènzè, ukààdi munyingàlàle munda mwà mwoyi wèbè. Ncyà bushùwà. Kàdi bikèngela ùye kamwambilaci. Bikèngela ùye wàmbe ne: ‘Munanga wanyi, ndi—ndi nyingalala mùndi mwambè nànkù.’ Dìbà adi udi munyingàlàle munyingàlèlèlemù.” Mpindyewu, kí mùshindù wudìbi ne Nzambi nànkù.

¹⁸² Muntu udi mufwànyine kuya ne kwamba ne: “Ndi mumutàpe ku mwoyi, kabyèna ne cìdìbi bìshintulula to, nemmwambilè mùndi munyingàlàle, kàdi ncyà bushùwà ne ncyèna munyingàlàle to,” wèwè udi mwena lubombo. Nwamònu anyi? Ncyà bushùwà. Aci kacýàkwakidiibwa kùdi Nzambi to.

¹⁸³ Bikèngela wikalè munyingàlàle ànu menemene bwà mpèkaatù yèbè. Dìbà adi paudì umanya ne wànyingàlàdi bwà mpèkaatù yèbè, ne pashiishe “Kanyinganyinga, ne nùbatiijiibwè mu Dìnà dyà Yesù Kilistò bwà dilekelediibwa dyà mpèkaatù yènu, nènkù neùpetè difwidiibwa dyà luse, neùpetè Nyumà Mwimpè.” Nwamònu’s, bipeepèle ànu peepeelee, Nzambi mmucìvwijè cipeepèle.

¹⁸⁴ Apa...tudi tumòna apa mu “mbû wa lumwènu,” ùvwa mufwànyikija ne ntàlatalà. Mpindyewu, mbû wa lumwènu ùdi cimfwànyì, ùvwa mufwànyikija ne mbû wa cyamù cyà kabanda. Ewu mbû ngwa lumwènu, mu Dyulu. Mòsà wàkamumòna bu

mbû wa lumwènu ne wàkenza cyàkabiikidiibwà ne “mbû wa cyamù cyà kabanda,” cyoshelu cyà cyamù cyà mitakù, mulàmbù wà cyamù cyà mitakù. . . cyoshelu cyà cyamù cyà mitakù’s wè.

185 Nudi bamanyè cìdi cyamù cyà kabanda cyàmba mu Bible anyi? Cilumbulwidi. Yèyè wàkenza nyòka wa cyamù cyà kabanda. *Nyoka* ùdi ùmvwija cinyi? Cimfwànyì cyà *nyòka* cìvwa cyùmvwija “mpèkaatù mumana kulumbulwisha,” mu budimi bwà Edènà, pàvwàbi ne: “Cikànkanyà cyèbè necizaazè mutù wèndè; mutù wèndè newùzaazè cikànkanyà.”

186 Ne *cyamù cyà kabanda* cìdi cìleeja “Cilumbulwidi cyà Nzambi,” cyoshelu cyà cyamù cyà kabanda, mwaba wùvwàbo bòòshila mulàmbù awu; dilòngò dyà cyowelu dyà cyamù cyà mitakù, mwaba wùvwàwu wùsukudiibwa ne màyi a Dìyi. Nwamònu anyi? Mòs- . . . Eliyà, mu matukù èndè, wàkapàtuka e kutàngila muulu, kwambayè ne: “Dyulu dìdi òmwèka bu dyà cyamù cyà kabanda.” (Cilumbulwidi cyà Nzambi pa ditùngà dibèngiibwe.) Kaa, ekèlekèle! Cyamù cyà kabanda, cyamù cyà mitakù!

187 Mpindyewu tudi ku “dilòngò dyà cyowelu.” Ne nwamònu ne dilòngò dyà cyowelu edi òvwa munda mutupù ne ùvwa mutòòke zee ànu bu ntàlatalà. Bwà cinyi? Èkèleeziyà ùkaavwa mumanè kupikudiibwa!

188 Mpindyewu, mpindyewu, tudi tumòna pashìshe ndambù, nànsha nànu, pàdi bansantu bàà ku Dikènga dinène abu bàpàtuka, tudi tucisangana cyàkàbìdi cyùle tètè ne kapyà. Nuvwakù bamanyè. . . Nudikù baswè kubala aci anyi? Tùyaayi mu Bwàkabuulwibwà mpindyewu, nshapìtà wa 15, mvensà mwi2, túbalàayi mwaba wutùdi tumòna cyàkàbìdi kapyà kàà cyamù cyà kabanda aka awu. Èyo:

Nènku ngákamòna mwanjèlò mukwàbò. . . Ngákamòna cimanyinu cìkwàbò mu dyulu, (Cyà bushùwà.) cìnène ne cyà cìkèmesha, banjèlò mwandamutekète biikàle ne . . . bipùpù byà ndekeelu mwandamutekète; bwalu mu byòbì abi mmùle tètè ne ciiji cìkolè cyà Nzambi.

Mpindyewu “ciiji cìkolè” cyà Nzambi. Tàngilàayi:

Nènku ngákamòna bu ne cìvwa mbû wa lumwènu musambakaja ne kapyà: (Mpindyewu, tàngilàayi.) nènku aba bààkapetà bucìmunyi pa nyama wa lwonji, ne pa cimfwànyì cyèndè, ne pa cimanyinu aci, ne pa nombà wa dìnà dyèndè abu, bàvwa biimàne pa mbû wa lumwènu awu, biikàle ne . . . nzènzè yà Nzambi.

Ne bàvwa bimba musambu wà Mòsà musadidi wa Nzambi, . . .

189 Kaa, nudi nucimòna anyi? “Cikondo cyà Dikènga dinène.” Kaa! Nudi mu dilwijakaja anyi? [Disangisha dìdi dyàndamuna

ne: “To.”—Muf.] Èyo, tèèlejàayi, tumònàayibi cintu kampànda mwaba ewu.

¹⁹⁰ Tudi tulwa munyi? Bikèngela tülwe (Èkèleeziyà wa bàà Bisàmbà byà bendè ewu) ku Díyi edi, mbú wa lumwènú, máyi, máyi a Díyi (Ncyà bushùwà anyi?), kujingulula Díyi mùshindù wùdìDi difùndùbwe awu. Dìbà adi mulàmbù wùdi wàkidiibwa ne wùjiibwa tèntè ne Nyumà Mwímpè kubangila munda, wùbàlakeena ku Bukènkè bwà cikondo aci. Kuumukila ku eci. . . Ki Bwòbù bùdi bùpàtukilà mu mwaba wà cijila ebu bùbwela *emu*, bùpàtuka mu mùtootò bùbwela *emu*. Nwacyùm vù anyi?

¹⁹¹ Mònaayi, mpindyewu, ku ndekeelu kwà cikondo eci, Yone, pàakamònayè mbú wa cyamù cyà kabanda kwaka, ùvwa “mutòoke zee bu ntàlatalà.” Cìvwa ncinyi? Díyi òvwa dyumushìbwe pa buloba, dyambwìbwe mu Èkèleeziyà, ne òvwa “ditòoke zee bu ntàlatalà,” kakùciyi kàbìdì Mashì to, cikondo cyà Èkèleeziyà cìvwa cijikè.

¹⁹² Mpindyewu, mu Bwàkabuulwibwà 15, bàshàadilè bàà ku Dimiinu dyà mukàji, bàvwà bansantu bàà mu Dikènga dinène bàakapìcilà mu Dikènga dinène abu, mbàakasanganyibwà (Tàngilàayi!) biimàne pa mbú ewu. Ne mbú awu ùvwa mùle tèntè ne kapyà, mashì, ndimì mikùnze yilàkuka, kapyà kàà Nzambì. Bàvwa bapetè bucìmunyi pa nyama wa lwonji (Loomò), pa nombà wendè, pa dìleetà dyà dìnà dyèndè, ne pa cimfwànyi cyèndè (Nsangilu wa Maèkèleeziyà), ne bàkaavwa bapàtùke. Ne ku diyiisha dyà Mòsà ne Eliyà, baprófetà bàbìdì bàámwènekà kùdì Izalèlèlà abu bwà kupàtula. . . kasùmbù kàà bantu aka, bansantu bàà Cikondo cyà Dikènga dinène abu, bààbwejiibwà mu cikondo aci abu, cìvwa. . .

¹⁹³ Nwamònu’s, Èkèleeziyà mmumànè kwambwibwa mpindyewu, kàdi vùlukàayi ne Mukàji ùdi pa Nkwasa wa butùmbi. Cikondo cyà Dikènga dinène. . . Aba bàvwà ne mwoyi mu makalenge, pambèlu, ne bàlwa ne bamfùmù bààbò bònsò ne lumù lwàbò ne butùmbi bwàbò mu Cimenga aci. Patùdi tukabwela mu Bwàkabuulwibwà 22, nenùcimònè. Panwìkalà nufùnda eci ne nucilama, patwàfikàku nenùmonè citùdi baswè kwamba aci. Katwèna ànu ne dìbà dyà kwangata kantu kakesè kònsò ne kutwà naakù kumpàla ne paanyimà to, kàdi tudi tulenga myaba yàcì minène. Pashìishe dīngà ditùkù, pàmwàpa, bu Mukalenge mwà kwanyisha, netùpetèku dībà dyàbùngì dyà kwakulapù.

¹⁹⁴ Mpindyewu, bansantu bàà Cikondo cyà Dikènga dinène bàakajuukà aba, mbàakapìcilà mu makènga manène. (Èkèleeziyà kààkupìcila mu Dikènga dinène to! Nudi numòna ne bòbò bàkaavwa mu Butùmbi anyi?) Nènku ki bansantu bàà mu Dikènga dinène mbòbò aba, bajidiibwe bàvwà ne. . . bu mùdìbi ne ncilèmà cyànyi mèmè ne cilèmà cyènu nwènu mùvwàbo

kacya kabàyìkù bumvwè Dîyì. Byôbì ne bàvwa baDitèèlèje kàdi baDibènge, bàakaya mu ifernò; bàakeediibwa mu mîdimà yà pambèlu bwalu bàakabènga Dîyì. Kàdi bu bôbò kacya kabàyìkù baDyûmvwè to, Nzambi mmwakàne, Cikondo cyà Dikènga dinène cidi cibàvwila.

¹⁹⁵ Mpindyewu, mònaayi katancì kakesè cyanàànà. Bansantu basukula ku Dîyì òmwèdimwè adi, bwalu ncyoshelu cimwècimwè aci, mmbù umwèumwè wa lumwènù ne Dîyì òmwèdimwè adi. Bwàkabuulwibwà 2.5, Bwàkabuulwibwà 15: (anyi) :2 too ne ku :5. Mònaayi, katancì kakesè cyanàànà. Mpindyewu, kacya twètù katùvwakù babàtwàdile Dîyì to, ki bwà cinyi bàvwa—bàvwa mùshindù awu. Kacya katùvwakù babàtwàdile Dîyì to, nebàtwèlè bujitu abu pambidi. Pa nàнку katwàkwikalakù mwà kubàkula bantu bònsò to; Èkèleeziyà kàakucyènza to (mu eci cikondo) udi ne Bulelèlà awu. Bwalu bôbò nebàpicilè mu Dikènga dinène, kî m'Bansantu bàakafwà kale wàwa mu bikondo byà èkèleeziyà abi abu to, bwalu yèyè mmwambè ne: “Mbatùtuke mu Dikènga dinène,” ne Dikènga dinène pàadi dicidi dilwa, paanyimà pàà Èkèleeziyà mumàne kwalukila Kumbèlu.

¹⁹⁶ Kaa, ki bwalu mbwòbù abu's! Kaa, mèmè ndi mucinangè! Tèèlejàayi! Twànji tuyaayi kule ndambù, ndi muswè kumòna ne n'Dîyì dyà mùshindù kaayi dyàkumvwàbo adi. Mpindyewu, túbangilàayi cyàkàbìdi ku mvensà mwi2 wa nshapìtà wa 15.

Nèнку ngàkamòna bu ne cìvwa mmbù wa lumwènù musambakaja ne kapyà: nèнку aba bàakapetà bucìmunyi pa nyama wa lwonji, . . . pa cimfwànyì cyèndè, . . . pa cimanyinu cyèndè aci, . . . pa nombà wa dîna dyèndè, bàvwa biimàne pa mbù wa lumwènù awu, biikàle ne . . . nzènzè yà Nzambi.

¹⁹⁷ Mpindyewu, nwamònu's, kacya kabàvwakù babwelè to, kàdi bàvwa bumvwè Dîyì. Bàvwa bumvwè Dîyì. Mpindyewu, tèèlejàayi, mònaayi ne n'Dilongesha dyà mùshindù kaayi dyàkumvwàbo, mònaayi ní cidi cipetangana ne Èkèleeziyà leelù ewu.

Ne bàvwa bimba musambu wà Mòsà musadidi wa Nzambi, (Mbwena kwamba ne, mpaanyimà pàà Mòsà mumanè kuya dyàmwàmwa.) ne musambu wà Mwànà wa mùkòòkò, bamba ne: Byenzedi byèbè mbinène ne bilenga byà dikèma, Mukalenge Nzambi wa Bukolè bwònsò; (Mwànà wa mùkòòkò awu Nganyi?) Mukalenge Nzambi wa Bukolè bwònsò; njila yèbè mmyakàne ne milelèlà, wèwè Mfùmù wa bansantu.

¹⁹⁸ Nudi numòna cyàkajingululàbo ne ncìdìYe anyi? Kàyi mupersonà mwisàtù mu búsàtù to, kàdi “Mukalenge Nzambi wa Bukolè bwònsò, Mfùmù wa Bansantu!” Tèèlejàayi! Nudi badìlongòlòle anyi? Mvensà mwi4:

Nganyì wabènga kukuciina, Éyì Mukalenge, (ne dileetà dinène M-u-k-a-l-e-n-g-e, Elohim) ne kutumbisha...Nganyì udi mushàale wabènga kukuciina, ...ne kutumbisha dìnà dyèbè? ...

199 Bávwa basukula kùdì mâyi àmwèàmwè anùdì basukùdiibwe nwènú aba naawù mpindyewu aa, bàtèèleja Díyì, ne diitabuuja ne bukolè byà ne Yesù Kilistò ngudi wa Bukolè bwónsò. N'Dibuulula mu kaabujimà dyà ku cibangidilu. Cintu cyónsò mu kaabujimà ncikùta mu Dibuulula dyà ne Yesù Kilistò Nganyì: “Nzambi muvwijibwe mubidi munkaci mwètù!”

...Dìnà dyèbè ndinène ne dyà dikèmesha, ...

Nganyì wabènga kukuciina...ne kutwà dìnà dyèbè mushinga? wèwè...udi...bwalu wèwè nkààyeèbè ngudi wa cijila: bwalu matùnga ónsò neàlwe kukuukwila kumpàlà kwèbè; bwalu dilumbulwisha dyèbè ndimwènèshùibwe.

200 Mu ngaakwilù mukwàbò: Tudi tumòna cìdì kubènga kuCyàkidila kwènza, dilumbulwisha Dyèbè dìdì munkaci mwà kumwèneshiibwa. Pa nàнку ki twètù aba biimàne, tudi basukùdiibwe mpindyewu, tudi munkaci mwà kusukudiibwa ne mâyi paanyimà pàà bapicile mu Cikondo cyà Dikènga dinène. Tudi baKutwè nyama ku mikòlò ne tudi baKwitàbùuje, ne mpindyewu tudi biimàne pa mbù wa lumwènù, ne tudi munkaci mwà kuKupà lumù ne butùmbi bu cimfwànyì cyà Nyumà Mwîmpè Webè. Ne tündeyì Twèbè ntulelèlè ne dilumbulwisha Dyèbè ndyakàne.

201 Kaa, ekèlekèlè! S'tudi bafwànyìne kushàala lumingu lujimà pa cyòci aci. “Dibàtiiza dyà Nyumà Mwîmpè,” twànji tuzolààyikù cintu kampànda apa mene mpindyewu, katanci kakesè cyanàànà, ndi ne cintu kampànda cìndì njinga kuzòla. Mpindyewu, twànji, bwà cinyi katwèna twangata ànu cyòci aci mwaba mene wutùdì tusanganyiibwa awu.

202 Mpindyewu, bu twètù mwà kumòna, cimfwànyì cinène ncyòci eci. Mpindyewu, Mwaba mutàmbe cijila ngwòwò ewu. Èyo. Mwaba wà cijila ngwòwò ewu. Ne wà kumpàlà ngwòwò ewu, kumpàlà kwà kufika kwàka, pàdi mbù awu—awu.

203 Èyo, mpindyewu mònaayi. Tudi tuseemena kùdì Nzambi munyi? “Diitabuuja didi difùma ku dyumvwa, dyumvwa dyà Díyì dyà Nzambi,” didi dileejùibwe kuumukila mu Mwaba mutàmbe cijila dibwela mu mùsànjeelà wa cikondo.

204 Kale mu, ne awu...Mu ntempèlù wa Solòmò, cìdì cìfla bukènkè, tündeyì atu tùvwa tùfla makènkè àtù mu dilòngò dyà cyowelu dyà cyamù cyà kabanda aci. Pa nàнку, apa, mwanjèlò wa cikondo cyà èkèleeziyà ùdi ùleeja mu mâyi amu ne Muntu udi emu awu Nganyì, mwikàle ùleeja luse Lwèndè, Méyi Èndè,

cilumbulwidi Cyèndè, Dìna Dyèndè. Byònsò mbileejiibwe emu mùdi wèwè mutàpulula mu kuCiitabuuja. Nwacyùmvù anyi?

205 Mònaayi mùdi eci cilenga kaaba aka, tuvwa twakulapù ditùkù adi. Tàngilàayi apa, *apa*: “Ki bwà cinyi biikàle babingìshiiibwe, babingìshiiibwe ku diitabuuja.” Èyo, mwaba *mwibidì*, paanyimà pàa yèyè mumanè kusukudiibwa: “mujidiibwe.” Nènku, *pashiishe*, “muujiibwe tètè ne Nyumà Mwîmpè.” Dibingishiibwa, dijidiibwa, dibàtiiza dyà Nyumà Mwîmpè! Nwacyùmvù anyi? Mukenji Wèndè wùvwa bìshi? Dibingishiibwa ku dyumvwa; dijidiibwa ncyùdi wèwè wenza; ne bwà kutwà mashinga ku cyùdi mwenze bwà dyanisha dyà cyòci aci, Nzambi mmukutwè citampì ku Nyumà Mwîmpè.

206 Mpindyewu, wèwè, mwanèètù wanyì wa ba-Baptistes, ndi njinga kukukonkakù cintu kampànda. Wèwè udi wamba ne: “Ncinyi cikwàbò cìvwàku Abraham mufwànyine kwenza pa kuumusha kwitabuuja Nzambi? Ne Nzambi’s wàkamubadilaci bu bwakàne.”

207 Ki cyònsò cìvwàye mwà kwenza, *apa* mene, Yèyè wàkiitabuuja Nzambi. Kàdi Nzambi, bwà kwitaba diitabuuja dyèndè adi, s’wàkamupèesha citampì cyà ditengudiibwa ne kumutwà citampì, bìleeja ne bìvwa bikèngela bwà Nzambi itab-...wàkiitaba diitabuuja dyèndè. Kàdi wèwè ujikula diitabuuja mu Nzambi, kàdi kacya kùyikù mwanji kutwibwa citampì kùdi Nyumà Mwîmpè...Efesò 4.30, nwènù baswè kucifùnda, Èfeso 4.30: “Kanùbungamiji Nyumà Mwîmpè wa Nzambi unùdi batwibwe nendè citampì!” Ne kwèna mutwibwe citampì to paùdi kùyi mupetè Nyumà Mwîmpè.

208 Cìdi cìshààla too ne ku dìbà kaayi? Too ne ku ditàbuluja didi dilondà anyi? “Too ne ku bupikudi bwètù, Ditùkù mene dyà bupikudi adi.” Kakwèna mùshindù wà kuumukaKù to. Kwèna mwà kuumukaKù to, bwalu Yèyè kàakukuumuka to. Nwamònu anyi? “Bwalu nudi batwibwe citampì too ne ku Ditùkù dyà bupikudi bwènù.” “Kakwèna cintu nànsha cìmwè cìcilwalwà, cintu nànsha cìmwè cìdiku mpindyewu, njìwù mikolè, nzala, nyòtòtà, lufù, anyi ní ncinyi cyònsò, cìdi mwà kutùpandulula ne dinanga dyà Nzambi didi mu Kilistò to.” Pòlò wàkamba ne: “Mèmè ndi mutwishiiibwe menemene bwà cyòci aci!” S’ki bwalu mbwòbù abu! Ki bwalu mbwòbù abu’s, udi mutwibwe citampì too ne ku Ditùkù dyà bupikudi bwèbè.

209 Mònaayi, aci’s necikatùfikishè cyàkàbìdi ku byà—byà dyàlumingu dishààle. Ndi ne dìbà anyi? Ndi ànu...Tàngilàayi, tàngilàayi eci nùnkù, nyumà...nyumà, musùukà, ne mubidi. Èyo, nwamònu’s: mubidi, musùukà, nyumà.

210 Mpindyewu, ngànji nkupulè aci bwà nnùlongolwèlè cintu kampànda kaaba aka. Mpindyewu, nèngiikalè mwà kuzòlakù cintu kampànda kaaba aka, ncìvwa mupetè mpùngà wa kucizòla mu dyàlumingu dishààle to nènku ndi mèmè mwinè mudizòlèlèci

kaaba aka pa dibèjì dyà kàlaabi edi. Ndi muswè nùcifundè bwà nùfikè ku dimòna cìndi muswè kwamba, mpindyewu, nwènu bàdi ne crayons yènu abu. Mpindyewu, *eci* mmubidi; ne *eci* mmusùukà; ne *eci* cìdi (dileetá dinène N-y-u-m-à) Nyumà, Nyumà Mwimpè. Eyo. Mpindyewu, ki bitùdi benjìlbe naabi mbyòbì abi.

211 Bu nwènu mwà kumòna *apa* nùnkù, mwaba wà cijila, Mwaba mutámbe cijila; *apa* ncyoshelu, mwaba wà cijila; ne *apa* mbù—mbù, ki mwaba wunùdi nuumvwila Dìyì awu ne: “Diitabuuja dìdi difùma ku dyumvwa, dyumvwa dyà Dìyì,” ditàpulula, mbù wa ditàpulula, mbù wa ditàpulula. Mpindyewu, mònaayi *eci*. Mpindyewu, kùdi cibweledi ànu cimwèpelè bwà kubwela *emu* nùnkù, ne mbwena kwamba ne bìdi bikèngela wánjì kufika *apa* dyàmbedi. Mmwómò anyi?

212 Mpindyewu, mvw’a kujingakù ngíkala ne mwaba, nùnkù ndi mutèèke *apa* nùnkù ne, “baa—baavirgò.” Pàvwà. . . “Didyà dyà Dibanji,” cikwàbò. Nudi numòna mwàkabwelà muntu ewu *apa* mu Didyà dyà Dibanji, ne mubwelè mu mùshindù kampànda wà cyanààna amu anyi? *Apa* mpàvwà Ciibi. Yesù wàkamba ne: “Mèmè ki Ciibi.” Ne mèèsà a didyà dyà dibanji àvwa matèèka *apa* ne bantu basòmbe bònso mu nyùngulukilu amu, kàdi muntu kampànda nyèyè ewu mwaba ewu uvwa kàyi muvwàle Cìvwàlù cyà Dibanji to. Nènkù pààkabwelà Mfùmù, Yèyè kwamba ne: “Udi mufikè apa bishì, mulundà wanyì? Mmunyi mùdiku mubwelè apa?” Bivwa bìleeja ne kàvwa mubwelèle ku *eci* Ciibi to. Úvwa mukabwelèle ku didìdiishì kampànda anyi mukabwelèle ku mushìkù wà kumfundu, anyi ku twitabààyi anyi dìngumba kampànda. Kàvwa mubwelèle ku Ciibi to!

213 Bwalu ku bantu bàà kale bàà kùdi dìbà dìpàtukila bàcìdi ànu ne cintu cimwècimwè aci, pàdi mubàki usèlangana, ùdi wàbanya tubèjì twà mabìikila ne ùpèèsha muntu ne muntu udiyè mubiikile awu mùzàbì.

214 Kaa, mùshindù mwinè wùdi mwoyi wànyì wùnyùnguluka pàndi nkwelela meeji’s wè! “Muntu nànsha umwe kèna mwà kulwa kùNdi pàdi Taatù Wanyi kàyi mwanjì kumupèeshe dibiikila to, ne bònso bàdi Taatù muMpèeshe nebàlwe kùNdi.” Tuvwa babìikidiibwe munyi? Kumpàlà kwà difùkà dyà dyulu ne buloba nkwaafùndiibwà mènà ètù mu Mukàndà wà Mwoyi wà Mwànà wa mùkòòkò, bwà kumòna Bukènkè, bwà kupeta Nyumà Mwimpè, bwà kwendelàMù. Mènà ètù (pààkashebeyiibwà Mwànà wa mùkòòkò) àkafùndiibwa mu Mukàndà musangu wùmwèwùmwe wàkafùndiibwà Dìna dyà Mwànà wa mùkòòkò awu. Bible, netùkùfikè paanyimà pàà katanci, mmwambè ne: “yèyè wàkaseeswisha bònso pa buloba beena mènà àdi kaàyi mafùnda mu Mukàndà wa Mwoyi wà Mwànà wa mùkòòkò kacya ku difùkà dyà dyulu ne buloba.”

215 Mònaayi, dìbà adi pìikalàbi ne yèyè. . . mubàki yèyè mwinè,

pàvwàye mwimànyìne ku ciibi apu. Nènku muntu ùvwa ùlwa ne dibìikila adi, wàmba ne: “Ndyòdi edi.”

216 “Twasàkidila.” Ùvwa wàngata dibìikila adi, ùditèèka apa, ne ùmuvwàdika mùzàbì bwà bònso bìikalè ne mmwènekèlu wa mwomùmwè. Mémè ndi munangè aci! Nwamònu anyi? Mu bukolè bwà Nzambi, mu Èkèleeziyà wa Nzambi udi ne mwoyi, babanji, bapèlè, bapika, badishikàmìne, bafìlke, batòoke, bafìkùlùke, bàà kàlaabi, bònso ne mmwènekèlu wa mwomùmwè bwalu mbavwàdika Bukolè bwà mwomùmwè bwà Nyumà Mwímpè. Nwamònu anyi?

Mpindyewu, byàkaleeja ne yèyè awu kàakalwila ku Ciibi to.

217 Mpindyewu, mònayì apa. Kaa, pàvwà muntu ùteeta kubwela mu Mwaba mutàmbe cijila (muntu kampànda, mulongeshi kampànda wa Bible ùngambila), pàvwà muntu kampànda ùbanga kubwela mu Mwaba mutàmbe cijila kàyì ùpicila *apa* to, ùvwa ùfwa. Mwànà wa balùme wa Aalònà wàkangata mudilu mwenyi ditùkù kampànda, mudilu kampànda wà cyena-màngumba (pààbì kaCìvwa ne cyà kwikala mudilu wà cyena-màngumba to), kàdi wàkafwila ku ciibi aku. Ncyà bushùwà anyi? Anyi bàvwa mbànà bàà balùmè bàà Èlì, ngeela meeji. Bàna bàà Èlì mbààkabàbwejà, pàvwàbì ne cìvwa cìleeja bàna bàà Aalònà uvwà mwakwidi.

218 Mpindyewu, mpindyewu, kùdi mùshindù wùmwpèlè wà kubwela mu mubidi. Mubidi ewu wùtu wùkòntononyiibwa munyi? Mpindyewu, tàngilàayi ne ntèmà yònsò mpindyewu ne nùlongololè crayons yènú. *Apa* mpàdi ciibi luseke elu cìdi cìfila mu mubidi: ùmwè, ibìdì, isàtù, inaayi, itaanu. Mpindyewu, nwazòlu aci anyi? Mpindyewu, ciibi cyà kumpàla *apa* cidi: lumònò, lununku, lumvu, ne lulabulu, ne dilenga anyi lulengu (eci anyi eci cìdici ciswè kwikala, kì mbwalu to). Mpindyewu, ki byumvwilu byà mubidi mbyòbì abi. Mmwòmò anyi? Mbanganyi bàdi bamanyè nànkù? Byumvwilu bisambòmbò mbidì bikòntononà mubidi. Mpindyewu, tudi ne musùkà paanyimà pàà wèwè mumanè kupicila ku *eci*. Byumvwilu bìdi pambèlu, ki ndongolwelu wa pambèlu nyèyè awu.

219 Mpindyewu, *emu* mùdi cìmwè, bibìdì, bisàtù, binaayi, bitaanu, byambiibwà bitaanu mu musùkà. Mpindyewu, nudi baswè kubifùnda anyi? Cyà kumpàlà ncifwànyikijilu, ncifwànyikijilu. Ciibidì nkondò kàà mwoyi. Ne ciisàtù ncivùlukilu. Ne ciinàyi ncilukakaji cyà lungenyi. Ne ciitànù mmeeji a dinanga.

220 Mpindyewu, nwabikwàci byònsò anyi? Kanùyì babikwàte to, dìbà adi nùngambilè mmanyè mpindyewu. Nwabifùndu byònsò anyi? Lumònò, lulabulu, lulengu, lununku, ne lumvu; mubidi, abi ki bibweledi byà mu mubidi.

221 Musùkà wùdi ne cifwànyikijilu, kondò kàà mwoyi, civùlukilu, cilukakaji cyà lungenyi, ne meeji a dinanga, ki

byumvwilu anyi byambiibwà, bu byumvwilu byà musùùkà. Ne musùùkà nngiikadilù wa nyumà udi munda, bwalu musùùkà wùdi ànu wùpàtula cyanàànà cyuyüya kampànda cyà cidi munda mwèbè aci. Wùdi wàngata kaaba kàà dijidiibwa, musùùkà awu, wùdi mu mùshindù musungùlùke wùmwèwùmwè awu muntwamu. Èyo, mpindyewu, bònsò...bònsò bǎfùndu byònsò abi anyi? Èyo.

²²² Mpindyewu, ku *eci* ciibi kùdi ànu cìmwèpelè, ciibi cìmwèpelè, cibìikidiibwa ne “budìswìle.” Wèwè udi mfùmù wa bìdì bìbwelàmu. Nènku cidi cyènta cinyi? Eci ncinyi? *Mubidi* wùdi ne cyà kusukudiibwa, dilòngò dyà cyowelu; mujidiibwe, *apa* nùnkù; muujiibwè tètè ne Nyumà Mwimpè, *apa*, nènku eci cidi cìlwa cyàkàbìdì nkwasà wa cilumbulwidi wa Nzambì, mùdì Nzambì ùsòmba mu mwoyi wèbè, nènku wèwè mwenzè cintu kampànda cyà cibì, wamba ne: “Èyi, ekèlekèle, ndi mwenzè bibì.”

²²³ Bàmwè bantu bàtu bàmba ne: “Ncyèna ngumvwa dipiila bwà—bwà kwikala ne nsukì mîpì to,” bakàjì abu’s. “Ncyèna ngumvwa dipiila bwà dilengeja dyà byanza anyi bilaabu byà kwìsù, anyi nì ncinyi cyònsò to. Ncyèna ngumvwa dipiila bwà kuya mu maja to. Ncyèna ngumvwa dipiila bwà kwambakù kaadishima kapeepèlè to. Ncyèna ngumvwa dipiila bwà kunàyakù kartà mu kasùmbù kàànyì kàà banàyi bàà kartà to.” Udi mumanyè ne mbwà cinyi? Kwèna ne cintu nànsha cìmwè cyà kukupìsha to. “Kacyèna cyènta bibì ku kondò kàànyì kàà mwoyi to.” Wèwè mwinè kùcyèna ne kondò kàà mwoyi to ànu mùdì nyòka kàyi ne cifùka amu. Pa nànkù udi ànu . . . Kwèna ne kondò kàà mwoyi to, kakwèna cintu nànsha cìmwè muntwamu bwà kukwenza bibì ku mwoyi to. Wèwè udi wa pa buloba!

²²⁴ Kàdi ndi nkwela kadyòmbò bwà ùlekelè Yesù Kilistò àbwelè munda *emu* kàdi ùteetè bwà kucyènta musangu wùmwè! Mwanèètù, wèwè’s neùdyùmvwè mupìishìbwe mu mùshindù wa ne newàlukilè cyànyimà umusha mpàlà ku cintu aci cyà bushùwà ànu mùndì mwimàne kaaba aka emu, bwalu Yèyè ngwa cijila. Tèèlejààyi, ndi ntèèla Mufùndù ewu ne: “Wèwè munangè bintu bìdì maalù a pa buloba abi, bintu byà pa buloba, mbwalu dinanga dyà Nzambì kadyèna nànsha mene munda mwèbè to.”

²²⁵ Ncyenzèke munyi? Budìswìle. Bwà cinyi udi muswè kubiikila aci ne ‘mbudìswìle,’ Mwanèètù Branham?” Bwalu cidi citèeka cyàkàbìdì mulùme anyi mukàjì ànu mùvwà Adàmà ne Evà mu budimi bwà Edènà amu. Pa cinyi? Mici yìbìdì ayi! Budìswìle, *ewu* ndufù. *Ewu* m’Mwoyi, budìswìlè. Bùdi... Budìshikaminyi bwà disungula! Nzambì wàkatèeka muntu wa kumpàla, Adàmà ne Evà, anù pa budìshikaminyi bwà disungula apa. Ùdi ùkutèeka pa mwaba ànu wòwò wùmwèwùmwè awu. Ne mùshindù wùmwèpelè wùdìku mwà kulongolola cintu eci *apa* nku budìswìlè bwèbè sungasunga. Àlèluuyàh! Budìswìlè bwèbè! Bikèngela ùjingè kwenza Diswa dyà Nzambì. Bikèngela

umushè diswa dyèbè sungasunga bwà ùlekelè Diswa dyà Nzambi dibwelè, bwalu aka ki kajila kàmwèpelè kàdi kàfila ku mwoyi.

²²⁶ Kaa, nudi mwà kadivwija bàà mu èkèleeziyà, nwènù ba-Baptistes ne ba-Presbytériens. Ne nwènù ba-Méthodistes ne ba-Pèlerins de la Sainteté nudi mwà kufika ku dijidiibwa. Kàdi bìdi bikèngela bwà nwènù kuswa bwà kwenza Diswa dyà Nzambi, budiswile, kulekela Nyumà Mwimpè ùbwela *emu* nùnkù, bwà kuvwija. “Bimanyinu ebi nebifilè aba bàdi bìitabuujà. Mu Dìna Dyànyì bóbò nebìipatè baadémons. *Nebààkulè* mu myakulu mipyamipyà. Nebàtentekelè babèèdi byanza anyi bàkwatè bintu bìdi bìshebeyanganà, ne bikwàbò. Bimanyinu ebi nebifilè aba bàdi balekèle diswa dyàbò dilwa Diswa Dyànyì, ne byenzedi bìndi Mémè ngenza nebàbyènzè pààbò.” Ndi ntèkemena ne kaCyèna cinùpita to. Ki diswa dyà kwenza Diswa dyà Nzambi ndyadì. Nudi bamòne cìndi muswè kwamba aci anyi?

²²⁷ Tàngilàayi kùneeku, ndi ngaakula bwà mwaba wà cijila, dilòngò dyà cyowelu. Makènkè awu *ngòwò aa*, bitèekedi byà myèndù (cimwè, bibìdi, bisàtù, binaayi, bitaanu, bisambòmbò, mwandamutekète), cyònsò cyà kùdìbi cìdi ne bukènkè kampànda. Bìdi bìpetela bukènkè bwàbì penyi? Bukènkè bwàbì bìdi bùleejiibwa penyi, Bùdi bùdileejila penyi? KaBwèna bùdileejila mu ditumba *emu* pa dinguumba kampànda to. Bùdi bùdileejila paanyimà apa ku Dìyi! Mmàyi a ditàpulula. Yoyòyò!

²²⁸ “Bwalu kanyinganyinga ne dilekelediibwa dyà mpèkaatù” (Luukà 24.49) “bìdi ne cyà kuyiishiibwa mu Dìna Dyèndè ku matungà ònsò, kubangila ku Yelusàlèmà.” Kanyinganyinga ne dilekelediibwa dyà mpèkaatù byàkayiishiibwa munyi ku Yelusàlèmà? Too ne penyi? Bìdi ne cyà kuya too ne pa buloba bujimà. “Nyingàlàaayi,” mwàkambà Peetèlò, mu Byenzedi 2.38, “ne nùbatiijiibwè mu Dìna dyà Yesù Kilistò bwà dilekelediibwa dyà mpèkaatù wenù.” Bikèngela bwà Mukenji awu wùye pa buloba bujimà, ne pashiishe ndekeelu neàlwe. Pashiishe ndekeelu neàlwe, paanyimà pàà Mukenji *ewu* mumanè kuya pa buloba bujimà.

²²⁹ Mmunyi, mùdi bitèekedi byà myèndù ebi bìleeja bukènkè lwà apa pa dinguumba kampànda dyà ba-Méthodistes, ba-Presbytériens, anyi beena Mpenta? Èè, ncyà bushùwà ne kí nnànkù to!

²³⁰ Bùdi bùdileejila *emu* nùnkù bu “NDI,” kàcìyi “Mvwa” to. Ki mbantu bàsàtù anyi bànaayi bashiilàngàne to, kàdi Nzambi musòmbemù uDileejila kùdi yònsò wa ku èkèleeziyà ayi. Tàngilàayi kale wàwa nùmonè cyàkenzàbo (tudi bafùme ku dilonga dyà maalu-malonda), bàvwa bàMuleejia Yèyè mùvwàYe, mùdiYe, ne mwikalàYe misangu yònsò.

²³¹ “Ewu uvwakù. . .” Yone mmwenzè ànu ùCìtwishila mèsù anyi, kwambayè ne: “Ewu uvwakù, Udikù, ne Wálwa Awu, Nzambi wa Bukolè bwònsò, bufùki bwà Nzambi, Alpha, Omega,

Cibangidilu ne Ndekeelu.” Ki Bukênkè bulelèlè mbwòbù abu bwà kuleeja. Nudi nuCimòna anyi? Amen! Yoyöyò!

²³² Paanyimà pàà díbà dikùmi ne ibìdì, ne ndi—ndi ne... Tèelejààyi, twánjààyi kulwijakaja bwà nwamòna mwà kucitentula. Ndi ànu ngumvwa bibi bwà kunùlama ntàntà mupitèpite bule, kàdi ncyèna mumanyè ne ndìbà kaayi dīngàànùmònà kàbìdì to. Nwamònu anyi? Nènku ndi muswè bwà nùpetè eci, balundà bàànyì, eci ki Mwoyi. Mpindyewu, tàngilààyi, ncyèna nswà kwamba ne mbwalu mèmè ngudi uCyamba to. Mèmè—mèmè ndeeja cyà mùshindù awu wà... díbà adi ndi... nudi—nudi nuumvwa mwoyi wànyì bibi. Ncyèna nteeta bwà kuleeja byà ne: “Kaa, eci cidi ànu... Wèwè udi cintu cyanààna” to. Ncyèna nteeta kwenza nànkù to. Pawikalà kùyi mupetè Bukênkè to, mèmè ndi nteeta bwà kukufunkwina Bùdì apa ebu. Kì mbùdì ku cyambilu eci ebu to, m’Bùdì ku Nkwasa wa butùmbi kwàka abu. Ne Nkwasa wa butùmbi awu ùdi ne cyà kwikala mu mwoyi wèbè, díbà adi neumonè cintu ànu cimwècimwè aci menemene mùdici cileejìibwe kaaba aka emu.

²³³ Cìdì apa eci ncinyi? Cìdì cìleeja *Eci*. Ne *eci* ng’Eci, Dìyi. Basukula ne mâyi a Dìyi, ku Dìyi; basukula (ku mâyi a ditàpulula) ku bintu byà pa buloba—pa buloba, ku Dìyi. Dìyi didi dyàmba ne Yèyè ùdi umwèumwè awu makèlèlè too ne kashidi. KaDyèna dyàmba ne: “Yèyè ùdi umwèumwè awu mu cikondo cyà beena Mpenta, kale wàwa mu bayiidi, ne pashìishe cikondo cyàkalondà Yèyè wàkashintuluka” to. To, Yèyè ùdi umwèumwè awu! Nwamònu anyi? Kwèna mwà kuDifikisha ku dyàmba cīngà cintu to. Tudi bafwànyine kushààla ànu pa cimwè cyà ku bintu abi munda mwà mèbà, kàdi ndi ntèkemena ne nudi munkaci mwà kuCìpeta mpindyewu. Nzambi Yèyè mukubiikile, nèuCìpetè. Ki cīndi mèmè ngiitabuuja ncyòci aci. Èyo, mukalenge.

²³⁴ Mpindyewu, ncinyi ciinè aci? Dibingishiibwa, dijidiibwa, dibàtiiza dyà Nyumà Mwimpè; musùukà, mubidi, nyumà; byònsò byà mwomùmwè. Mpindyewu, mwèndù awu wùdi wùleeja Dìyi. Dìyi dilelèlè didi dileeja cinyi? Ncinyi cìvwà mwèndù ewu mufwànyine kuleeja, bu ne wùvwa wùpetela bukênkè bwàwù kùdì Butùmbi bwà Shekinàh ebu? Bùvwa bufwànyine kuleeja Butùmbi bwà Shekinàh. Mmwômò anyi?

²³⁵ Pìikalàbi ne wèwè uvwa mubwelè mu sèminèrè, bwèbè bukênkè, nèuleeje sèminèrè. Wèwè mubùpetèle mu sèminèrè wa ba-Méthodistes, nèuleeje ci-Méthodiste. Ki ciwàleeja! Wèwè mubùpetèle mu sèminèrè wa beena Mpenta, s’udi uleeja cyena Mpenta. Kàdi wèwè muBùpetèle mu Butùmbi bwà Nzambi, ku cipuka cidi cilàkuka kapyà aci... .

²³⁶ Mona’s, pàakapàtukà Mòsà mu Bwikadi Bwèndè, byàkakèngela bwà kutèekayè cintu kampànda pa mpàla

pèndè, pa nànkù, bantu kabàvwakù nànsha mwà kumutàngila to. Mmwòmò anyi? Ûvwa mùle tètè ne bukolè bwà Nzambi.

237 Stèfanò, muntu mùle tètè ne Nyumà Mwímpè. Kuteeta bwà kumwimanyika, mòna's, bivwa ànu bu kuteeta bwà kujima mudilu ku nzùbu mu ditùkù dyà lupeepà, mukwàte mudilu; kujimakù mudilu...ne nzùbu mukwàte mudilu mu ditùkù dyà lupeepà. Kaa, pàvwàbo bàtàm̄ba—bàtàm̄ba kuwùpwidila, mpàvwàwu wùtàm̄ba kutomboka. Mòna's, kùvwakù mufwànyine kumwimanyika to. Dyakàmwè, pàakamutèèkàbo kumpalà kwà Tubàdi twà beena Yudà, Bible mmwambè ne: “Wàkashààla mwimàne mwaba awu, ùmwèka bu mwanjèlo.”

238 Mpindyewu, ncyèna ngeela meeji ne “mwanjèlo” mbwena kwamba ànu ne yèyè ùvwa m'Muntu kampànda mwimàne mwaba awu to; kadi, mwanjèlo mmumanyè menemene cidie wàm̄ba. Ki mùdi kàbìdi mwanjèlo kanà yònsò ewu, mùsànjeelà wa cikondo cyà Èkèleeziyà, kabyèna bikèngela àalukilè bwà kamòna cidi sèminèrè wèla meeji to. Yèyè mmumanyè cidi Nzambi mwambè mu Bible Wendè, ne bukolè bùdi bùdileejà bwà kujaadika ne Yèyè ùdi umwèumwè awu makèlèlèlè, leelù, too ne kashidi. Kèna ùciina nànsha, ùdi wàm̄ba ànu menemene cidie mumanyè ne ki Bulelèlè aci. Ne Nzambi mwimàne mwaba awu ùBùtwa nyama ku mikòlò ne bimanyinu ne maalu a kukèma byà mùshindù wùmwèwùmwè awu, ne Dìyi òmwèdimwè adi. Ki mwanjèlo nyèyè awu!

239 Stèfanò wàkiimana mwaba awu, kwambayè: “Ndi mumanyè cindi ngamba aci.” Yèyè ne: “Nwènù beena nshìngù mitàndàbàle ne kabàyi batengula mu myoyi ne mu maci aba, nudi misangu yènù yònsò ànu nukàndameena Nyumà Mwímpè. Mwàkenzà baatatwènù, s'ki munùdi nwenza pèènù emu!” Yèyè ne: “Nganyì wa ku baatatwènù udikù kàyì mushebèye bapròfètà ne pashìshe mubibàkile nkità?”

240 Nwènù màngumba, nganyì wa kunùdi udi kàyì mwenzè cintu cìmwècìmwè aci? Nwamònu anyi? Nwibaka nzùbù minènè yà bimanu bilaaba lupèmbà ne nzùbù yà bitàlù ne bikwàbò myaba yònsò eyi, kadi pashìshe nwakula bwà Nzambi! Wèwè awu's ki mwinè udi muMwèlè mu nzùbù wa bitàlù amu, wèwè awu's ki mwinè udi muMwèlè mu majambu. Cyòci aci's ki cintu cìmwècìmwè cyàkaMwèlè mu majambu kale wàwa, s'cìvwa ng'èkèleeziyà mwenzà wa nzùbù munènè wa bimanu bilaaba lupèmbà, dìngumba, Bàfaalèsà ne Basadokà bààkaMwèlèmu abu kadi pashìshe kuteeta bwà kuCùibakila civùlukilu.

241 Lekèlaayi nnwàm̄bilè ne Kilistò n'Kampànda udi ne mwoyi. Yèyè kí ncintu kampànda cìfwilè to, Yèyè n'Cintu kampànda “cìjuukilè *ku* bafwè ne ciikàle ne mwoyi bwà kashidi.” Kaa, mwanèètù! Bushùwà's! Cidi cyènza cinyi? Cidi cileejà cinyi? Cidi cidileejila *apa*, ncifwànyine kwikala cinyi? Kí ncifwànyine

²⁴⁵ Ne ùdi ùtùngunuka ne ùmvwija mùdi “nyama” ayi, kwôkò kwìnè netùkùfikè mu katanci emu. Mpindyewu, *nyama* kaaba aka mmifwànyikija. Udi ne mèyi a kumpengà kwà dibèji mu Bible webè amu, pa—pa *nyama* anyi? Wèwè nendè, pita ndà mu mèyi a kumpengà kwà dibèji awu. Ndi mmòna ne Docteur Scofield kaaba aka mmucifunde mu wendè. *Nyama* ayi yidi yùmvwija, yèyè kaaba aka, wàmba ne “Bifùkiibwà bìdi ne mwoyi.” Kaa, ekèlekèlè! Mpindyewu, tàngilàayi. Mwakù wà cyena-Ngelikà mwaba awu wùdi, “Z, o yìbìdi, m,” . . . anyi, “Z, o yìbìdi, n” ki mùdici, “Z, o yìbìdi, n.” Mpindyewu, mu—mu cyena-Ngelikà, bàdi bàcibiikila ne Zoon udi umvwija ne “Cifùkiibwà.”

²⁴⁶ Mpindyewu, kabyèna nàнку to. . . nwènù baswè kucibala mpindyewu. Katwèna ne díbà to. Nkààvwa muswè kucibala, kàdi ncyèna ne díbà to. Fùndaayi Bwàkabuulwibwà 11, 13, ne 17. Mpindyewu, mwaba wùdi *nyama* awu, mu Bwàkabuulwibwà nshapità 11, 13, ne 17 amu, mbayìbiikile ne *nyama* mùshindù wùm wèwùm wè awu; kàdi *nyama* mwaba awu, dyumvwija òdi “t-h-e-r-i-o-n,” therion. Mwakù awu, mwakù wà-cyena-Ngelikà *therion* awu, wùdi wùmvwijà “nyama mutombòke, kàyi mutekesha.” *Therion*, aci cidi cyùmvwija “nyama mutombòke, kàyi mutekesha.”

²⁴⁷ Kàdi Zoon ùdi ùmvwija “Cifùkiibwà,” nwamònu’s: “Bifùkiibwà (Zoon) bìnaayi bìdi ne mwoyi.” Kaciyi *nyama* yà “mitombòke,” *therion* to; kàdi, “Zoon, Bifùkiibwà bìdi ne mwoyi.”

²⁴⁸ Ne *therion* yèyè ùdi “mitombòke, yà mwitu kayi mitekesha.” Mu ngaakwilù mukwàbò, nwènù baswè kutàngila nshapità wa 11, “nyama wa lwonji wa Loomò.” Nshapità wa 13, “États-Unis.” Nshapità wa 17, “bònsò bàbìdi États-Unis ne Loomò,” ekèleeziyà yà cyena-màngumba midyènzè cimùkù ne cyena-Kàtòlikè bìdi bìbàvwija kabàyi bakùdìmùne mucimà, kabàyi batekesha ku Èvànjeeliyò to. Yoyòyò! Kabàyi batekesha!

²⁴⁹ “Nzambi àbeneshiibwè, twètù tudi bafùmìne ku ekèleeziyà munène wa ba-Méthodistes, ba-Baptistes, ba-Presbytériens, òngumba dyà beena Mpenta. Tudi bamanyè citùdi twamba! Muntu nànsha umwe kèna ùlombola. . . kààkutwàmbila bwalu to!” Ki bwalu abu’s. Kabàyi batekesha to! Kabàyi bakùdìmùne mucima to! Kabàyi ne dinanga òtù naadi bantu edi to! Bashipi bàà bipungidi! Bashiminyinyanganyi bàà maalù! Kabàyi ne kudikànda! Ne bapeetudi bàà aba bàdi bìmpè! Biikàle ne cimwènekelu cyà. . .

²⁵⁰ [Katùpà kàà mukàbà wà mèyi munda mutupù—Muf.] . . . kenkètaayi aci mpindyewu. Ne mvw’a kunanga ànu kusùsulula cintu aci mpindyewu mene, kàdi ndi. . . bwà kumòna mwàkuyaci pa mukàbà wà mèyi ewu, nànsha bìshi. Kàdi katwèna ne díbà dyà kucyènza to. Mpindyewu, s’nudi bumvwè’s. Mbanganyi

bàdi bumvwè? Ambàayi “Amen.” [Disangisha dìdi dyamba ne: “Amen.”] Nwamònu’s, ebi bìdi . . .

251 Zoon ncinyi, Z-o yìbìdì-n awu? Bifùkìibwà bìdi ne mwoyi. Ncìfwànyine kushindumunyiibwa Zoon, Z, o yìbìdì, n. Nwènu nudi bafwànyine kucishindumuna bishi, “Zoon” awu? “Zoon,” mûndi mêmè mufwànyine kwamba’s.

252 Kàdi *therion* ùdi yèyè t-h-e-r-i-o-n, *therion*, nwamònu’s. Pa nàнку aci cidi cyùmvwija “nyama kayiyi mitekesha, mitombòke, yà mwitu.” Ki cidi nyama ayi. . . Angàtà webè. . . angàtà nkòngamyakù webè wa cyena-Ngelikà awu kàdi wàlukilè buludì ùmonè ní kí mmwakù wùmfwèwùmfwè awu. Tàngilà mwómò amu ùwùmònè. Angàtà webè—angàtà mukàndà webè wà dilongeshangana naawù cyena-Ngelikà, wàngatè Emphatic Diaglott webè awu. Mpindyewu, jandùlābi ní kí ncilelèlā, bwà ne ncilelèlā, bwà ne cidi cyùmvwija “nyama udi kàyi mitekesha,” mu Bwàkabuulwibwà 11, 13 ne—ne 17 amu.

253 Kàdi mu Bwàkabuulwibwà 4 emu, cidi cyùmvwija “Cìfùkìibwà cidi ne mwoyi,” kaciyi *nyama* to; kàdi ncìbìikìidìibwe ne “nyama” kàdi kí nnàнку to. Cintu cìmwècìmwè aci mu Yèhezèkèlè 1.8, 1 too ne ku .28, ncyôci. Pàmwāpa netùkakùfikè mu katanci kakesè emu.

Èyo: “Nyama kàyi mitekesha, kàyi mukùdimùne mucìma, mutombòke.” Kàyi mitekesha!

254 Kàdi *ebi* bìdi “Bifùkìibwà bìdi ne mwoyi.” Mbinganyì? Kí m’Banjèlo to. Ndi nnwàmbila, túbalāayi mu Bwàkabuulwibwà 5, ànu luseke lukwàbò lwà dibeji alu. Bwàkabuulwibwà 5, ku mvensà wa 11:

Ne ngàkatàngila, ne. . . ngàkumwva dìyì dyà banjèlo bààbùngì (“banjèlo,” ku bungi) mu nyungulukilu wa nkwaswa wa butumbi (“Ne” mmutwàngaji.) ne nyama ne. . . bakùlù: . . .

255 Nwamònu’s, “ne,” mutwàngaji. Nwamònu anyi? Kabàvwa Banjèlo, anyi kabàvwa bakùlù to, bìvwa “Bifùkìibwà bìdi ne mwoyi” ku Nkwasa wa butumbi. Kaa, kanwènaayikù banangè eci anyi? Bifùkìibwà bìdi ne mwoyi! Kí m’Banjèlo to, bwalu eci cidi cìcìjaadika mwaba ewu mene, nwamònu’s:

. . . ngàkatàngila, ne. . . ngàkumwva dìyì dyà banjèlo bààbùngì mu nyungulukilu wa nkwaswa wa butumbi ne nyama ne bakùlù: . . .

256 Mpindyewu kùdi mìshindù yìsàtù mishiilàngàne mwaba ewu. Ndi ntèkemenà ne nudi bònsò ne ndongolwelu ewu kwìnshì eku mpindyewu. Mpindyewu, ndi muswè nnùleejè. Kùdi mìshindù yàcì misungùlùkee yìsàtù mishiilàngàn, misungùlùke yìsàtù mishiilàngàne (Mpindyewu, tàngilāayi.) mu nyungulukilu wa Nkwasa wa butumbi.

257 Ki Nkwasa wa butùmbi *ewu*. Mpindyewu, byà kumpàla ku Nkwasa wa butùmbi ewu m’Bifùkiibwà binaayi bidì ne mwoyi. Pa kuumusha abi kùdi (ànu nùнку *ewu*) bakùlù makùmi àbidì ne bànaayi basòmbe pa nkwasa wa butùmbi, pa nkwasa yàbò—yàbò yà butùmbi, nkwasa yà butùmbi mikesè mwinshì amu. Ne mu nyùngulukilu wa cyòci eci, mùdi misùmbà minenè yà Banjèlo banyùngulùkile Nkwasa wa butùmbi awu. Nudi bumvwè cìndi muswè kwamba aci anyi? Mbashiilàngàne bònsò, ewu ne ewu. Ki Banjèlo *bàba*; ki bakùlù *aba*; ne ki Bifùkiibwà bidì ne mwoyi *ebi*.

258 Katwànji kushìya aci to bwà katanci. Tùcilamàayi ànu mwaba awu bwà katanci, “Bifùkiibwà bidì ne mwoyi.” Byòbì mbinganyi piikalàbi kabiyi Banjèlo, kabiyi bantu bapikula? Mbinganyi? Nudikù baswè kumanya anyi? Dyànyì dyumvwija ndyòdi edi. Ndi ntèkemena ne ndyà cyà bushùwà; ndi ngiitabuuja ne ndyà cyà bushùwà. Mbalami bàà Nzambi bàà Nkwasa Wendè wa butùmbi. Mpindyewu, netùkupulè eci ànu kakesè cyanàànà. Mpindyewu, nudi numòna’s, byòbì kî—kî m’Banjèlo anyi bantu to. Kî nnyama mitombòke nànsha. M’Bifùkiibwà, “Bifùkiibwà bidì ne mwoyi.”

259 Mpindyewu, ki Nkwasa wa butùmbi wa Nzambi nyèyè *ewu*. Ne ki balami Bèndè mbòbò *aba*. Twànjàayi kubala ànu ndambù wa cyòci aci bwà tujandulè mu tusunsa tukesè emu. Nwamònu’s, bòbò abu m’Banjèlo bàà Nzambi anyi balami bàà Nzambi bàà Nkwasa Wendè wa butùmbi, nènku bàdi... Twàngataayi... ànu—ànu bwà katanci kakesè cyàkàbìdi cyanàànà, twàlukilàayi ku Yèhezèkèlè. Ndi—ndi ne bintu ebi bifùnda mwab’ewu, kàdi ntu ànu ngumvwa bibì bwà kubipità, ndi mumanyè ne eci cìdi... [Katupà kàà mukàbà wà mèyi munda mutupù—Muf.] Twàlukilàayi ku Yèhezèkèlè nshapità 1, ne tubàngilàayi ku mvensà wa 12 too ne ku wa 17, katanci kakesè cyanàànà.

Ne byàkaya byònsò kumpàla buludì: . . .

260 Mpindyewu, netwikalè mwà kutàpa dísu mu tusunsa tukesè... Nènku nudi bavùlùke mvensà wa 7 ewu kaaba aka, mpindyewu, kutàngila mmwènekulu uvwabi nendè kaaba aka mu mvensà wa 7 wa nshapità umwèumwè wa Bwàkabuulwibwà awu, “binaayi.”

Ne nyama wa kumpàlè ùvwa mufwànàngàne ne nyama wa ntambwe... nyama mwibìdi ùvwa mufwànàngàne ne kànà kàà ngombe... nyama mwisàtù ùvwa kwìsù... ùvwa ne... kwà muntu, ne nyama miinayi yìvwa mifwànàngàne... mikankù mùkàle yìbùùka... nyama mwinayi... mufwànàngàne ne mukankù mwikàle wùbùùka.

261 Mpindyewu, Yèhezèkèlè pààkamònàye Butùmbi bwà Nzambi, wàkamòna cintu cimwècimwè cyàkamònàbo kùdi Yone aci. Nudi bavùlùke mu dyàlumingu dishààle mutùvwà bangàte “Butùmbi bwà Nzambi,” ne bangàte fòtò mùvwàYe

muDikwàcishe neetù amu anyi? Nudi bavùlùke aci anyi? “Butumbi bwà Nzambi,” cintu cimwècimwè cyàkamònàbo kùdì Yèhezèkèlè, cintu cimwècimwè cyàkamònàbo kùdì Yone aci, s’ki Cyôci eci leelù ewu. Cidi cyènza Yesù Kilistò umwèumwè awu mu cikondo cyà Yèhezèkèlè, cintu cimwècimwè civwà pa buloba apa aci, Nzambi umwèumwè udi neetù leelù ewu awu; umwèumwè awu makèlèlèlè, leelù, too ne kashidi; Ewu Uvwakù, Udikù Awu, ne Wâlwa Awu; cibweledi cyà musùùkà, mubidi, ne nyumà; mbù wa cyamù cyà mitakù (Dîyi), Mujididi wa musùùkà wètù, ne Muuji wa ne Nyumà Mwîmpè. Cintu cimwècimwè aci, nwamònu’s, ànu byà mwomùmwè!

262 Mpindyewu, tàngilàayi eci. Èyo:

*... ne nyumà...kwònsò kùvwàbi bìya aku;...
mpindyewu...bwà kuya, bìwa bìya; kàdi kabìwa
bìkùdimuka pàvwàbi bìya apu to.*

263 Kayìvwakù mwà kukùdimuka to. Bu yôyi yìya mu *nùнку*, yìvwa yìya byenzè bu muntu; yôyi yìya mu *nùнку*, yìvwa yìya bu mukankù; yôyi yìya mu *nùнку*, yìvwa yìya bu ngombe; yôyi yìya mu *nùнку*, yìvwa yìya bu nyama wa ntambwe. Kayìvwa mwà kwalukila cyànyimà to! Yìvwa ne cyà kuya kumpàla kwònsò kùvwàyi yìya aku, yònsò wa ku nyama ayi. Mpindyewu, *nyama* ùdi ùmvwija cinyi mu Bible? Bukolè. Èyo, ùdi ùmvwija “bukolè kampànda.”

264 Mpindyewu:

Bwà bìdì bitàngilà difwàngana dyà bifùkùbwà bìdì ne mwoyi, ne mmwènekèlu wabi ùvwa bu mùdì makàlà a kapyà munkaci mwà kuteema, ne bu mùdì...wa... mmwènekèlu wa myèndù: civwa cibànda cipweka munkaci mwà bifùkùbwà bìdì ne mwoyi abi; ne kapyà kàvwa kakolè, ne mu kapyà amu mùvwa mùpàtuka bukènkè.

Awu n’Nzambi. Mu kapyà mùvwa mùpàtuka Bukènkè; mpindyewu, kabùyi bukènkè bwà mu cibwàshìbwàshì to, Bukènkè bwà Cyèndèlèlè.

Ne bifùkùbwà bìdì ne mwoyi abi bìvwa bìnyeema ne bìkùdimuka (Tùmonèbi)...bifùkùbwà bìdì ne mwoyi abi bìvwa bìnyeema ne byàlukila, ne bu mùdì mmwènekèlu wa dipenya dyà mukenyi wà mvùla.

Mpindyewu pàmvwà mmòna bifùkùbwà bìdì ne mwoyi abi apu, mònaayi lukatà lumwè pa buloba ku luseke lwà bifùkùbwà bìdì ne mwoyi abi, ne mpàlà yèndè yìnaayi.

Mmwènekèlu yà nkàta...mudimu wàyì wùvwà mufwàngàne ne...diikala dyà...dibwe dyà mushinga mukolè dyà beryl: ne yôyi yìnaayi yìvwa ne difwàngana dimwè: ne mmwènekèlu wayi ne

mudimu wàyì bìvwa . . . cìvwa lukàtà munkaci mwà lukàtà.

265 “Cimfwànyì aci mwaba ewu ncinyì, Mwanèètù Branham? Ncinyì?” Cìdi cyùmvwija ne balami aba—balami aba bàvwa mmushèètè wà cipungidi wà Nzambi . . . Bàvwa mu lwendu, bàbùngulukila pa nkàtà pàvwà Yèhezèkèlè ubàmòna apu; kàdi pààkabàmònà Yone, bàkaavwa bamanè kubwela mu kaaba kààbò kàà menemene mu Dyulu. Mushèètè wà cipungidi wà Nzambi wùvwa pa buloba, wùbùngulukila pa nkàtà, pàvwàbò bàya naawù ku mwaba ne ku mwaba, byùmvwija ne wùvwa mu lwendu, bàkawàngata kwenda naawù mu cipèèlà cijimà amu too ne mu ntempèlù ne bikwàbò; kàdi mpindyewu wùkaadi mwangàcìbwe muulu bwalu bikondo byà Èkèleeziyà byàjiki, ne mwangàcìbwe muulu mu Butùmbi. Nwamònu anyi? Wùkaadi mushààle kaaba kàmwè mpindyewu, mu Dyulu, pàmwè ne Baanjèlo bònsò ne bikwàbò biwùnyùngùlùkile. Tudi tubàmòna paanyimà pàà katanci bàtùùla bifulu byàbò byà butùmbi ne bàpòna batwè mpàla panshì biikàle bàfila butùmbi kùdiYe. Nwamònu anyi? Bàvwa balami bàà Nzambi bàà ntempèlù, bàà mushèètè wà cipungidi.

266 Mpindyewu, vùlukàayi balami bàà Nzambi bàà mushèètè wà cipungidi, anyi bàà nkwasà wa ngàsà. Mpindyewu, vùlukàayi. Bivwa bùngi kaayi, byàkamònàbo kùdi Yone abi, bùngi kaayi? Binaayi. Mbùngi kaayi bùvwàye—bùvwàye *yéyè* mumòne? Wàkamòna pèndè Bifùkiibwà bìdi ne mwoyi, binaayi. Mpindyewu, tàngilàayi, bònsò bàbìdi bàakamòna cìkèènà-kumòna cimwècimwè aci.

267 Ne inaayi ùdi nombà wa buloba. Nuvwakù bamanyè nàнку anyi? Mpindyewu mbanganyì bàdi bamanyè kumpàlà kwà twètù kubwelamù ne, *inaayi* ùdi nombà wa pa buloba? Bushùwà! Bu mùdi beena Ebèlù bànaayi . . . Ngwa pa bulob— . . . Nnombà wa buloba, wa “disùngidiibwa, disùngidiibwa.” Mpindyewu, kanùpu aci mwoyi to, “disùngidiibwa,” bwalu nèngiikalè mwà kucilenga, ànu katanci aka, byà bikolè menemene. Nwamònu’s, “Disùngidiibwa!” Mpindyewu, kùvwa bânà bàà beena Ebèlù bàsàtù mu cikùtù cyà kapyà, kàdi Mwinâyì wàkalwa, cìvwa ndisùngidiibwa. Lazàrò ùvwa mu lukità matùkù àsàtù, kàdi pààkalwà diinâyì yéyè wàkasùngidiibwa. *Inaayi* ùdi nombà wa Nzambi wa “disùngidiibwa,” pa nàнку bìvwa bileeja ne Baakampàndà aba bàvwa ne cyà kwikala ne cintu kampàndà cyà citàngila buloba.

268 Ndi ntèkemena ne kanwèna mpindyewu ne nzala mipitèpìte bùngi to. Ndi ntèkemena ne nzala yènù yà nyuma yìdi ndambù—ndambù kumutù kwà yènù yà mubidi mpindyewu. Nwamònu anyi? Èyo.

269 Mpindyewu, mònaayi: “Bìdi ne mèsù” (mu Yèhezèkèlè emu) “kumpàlà ne paanyimà ne munda.” Twànjàayi kucibala.

Tàngilàayi kùneeku, nwamònu's. Nudi numòna mwómò emu, ngeela meeji ne mbambè mwaba ewu ne, "nyama," mpàlà yinaayi, mùdì mukankù amu, ne mapwâpwâ, byûle tètè ne mèsù pambèlu, ne munda. Tàngilàayi kùneeku apa:

Nènku nyama yinaayi ayi ne yònsò wa kùdìyi ùwwa ne mapwâpwâ àsambòmbò pa yéyè; . . .

270 "Ne bìwwa bìbùuka," ne bikwàbò, "ne bìwwa ne mèsù pambèlu, munda, ne paanyimà." Cìwwa cyàmba bwà meeji ààbì. Bìwwa bimanya cìwàku, cìdiku, ne cyàlwà; bwalu bìwwa menemene ànu ku Nkwasa awu, pabwìpì menemene mu mùshindù wà ne kabìwwa nànsha bantu to. Balami bàà ntempèlù, anyì, kì mbalami bàà ntempèlù to (Balami bàà ntempèlù, mbinunu lukàmà ne makùmi ànaayi ne binaayi abi.), kàdì aba mbalami bàà nkwasà wa ngàsà, balami bàà Nkwasa wa butùmbi, Nkwasa wa butùmbi, ànu pabwìpì menemene ne Nzambì, "Bifùkùbwà bìdì ne mwoyi," cintu cìdì cilondèle Nzambì, biimàne mwaba awu. Meeji ààbì, mbimanyè cìwàku, cìdiku, cyàlwà. Bìwwa ne "mèsù pambèlu," bileeja cìwàbì mwà kumòna, cìwwa ne cyà kulwa; "mèsù munda," bimanyè byònsò mpindyewu; ne "mèsù paanyimà," mmwòmumwè ne bìwwa bimanyè cikaavwàku. Cìwàku, cìdiku, cyàlwà, bileeja mu bikondo byònsò byà èkèleeziyà "Ewu Uvwakù, Udikù Awu, ne Wàlwa Awu; Yesù Kilistò umwèumwè awu makèlèlè, leelù, too ne kashidi."

271 Ikàlaayi babìkwàte mpindyewu. Netùlumbatanganè ne cintu aci bikolè ku cibàsà eku mu tusunsa tukesè emu. Cìtàngilaayi. Mpindyewu, bwà katancì kakesè cyanàànà.

272 Cìbuulula meeji ààbì, ne cìwwa cileeja ne bìwwa bimanyè, mbimanyè. Bìwwa bimanyè matùkù ònsò àcìwà àlwa ne a mpindyewu ne a kale, ne byònsò bìdì biàtàngilà!

273 Ne wabì. . . Kabìwwa bìcyòka to. Kacya kabìwvakù bipetè dicyòka to. Kabìwvaku mwà kwikala ne cintu nànsha cìmwè cyà cìpetangana ne muntu to, yéyè ùdì ùcyòka. Kàdì byòbì kabìwva bìcyòka to, bìwva bimba ne "Wa cijila, wa cijila, wa cijila! Wa cijila, wa cijila, wa cijila! Wa cijila, wa cijila, wa cijila, wa cijila, wa cijila, wa cijila, wa cijila, wa cijila, wa cijila, wa cijila!" munyà mujimà ne bufùkù bujimà mu cikondo ne cikondo cyònsò. "Wa cijila!"

274 Twànjàayi kwalukila cyànyimà bwà katancì cyanàànà. Twànjàayi kwalukila cyànyimà, ndi ne Mufùndu mu meeji, Yeshàayi 6, lukàsàlùkàsà. Tàngilàayi! Yeshàayi wàkamòna cintu ànu cyòcì cìmwècìmwè aci menemene.

275 Cìkèènà-kumòna cyònsò cyà kùdì Mukalenge. . . Ki cìndì ngamba. Bìkèènà-kumòna bitùdì naabì leelù ewu byòbì kabìyi bìkèènà-kumòna byà Bible ànu menemene to, dìbà adi mbyà mafi. Byòbì bidìleeja, anyì, dibuulula kanà dyònsò didì dilèejà Nzambì mwikàle cintu kampànda cìdì kaciyi cìwàYe

misangu yònsò to, ndibuulula dyà mashimi. Èkèleeziyà mujimà mmwibakilapù, Maataàyi 17.

²⁷⁶ Tùmonààyi, Yeshààyi, nshapità mwi6. Mupròfetà wa citende awu ùvwa mweyèmene pa mabòkò a mfùmù mwímpè awu, ne ùvwa mumusùmbile bilàmbà bilenga byà mishindù yònsò. Ne yêyè ùvwa mupròfetà, ne ùvwa musòmbe ànu bímpè kwònsò kùvwà...Kàdi dīngà ditùkù mfùmù awu kufwàye, pa nàнку kukèngelabi bwà—bwà kudikèbululayè nkààyendè. Ki kuyayè ku ntempèlù bwà kusambila. Bwalu wàkabanga kupàtuka ùmuka mu mwaba wùvwà mfùmù ùsanganyibwa awu, dibà adi, bwà kupeta...Mfumu mwímpè wa kale awu ùvwa muntu mwímpè wa cijila. Kàdi kupàtukayè e kumònyè mùvwà nsòmbe lu vwa nendè bantu abu, ki kuyayè ku ntempèlù. Mpindyewu, tèlejàayi.

Mu cidimu cyàkafwà mfùmù Uzìyà awu ngákamòna kàbìdì Mukalenge musòmbe pa nkwasà wa butùmbi, mutùmbùke ne mubàndisha kuulu, ne musùmbà wà paanyimà pèndè wùvwa muujè ntempèlù tètè.

²⁷⁷ Butùmbi's wè! “Musùmbà wà paanyimà Pèndè” ncinyi? Ki wòwò awu's: “Banjèlo, Baakampànda,” musùmbà wà paanyimà Pèndè wùvwà wènda wùMulonda. Musùmbà wà paanyimà mbàdi bàlwa paanyimà abu, nwamònu anyi?

...musùmbà wà paanyimà pèndè wùvwa muujè ntempèlù tètè.

Ne kumutù kwàwù kùvwa kwimàne baselèfimà: ne yònsò wa kùdìbo ùvwa ne mapwàpwà àsambòmbò; ne àbìdì ùvwa mubwikile kwìsù...ne àbìdì ùvwa mubwikile makàsà, ne ne àbìdì ùvwa ùbùuka naawù.

Ne umwe ùvwa wèla mukwèndè lubilà, wàmba ne: Wa cijila, wa cijila, wa cijila, m'MUKALENGE wa bilwilu: ne buloba bujimà mbùle tètè ne butùmbi... .

Ne pàvwà makunji a ciibi manyungè ku dīyì dyà uvwa wèla lubilà awu, nènku nzùbu wàkuula tètè ne mwìshì.

²⁷⁸ Ekèlekèlè! Kaa, ekèlekèlè! Aci's cidi cileea ne bikèèna-kumòna abi bidi menemene ànu byà mwomùmwè kùdi yònsò wa ku bantu abu. “Wa cijila, wa cijila, wa cijila!” Kabèèna bàcyòka to, muunyà ne bufùku ne: “Wa cijila, wa cijila, wa cijila, kùdi Mukalenge!”

²⁷⁹ Twànji twàlukilààyi bì paanyimà katanci kakesè cyanààna mpindyewu, bwà twikalè batwìshìbwe ne tudi bumvwè bantu aba bímpè. Musangu wà nzànzànzà wàkatèediibwàku balami aba, mmu Genèsè. Mpindyewu, vùlukàayi ne, cyònsò citùdì tuyiisha bikèngela cyùmukilè ku Genèsè too ne ku Bwàkabuulwibwà. Dìbà kanà dyònsò dyùdì muswè kwela lukonko, lwà ùngeelè mèmè. Nwamònu anyi? Cidi ne cyà kwikala Bible mujimà, kacyi ànu katùpà kèndè to, bwalu

Nzambi kàtu ùshintuluka to! CìvwàYe mu Genèsè aci, ncìdìYe leelù, ne ncìvwàYe mu Moyen Âge. Yèyè ùdi misangu yònsò ànu umwèumwè awu! Nwamònu anyi? Mpindyewu, mu Genèsè, pàvwà Bakèlùbà aba . . . Ki mûndì mufikè ku dibapeta's, bìvwa binkèngèle kwalukila paanyimà bwà kujandula cìvwàbo ku cibangidilu.

²⁸⁰ Tùbuululàayi mu Genèsè 3.24, bwà katanci cyanààna mpindyewu. Genèsè, nshapità mwi³ ku mvensà wa 24. Nudi baMunangè anyi? [Disangisha didi dyamba ne: "Amen."—Muf.] Èyo. Mpindyewu, tùbangilàayi lwà ku mvensà wa 22. Mémè—mémè ntu munangè Eci èyo! Eci ncintu cìndi ànu muswè kwela mwómò emu, ànu ndambù mukèsè cyanààna wa disàkidila, kàdi cìdi mwà kwenza bìmpè menemene dîngà ditùkù.

Ki MUKALENGE . . . kwambayè ne: Mònaayi, mulùmè wàlu . . . umwe wetù, . . .

²⁸¹ Mpindyewu, nwènù bânà bèetù bàà bakàjì bananga ne bàà mushinga mukolè ne banangìibwe (Lekèlaayi ncitèèkè mùshindù awu.), kanwèdikù meeji ne ndi nkùpa bukènkè bùdi pa lù—lulamatu ne pa buumaamù bwà musàngeelu, bwà mushinga mukolè abu to. Ndi nteeta kuleeja apa ne cìdi muntu mukàjì . . . Bu nwènù mwà kuswà! Ne nwènù batèeleji bàà mikàbà yà mèyi, nwènù bakàjì bìikalà mwà kutèeleja mukàbà wa mèyi ewu abu, ncyèna nteeta bwà kunüdyombola to, Mémè ndi ànu musadidi cyanààna wa Mukalenge bwà kutwàla Bukènkè. Cintu cyà citàmbe kwikala cyà ciipanshi ne cyà nsòmbelu wa masandi ne cyà citàmbe kwikala cikoooyike pa buloba mmukàjì pàdiye mubi. Kàdi cilengà cyà citàmbe kwikala cyà mushinga mukolè cìdikù bwà mulùmè, pa kuumusha lupàndù lwèndè, mmukàjì mwìmpè. Nènku ndi ngambila wa ciipanshi, wa nsòmbelu wa masandi, mupwekèshìibwe milongo awu. Ne nêngìikalè mwà kunùleeja kaaba aka mene patùcìdipù apa, bipìcìibwe ne mémè munùleejè bwà cinyi ndi . . . ne Bible ùdi ùlongesha bwà bakàjì kabìikadi bayiishi, bampaasàtà, balongeshi, anyi ní ncinyi cìkwàbò cyònsò mu èkèleeziyà. Mpindyewu, tèèlejaayi ànu eci:

Ki MUKALENGE . . . kwambayè ne: Mònaayi, mulùmè wàlu . . . umwe wetù, (Mpindyewu, Yèyè kàakamba ne mukàjì wàkalwa umwe wabò to, "mulùmè wàlu umwe.") . . . ne mumanyè bìmpè ne bibi: . . . (Mukàjì yèyè kàvwa mumanyè to; yèyè ùvwa museeswìshìibwe. Nudi nucimòna anyi?)

²⁸² Mpindyewu, Pòlò mmwambè ne: "Ncyèna ngiitaba bwà mukàjì kulongeshayè anyi kunyèngayè bukòòkeshi nànsha bwà bìshi to, kàdi . . . bwalu Adàmà ngwàkenjiibwa dyàmbedi ne pashìishe Evà. Ne Adàmà kî ngwàkaseeswìshìibwa to, kàdi mukàjì ngwàkaseeswìshìibwa." Pa nàнку mukàjì kàakalwa umwe ne Nzambi to. Kàvwa ne cìvwàye mumanyè to, ùvwa museeswìshìibwe. Nudi bacyùmvwè anyi? Nwènù bacyùmvwè,

ambàayi “Amen,” bwà mèmè... [Disangisha didi dyàmba ne: “Amen.”—Muf.]

... *MUKALENGE... kwambayè ne: Mònaayi, mulùme wàlu... umwe wetù, bwà kumanya bìmpè ne bibi: nènku kumanya... nènku mpindyewu, bwà kikkadi wàluwa kwolola cyanza cyèndè, wàngata kàbìdì ku mucì wà mwoyi, ne wàdya, ne wikala ne mwoyi bwà kashidi:*

Ki bwà cinyi MUKALENGE... wàkamuumusha mu budimi bwà Edènà, bwà kudimayè buloba kwàkangaciibwàye.

Pa nànkù yéyè wàkiipata mulùme; ne wàkatèeka Bakèlùbà ku esètè kwà budimi bwà Edènà, ne mwelè wà mvità mu lupeepèle... mwelè wà mvità wà kapyà mwikàle wùnyùnguluka ku nseke yònsò, (Nudi bamòne nyama yinaayi ayi anyi? Kùdi nseke ànu yinaayi kùdi mwà kuya, nwamònu’s: esètè, nord, wesètè, ne sud. Bakèlùbà aba bàvwa ne mwelè wà mvità wà kapyà ku ciibi cyà lupangu...) bwà kulama njila wa ku mucì wà mwoyi.

²⁸³ Bwalu bu muntu mwà kulenga cyanza ku Mucì wà Mwoyi, dîbà adi ùvwa mufwànyìne kwikala ne mwoyi bwà kashidi.

²⁸⁴ Nènku Bakèlùbà aba, batèèdiibwe bwà musangu wà nzànzànzà, bàakatèèkiibwa ku esètè kwà lupangu, bàya ku nseke yinaayi. Bìvwa bikèngela mèmè kwikala mwenzè aci cishìlàngàne ndambù ne cyòcì aci; ncyèna ne mùshindù wà kwenza bikùmbànàngàne menemene ne mèyi matùma a Nzambì ne bikwàbò mùshindù awu to, kàdi ndi—ndi ànu... bwà nùmanyè cìndì muswè kwamba. Ki budimi bwà Edènà *mbwòbù abu*. Ne ciibi ncyeci *apa* mene, cìkàngukila *apa*, cyùnzuluka cìshààla bwàshì, ne ku ciibi eci kùvwa Bakèlùbà. Bakèlùbà! Nènku, vùlukàayi ne, kî mbambè ne “Mukèlùbà” to, mbambè ne “Bakèlùbà.” Bakèlùbà bàakatèèkiibwakù bwà kulama Cinyi? Mucì wà Mwoyi. Ki Cìvwàbo ne cyà kulama, Njila wa ku Mucì wà Mwoyi. Njila, Udi Njila awu Nganyi? [Mwanèètù wa balùme kampàndà ùdi wàmba ne: “Yesù.”—Muf.] Ciinè aci ncileejila penyì? Mwaba wà cijila ngwòwò *ewu*, Bakèlùbà mbòbò *aba*.

²⁸⁵ Mpindyewu, tàngilàayi, fùndaayi byònsò ebi. *Ewu* ki wà Cijila—wà Cijila... Mwaba mutàmbe cijila *ewu*, Mwaba mutàmbe cijila, *ewu* mmwaba wà cijila, ne mbù nyèyè *ewu*, ne tùndeyi twà bukènkè ntwòtò *etu*, mwandamutekètè yidi yìfidilà Bukènkè *apa*, munda *emu*, munda *emu*, munda *emu*, munda *emu*, munda *emu*. Nwamònu anyi? Yidi yìleeja cinyi? Yidi yilama ne yìleeja ne Kapyà kàà Nzambì Njila wa ku Mucì wà Mwoyi awu. Nwamònu’s, kacyèna mwà kufùmina lwà *apa*, sèminèrè wa ba-Presbytériens anyi sèminèrè wa beena Mpenta to, bikèngela cifuminè *Apa*, ciikàle cìleeja Bukènkè. Eyo.

286 Nudi numòna's, Bakèlùbà bàvwa Yone mumòne apa ababa bàvwa ne cyà kwikala batùme ntèmà ku dilama dyà Muci wà Mwoyi, pa nàнку bàvwa ne cyà kwikala batùme ntèmà kùdi bantu. Anyi nùbalàayi Genèsè, twalukila cyàkàbìdi ku Genèsè ne: "Bàvwa bàlama Muci wà Mwoyi, bàWùlama, Njila wa ku Mwoyi." Njila wa Mwoyi! Njila awu ùdi bìshi? Yesù wàkamba ne: "Mémè ki Njila awu. Mémè ki Dyàmpà didi difùme kùdi Nzambì mu Dyulu adi. Muntu yéyè mudyè Dyàmpà edi, neikalè ne mwoyi kashidi." Mpindyewu ki Njila wa dyalukidila ku Muci wà Mwoyi awu nyawù. Nwacyùmvù anyi?

287 Mpindyewu, ku eci, ndi muswè mpindyewu kuleeja ne kucivwija cyà bushùwà ne: ncyoshelu. Mpindyewu, eci civwa ne cyà kwikala cyoshelu mu budimi bwà Edènà. Ndi nzwàmbila ne mbwà cinyi. Nudi bavùlùke ne Kaayinà ne Abèlè bônso bàbìdi bàakalwa mwaba mwinè ewu bwà kukuukwila anyi? Pa nàнку aci cìdi cileeja ne cyoshelu cyà Nzambì cyàkatentemunyiibwa ne kutèèkiibwa mwaba ewu mu budimi bwà Edènà, ne njila umwèpelè wa dyalukidila mu Edènà nku cyoshelu. S'ki bwalu mbwòbù ebu cyàkàbìdi, nwamònu's, kwalukidila ku cyoshelu bwà kuya mu Edènà. Nèнку bàvwa ne cyà kulama njila awu kuntwaku, kumulama, bwà kabìikadi bàalwa kwalukilamù to pàvwà cyoshelu eci kaciyi cibwikila kùdi mashi.

288 Éyi Nzambì, bantu kabèènakù mwà kucimòna anyi's? Nwamònu's, kakùyi cingà cintu to ànu Mashi! Bikèngela kwikalè difuta dyà cibawu, nkwaswa wa ngàsà mwaba awu, cyoshelu cyà cilumbulwidi eci cìdi ne cyà kulwa nkwaswa wa ngàsà; ne piikalà cyoshelu eci, piikalà Mashi muumusha, mu Ditùkù dyà cilumbulwidi adi nekwikalè kapyà kàa cijji cikolè cyà Nzambì bwà kulama cyàkàbìdi wòwò Muci awu. Cintu cìdi ànu cimwèpelè cyàbwelà cyàkàbìdi ku ciibi cyà Edènà eci, neciikalè nku Mashi a Yesù Kilistò. Nudi nucimòna anyi?

289 Mpindyewu, mònaayi. Èyowà, mpindyewu Kaayinà. . . Kaa, ki Kaayinà ewu; ne ki Abèlè ewu, Abèlè. Èyo. Mpindyewu, nsongàalùmè yònsò yibidi ayi yidi yilwa ku ciibi cyà lupangu eci bwà kukuukwila. Ncyà bushùwà anyi? Pa nàнку civwa ne cyà kwikala cyoshelu cyà Nzambì. Ncyà bushùwà anyi? Ne kumpàlà kwà cyoshelu eci bôbò bàakiibaka mupinganyi, cyoshelu cikwàbo. Cyoshelu cilelèlè cyà Nzambì ncyôci eci, cidi mu mwoyi wà muntu. Pashiishe kùdi cikwàbò cyoshelu kwìnshì eku, civwà cileeja Mwaba mutàmbe cijila mu mwaba wà cijila.

290 Kaa! Kaa! Ndi ndyùmvwa ànu bu muswè kwakula mu myakulu's. Kaa, ekèlekèle, Butùmbi bwà. . . Kanwènakù mwà kumòna ne nCipwàngàne anyi? Mònaayaakù ànu cyanàànà! Kaa, cìndi mwambìlè nàнку, mbwalu ncyèna mwà kupeta mèyì búngì bukùmbàne mu wànyì mùshindù sungasunga wà mwakulu wà Anglais bwà kwamba njiyà yìndi naayi to. Nwamònu's, bikèngela bwà cintu kampànda cyàmbè patòoke.

291 Bu mùdì Mwanèètù Rowe, diplòmatè wa Mfùmù wa ditùnga... Bamfùmù bàà ditùnga batwè ku bànaayi anyi bàtaanu, kwambayè ne: “Kaa, Mwanèètù Branham, dilòlò kampànda ndi mulwè mu disangisha.” Yèyè ne: “Ncìvwa mumanyè cyà dyanza to,” yèyè ne, “mvwa mwimanè mwaba awu.” Ki yèyè ne: “Kaa,” yèyè ne, “ntu munangè Mukalenge matùkù àànyì ònsò a mwoyi.” Yèyè ne: “Ntu” (ngeela meeji) “Épiscopalien.” Yèyè ne: “Ne mvwa ndyàmbidila ne mvwa mumanyè Mukalenge.” Yèyè ne: “Kàdi dilòlò kampànda mèmè kukènzakana, ncìyi mumanyè cyà dyanza to.” Yèyè ne: “Ncì—ncìvwakù mufwànyine kubwelamù pàànyì ànu nàнку cyanààna to, kàdi” yèyè ne, “mèmè kuumvwa Diyì dipàtuka. Kaa, ki kubangaDì kulwa.” Yèyè ne: “Mèmè kubanga nkàadi ntwà eku ntwà eku pambèlù pàà nntèta apu, ntwà kumpàla ntwà paanyimà,” ki yèyè ne “dyàkàmwè ncìvwakù mwà kwindila bwà kufika ku ciibi to, mèmè kuya ngenda nkalaba mwinshì amu pààkenzekà dibìikila dyà ku cyoshelu apu, ki mèmè kuya lubilu ku cyoshelu e kudyèla panshi, yèyè ne: “Mukalenge, mèmè ndi ngènzàmpèkàatù!” Ki yèyè ne: “Dibà adi Yèyè kunguuja tètè ne Nyumà Mwimpè Wendè.”

292 Ki yèyè ne: “Ndi mwà kwakula myakulu mwandamukùlù mishìilàngàne,” bwalu yèyè ndiplòmatè’s. Nwamònu anyi? Yèyè ùtu... ùtu mu... ùtu—ùtu dì—diplòmatè wa Mfùmù wa ditùnga, ne... kacya ànu ku Woodrow Wilson too ne leelù. Yèyè ùtu diplòmatè wa yònsò wa ku Bamfùmù bèètù bàà ditùnga, diplòmatè bwà matùngà a ku baabèndè, mumanyè mwà kwakula mwakulu mwenyi kàna wònsò ewu. Yèyè ne: “Ndi mumanyè pabwìpì ne mwakulu wònsò wà pa buloba wùdìbo bàfùnda ewu.” Kàdi yèyè ne: “Mvwa mùle tètè ne butùmbi mu mùshindù wà ncìyiku mwà kwakula nànsha wùmwe wà ku yòyi ayi bwà kuMutùmbishakù to, pa nàнку ki Mukalenge kumpèshaYè wà mupyamùpyà wà mu Dyulu bwà mèmè kuMutùmbisha naawù.” Kaa! Kaakakakaka! Ki bwalu mbwabù’s.

293 “Balamè ciibi eci.” Kaayinà ne Abèlè kulwabò kaaba aka bwà kukuukwilabò. Pa nàнку cìvwa ne cyà kwikala cyoshelu kampànda cidìbo bàlama’s. Ncyà bushùwà anyi, Bakèlùbà aba?

294 Cikwàbò cintu, mònaayi ne cileeji cikwàbò ncyòci eci. Kaayinà... Tàngilàayi Bible mpindyewu! Nùнку ndi munwàmbile bwà nwènù kubuululapù, kàdi bìdi... kì mbwalu to, nudi nucìpetela mu Genèsè. Èyo, tàngilàayi. Kaayinà wàkapàtuka, Kaayinà wàkapàtukila mu Bwikadi bwà Mukalenge ku ciibi cyà lupangu ku budimi aku. Pa nàнку Bwikadi bwà Mukalenge bùvwa ne cyà kwikala ku cyoshelu aci, ne cyoshelu aci cìvwa cisanganyibwa ku ciibi aci. Butùmbi’s wè! Kaa! Èyo. Mmwaba wa cisòmbedi cyà Nzambì, ku cyoshelu Cyendè aku. Mpindyewu, Kaayinà wàkapàtuka mu Bwikadi bwà Mukalenge, muumùke mu mwaba ewu. Nudi baswè kucifùnda anyi? Genèsè 4.16, nwènù baswè kucifùnda. Mpindyewu,

mpindyewu, nudi naabi byònsò, bifùnda, kí mmwômò anyi?

²⁹⁵ Mpindyewu, ndi ne cikwàbò cintu cìndì muswè kuzòla kaaba aka bwà katanci kakesè cyanààna. Ndi ntèkemenà ànu ne nkùndè yà nànsha umwe wa kunùdì kayèèna yilungula to, anyi ní ncinyi cyònsò pèku pèènu. . . Mpindyewu, mōnaayi. . . Yilungulè mwinè, bìdì ànu bîmpè, yôyi miinè's neyibutukè. Twánjì—twánjì twèlanganààyikù meeji pa kaaba aka, eci ki—eci ki cintu cidì—cidi cyà bushùwà.

²⁹⁶ Mòsà wàkangaciibwa mu Dyulu, Mòsà, muumùshìibwe pa buloba e kwangaciibwa mu Dyulu ne kumònayè cyoshelu cyà Nzambi aci. Ncyà bushùwà anyi? Ndi nteeta bwà kujaadika kaabwalu kàanyi kaaba aka. Nudi bamanyè cìndì nteeta kwenza, kí mmwômò anyi? Eyo. Yèyè wákaya mu Bwikadi bwà Nzambi. Nènkù pààkatùlúkàye kuumuka mu Bwikadi bwà Nzambi, wákamba, Mò-. . . Nzambi kwambila Mòsà ne: “Enzà bintu byònsò pa buloba mu citembelu cyà byà mu Dyulu.” Ncyà bushùwà anyi? Eyo.

²⁹⁷ Mpindyewu, pashìishe pààkenzàye, pàkenzàye Mushèètè wà Cipungidi, wàkatèeka Bakèlùbà bàbìdì bwà kulamabò mushèètè awu. Nudi bamòne cidìci anyi? Cìvwa nntempèlù. . . cìvwa ncyoshelu, balami bàà Nkwasa wa butùmbi. Bakèlùbà bàbìdì abu, Yèyè kwamba ne: “Ùbàfwimbè bàà cyamù cyà kabanda ne ùteekè mapwàpwà àbò àlengangana *nimku* ewu,” bwalu ki cyòci aci menemene cyàkamònàye mu Dyulu.

²⁹⁸ Ki cyòci aci menemene cyàkamònà Yone mu Dyulu, Bakèlùbà bànaayi aba ku nseke yinaayi yà mushèètè wà cipungidi wà Nkwasa wa butùmbi mu Dyulu. Bàvwa mbalami bàà mushèètè wà cipungidi. Bakèlùbà, balami bàà ku nkwasa wa ngàsà.

²⁹⁹ Nwènù baswè kubala Mufùndu awu (katwèna ne dîbà dyà kukùfika to), fùndaayi Ekèsòdè 25.10 too ne ku 22.

³⁰⁰ Mpindyewu, bôbò bàdì bàlama nkwasa wa ngàsà pàdì Nzambi mu Butùmbi Bwèndè bwà Shekinàh apu. Butùmbi bwà Shekinàh bùvwa penyi? Ku nkwasa wa ngàsà awu. Ncyà bushùwà anyi? Bàdì bàlama Butùmbi bwà Shekinàh abu. Hmm! Yoyöyò! Tèèlejàayi, nwènù balundà bàanyi! Dîbà adì's bideja ne cimonyaonya cyònsò eci kacýèna mwà kulwa kuntwaku kwangata Cyòci aci nànsha. Bikèngela wikalè mulongolola kumpàlà kwà wèwè kubwela mu Bwikadi bwàCì.

³⁰¹ Tàngilàayi Aalònà, mu cifwànyikijilu. Kumpàlà. . . Mpindyewu, vùlukàayi ne, disangisha mu matùkù awu kadìvwakù nànsha mwà kuseemena pabwìpì naawù to nànsha mu mùshindù kaayi. Kàdì pàvwà Aalònà ùbwelamù. . . Mmisangu bùngì kaayi yìvwàbì bìkèngela bwà kubwelayè mùvwàWu amu? Musangu wùmwèpelè ku cidimu. Mmunyi mùvwàye ne. . . ? Bìvwa bìkèngela kwikalayè muvwàle bilàmbà kampànda, byenza kùdì byanza kampànda, mùshindù wà

pabwawu wa bilambà. Bivwa bikèngela kwikalayè muvwàle mûshindù wà dikèma. Úvwa ne kangonga kàvwà ne tumuma twà grènâdè, bwà musangu wònsò wùvwàye wènda kàdilè ne “Wa cijila, wa cijila, wa cijila, kùdì Mukalenge.” Úvwa ùseemena ku nkwasà wa ngàsà aku, ne mashi.

³⁰² Ne bivwa bikèngela kwikalayè mwela maanyi kampànda, mwela mánànanshì menza ne cilòngò cyà rose wa Shalònà. Ne Yesù nguvwa Rose wa Shalònà awu. Nènku, mònaayi, cilòngò cyà rose ncintu cilenga kumòna, cidi ne mánànanshì munda mwàci. Kàdi kumpàlà kwà mánànanshì awu kwikalawù mwà kupàtuka, bikèngela bàvingè cilòngò cyà rose aci, ne pashìishe bàcikàmè bwà mánànanshì kupàtukawù mu cilòngò cyà rose amu. Yesù, mu mwoyi Wendè, úvwa mwoyi wà mutàmbe kwikala mulenga kumòna wùkààvwakù kacya; kàdi Kàvwa mufwànyine kushàala mûshindù awu to, bwalu bivwa bikèngela kulaabaYè Èkèleeziyà Wendè (bwà kuseemena pabwìpi ne Cijila Cyèndè), pa nàнку mwoyi Wendè wàkakàmiibwa bwà kupàtukawù. Ne Nyumà Mwìmpè umwèumwè uvwa pa Yèyè awu nguudi mutèeka pa Èkèleeziyà, ne Yèyè ùdi ùMuvwija umwèumwè awu makèèlèlè, leelù, too ne kashidi, Rose wa Shalònà, mánànanshì a cilòngò aci. Muntu udi useemena mu Mwaba mutàmbe cijila ewu bikèngela àlaabiibwè ne Nyumà Mwìmpè umwèumwè awu. Nènku pàdiye wènda: “Wa cijila, wa cijila, wa cijila, kùdì. . .” (Kì nnè cifwankà cipàyika ku mishikù to.) “Wa cijila!” (Kì nnè nshingù wèndè wa nkoolò mubùnya to.) “Wa cijila, wa cijila, wa cijila,” muvwàle cijila cyà Yesù Kilistò. Hmm! Mûshindù mwine Wùdi mulenga’s wè! Kaa!

³⁰³ Mpindyewu, “nkwasà wa ngàsà.” Mpindyewu, nkwasà wa ngàsà ùdi mu mwoyi, nkwasà kùdì dikenka dyà Butumbì Bwèndè—Bwèndè bùpàtuka mu bânà Bèndè bònsò, Butumbì bwà Shekinàh mu mwoyi wà buntu. Mwoyi wà muntu’s ngwòwò ewu. Ncyà bushùwà anyi? Kì nkwasà wa ngàsà awu anyi? Mmuniyì mùdiku upicilamù bwà kubwela mu Cyôci aci kupicila ku ndongolwelu mishìilèshìilàngàne eyi? Nkupicila ku budìswilè, budìswilè. Úbwela *emu*, ne ùpicila *kwàka*, ùpàtukila mu *cinyi*? Butumbì bwà Shekinàh. Butumbì bwà Shekinàh ncinyi—ncinyi? M’Bwikadi bwà Nzambi. Nènku pàdi muntu mulùme wènda, anyi muntu mukàji, ùdi ùleeja Butumbì bwà Shekinàh. Kèna ùbwela mu binàyidi byà twartà twà mfrangà ne—ne wènzà bintu byà lukutukutu, ne ùpàtuka apa mwikàle ùvila Díyì nànsha. Cidì bantu bàmba nànsha ciikàle cinyi, yèyè mmutèèke wèndè mwoyi pa cintu ànu cimwèpelè: Nzambi. Ne piikalàbi bulelèlè ne yèyè mmubiikidìibwe kùdì Nzambi díbà adi Yesù Kilistò ùdi ùDileejila mu yèyè ne Bùtumbì bwà Shekinàh, wènzà bintu bìmwèbìmwè byàkenzàYe Yèyè kale wàwa abi; ùmwènesha Èvànjeeliyò umwèumwè awu, ùyiisha Díyì ùmwèdimwè adi, Díyì ùmwèdimwè adi ùmwèneshiibwa mu cipimu cimwècimwè cìvwàku musangu

awu aci, ànu mùvwàbí bulelèlè ku Mpenta amu mmùdici cipimiùbwè cyàkàbìdì. Kaa, ekèlekèlè!

304 “Nkwasa wa ngàsà.” Yèhezèkèlè ne Yone bwònsò bwàbò bààkamòna bintu bimwèbimwè abi. Mpindyewu, mònaayi, mpindyewu tukàadi ànu pabwípì ne kufika ku ndekeelu, ànu mu katançi kakesè cyanààna emu. Mpindyewu, ki mwaba wùndì muswè bwà nwènù kupetelakù cintu kampànda ewu. Kaa, bu nwènù mwà kuswà kacinùpicikù to! Mpindyewu, mbanganyì bàdikù bamanyè ne Bakèlùbà abu ki bàvwà *Bifukùbwà bìdì ne mwoyi* kabàyi nyama? Bòbò ki bàvwà . . . mulongo wà mutàmbe kutùmbuka.

305 Mpindyewu, Mwanjèlò ùdi mulongo mutùmbùke kutàmbe muntu anyì mmulongo mushàadile? Èyo, mukalenge. Udi mutàmbe bunène nganyì, mmwàna wa Nzambì anyì m’Mwanjèlò? Mmwàna wa Nzambì! Nganyì udi Nzambì mufwànyine kutàmbe kuumvwila, m’Mwanjèlò udi mwimàne kumpalà Kwèndè aku usèngeleela bwà cintu kampànda, anyì ng’umwe wa kunùdi nwènù abu wàkwilangana? S’ng’umwe wa kunùdi nwènù awu! Nwamònu’s, mbwalu nudi bàna bàà balùmè ne bàà bakàjì. Bòbò—bòbò mbasadidi. Nwamònu anyì? Bòbò mbasadidi, kadi nwènù nudi bàna bàà balùmè ne bàà bakàjì. Pa nàнку mònaayi ne mbukòòkeshi kaayi bunùdi naabù, twètù tudi ànu tucìina bwà kukwàta naabù mudimu.

306 Mpindyewu, ndi muswè bwà nùmonè kaaba aka, eci ncilenga be. Kaa, ekèlekèlè! Lekèlaayi mfikè ku kaaba aka ntipikèku bimwè byà ku cyòci eci bwà ngaamòna mwà kupweka ku eci. Angàtaayaaku crayons yènù mpindyewu, cìmvwà menemene nswà bwà nwènù kuzòla ncyeci. [Mwanèètù Branham ùdi ùzòla ku cibàsà—Muf.] Pàmwápa mbímpè ncìkèpèshèku ndambù. Mpindyewu, Izalèlèlè mu lwendu lwàbò, pàvwàbò bààsa bitùùdilu, mpindyewu tângilàayi eci ne ntèmà, bàvwà bààsa bitùùdilu: cìmwè, bìbìdì, bìsàtù, binaayi. (To, ngeela meeji ne ndi mutùpàkàne.) Cìmwè, bìbìdì, bìsàtù; cìmwè, bìbìdì, bìsàtù; cìmwè, bìbìdì, bìsàtù; cìmwè, bìbìdì, bìsàtù; mùshindù awu ngùvwàbò bààsa bitùùdilu binyùngùlùkile nkwasa wa ngàsà. Mpindyewu, ndi mumanyè ne, nwènù bònsò nudi bamanyè aci, nukàadi bacitàngìle ne bacìbalè mu Dipungila Dikùlukulu.

307 Mpindyewu, ku luseke lwà ku esètè, luseke lwà ku esètè, apa mene, nèncifundè bwà nwikalè batwishìibwe bwà kucyùmvwà. Esètè, luseke lwà ku esètè lùvwà misangu yònsò ànu Yudà. Eci nciibi, Y-u-d-a, Yudà. Nèнку ne Yudà. . . ùvwà mfùmù wa bisàmbà bisàtù biikàle ne dyàbò dibèndelà; bisàmbà bisàtù biikàle ne dyàbò dibèndelà, dibèndela dyà Yudà. Nudi bavùlùke. . . Mbanganyì bàkaadiku bamòne *Mikenji Dikùmì, Mikenji Dikùmì* yà Cecil DeMille? Èyo. Anyì, nudi nùcìbalè ànu apa mene mu Mifundu, mu Mifundu amu’s wè, èyo, kùvwà Yudà ku luseke lwà ku esètè. Èyo.

308 Ku luseke lwà ku wesètè, kwinshi *eku*, (Mpindyewu cífúndaayi, nùcibalè bímpè. . . cidi mu Ekèsòdè, ne bikwàbò, pààkapàtukàbo.) kùvwa Efàlàyimà, E-f-à. Ne yéyè ùvwa ne bisàmbà bisàtù biikàle ne dyàbò dibèndelà. Èyo, Efàlàyimà.

309 Mpindyewu, ne ku luseke lwà ku sud kùvwa Luubènà, L-u-u-b, ne bisàmbà bisàtù biikàle ne dyàbò dibèndelà.

310 Ne ku luseke lwà ku nord kùvwa Danà, Danà ne bisàmbà bisàtù biikàle ne dyàbò dibèndelà. Èyo.

311 Mpindyewu, mùshindù awu ki wùvwàbo bàasa bitùùdilu. Mpindyewu, vùlukàayi, tùbalàayi mpindyewu mu Mifùndu mpindyewu bwà twètù kucyùm vwa bímpè menemene. Nèmbangilè lwà paanyimà ku mvensà wa 7:

Ne nyama . . . ùvwa mufwànyikijìibwe ne nyama wa ntambwe, ne mwibìdì . . . mufwànyikijìibwe ne kànà kàà ngombe, (anyì ngombe mwànà) ne nyama mwisàtù ùvwa mufwànàngàne ne kwísù kwà muntu, ne nyama wa inaayi ùvwa . . . ne . . . nyama mwinàyi ùvwa mufwànàngàne ne mukankù munkaci mwà kubùuka.

Ne nyama yinaayi ayi yìvwa umwe ne umwe wa kùdiyi ne mapwàpwà àsambòmbò; ne yìvwa myùle tètè ne mèsù munda: ne kayèèna ne ùkisha to muunyà ne bufùku, yàmba ne: Wa cijila, wa cijila, . . . Mukalenge Nzambi wa Bukolè bwónsò, uwwakù, udikù, ne wàlwa awu.

Ne pàakafilà nyama eyi butùmbi ne luumù ne kusàkidila kùdì ewu uvwa musòmbe pa nkwasà wa butùmbi, udi ne mwoyi kashidi ne kashidi awu,

Bakùlù makùmi àbìdì ne bànaayi abu bàakapòna panshì kumpàlà kwà ewu uvwa musòmbe pa nkwasà wa butùmbi awu, ne bàakakuukwila ewu udi ne mwoyi kashidi ne kashidi, ne bàakeela bifulu byàbò byà butùmbi—bàakeela bifulu byàbò byà butùmbi panshì kumpàlà kwà nkwasà wa butùmbi, bàmba ne:

Wèwè udi mukùmbànyìne, Éyi Mukalenge, bwà kupeta butùmbi . . . luumù . . . bukolè: bwalu wèwè udi wàkafùka bintu byónsò, ne bwà disànkà dyèbè byòbì bìdì . . . byàkafùkiibwa.

312 Mpindyewu, mpindyewu, tàngilàayi. ku luseke lwà ku esètè—luseke lwà ku esètè, yéyè wàkamòna kwísù kwà mùshindù kaayi? Bu nwènù mwà kumòna, ùvwa nnyama wa ntambwe, n-t-a-m-b-w-e, ki cìvwà dibèndelà adi. Ki cìvwà—ki cìvwà dibèndelà dyà cipiminu cyà Yudà. Bwalu Yéyè ùdì . . . Yesù mmupàtùkile mu . . . Cyà bushùwà! Ne Yéyè ki Ntambwe wa cisàmbà cyà Yudà.

313 Mpindyewu, mbanganyi bàkaadiku bamòne cidiminanzaji? Bààbúngì bàà kunùdì mbamanyè cidìci: mùtootò awu. Nwamònu anyi? Ki cìvwà Bible wa kumpàla wa Nzambi. Mpindyewu,

cìdi cibangila pa cinyi, nombà wa kumpàla mu cidiminanzaji, cimfwànyì cyà kumpàla? M'virgò! Ncyà bushùwà anyi? Kàdi cyà ndekeelu ncinyi? Leo, nyama wa ntambwe. Dilwa dyà Kumpàlà ne Dilwa Diibídi dyà Kilistò, kwónsò aku. Bàdi bàngata kànsère kacyàmàkàne. . . anyi cikondo cicyàmàkàne cìdi ànu too ne kùdici mishipa micyamàkàne, cìdi cikondo cyà kànsère, ne mu cyôci aci ki mutùdi mene ne mwoyi tupicilamù emu.

³¹⁴ Nènku mònaayi mu cipaapu cyà musàkà pààkaciibakàye, mu cikondo cyà Henòkà, dibwe dyónsò divwa mwómò amu. Bàvwa mwà kupima bintu abi ànu menemene ne kwamba bwà mwità ne bikwàbò. Byónsò mbikùmbànàngàne pa kuumusha Dibwe dyà mùsongà. Bwà cinyi? Nudi numòna pa kabèjì kèenu kàà ndola umwe aku anyi? Kàpàtùlaayi nùtangilè, mùsongà mmuumushakù. Bwà cinyi? Kacya kacitukù cyanji kwashiibwa mùsongà to. Kilistò ki Dibwe dyà mùsongà dyàkabèngiibwà adi, Yèyè nguvwa Dibwe dyà mùsongà dibèngiibwe. Udi wàlukila àbìdi adi pashì aa. Tàngilàayi nùmonè mùvwà Èkèleeziyà awu kale wàwa, mu cikondo cyà ba-Luthériens, mwalàbàle menemene ku ntàku; pashìshe kulwayè wa banyààbanyà, mutàmbe kwikala ndambù wa banyààbanyà, ndambù menemene kàbìdi too ne pàdiye ùpweka kwìnshì; paanyimà pàà dyumukayè mu cikondo cyà beena Mpenta, pashìshe ùya buludì too ne pàdi dibwe dyónsò ne cyà kukùmbanangana ànu menemene bwà kutèekamù mùsongà awu, Èkèleeziyà wàtwala Yesù umwèumwè awu makèèlèlè, leelù, too ne kashidi awu. Bipwàngàne ànu ne mwàbì mwónsò!

Mpindyewu, Yèyè nguvwa Ntambwe wa cisàmbà cyà Yudà.

³¹⁵ Mpindyewu, muntu yónsò ukààdikù mubalè Bible mmumanyè civwa nombà wa Danà, anyi civwà—civwà Danà. . . Kaa, ndi nswà kwamba civwà, èyowà, Danà ùvwa cinyi? Dyèndè, yèyè ùvwa mukankù. Ncyà bushùwà. Yèyè ùvwa mukankù. Muntu kampàndà utukù ùbala Bible. Yèyè's ùvwa mukankù.

³¹⁶ Mpindyewu, Luubènà ùvwa muntu. Yèyè nguvwa wa kumpàlà, mutàmbe kwikala wa butekètè ku musùmbà mujimà awu. Yakòbò kàakambakù nànu awu mu—mu Genèsè 49 anyi? “Luubènà, wèwè ngudi wa kumpàla wa dikàndà dyànyì; kàdi ànu mùdi màyi amu, wèwè kubànda pa bulààlù bwànyì ne kukooyisha bulààlù bwànyì,” ne kulààlayè ne mukàjì wa nsàkidilù wa tatwèndè. Nwamònu's, aci's ki nsòmbelu wa masandi wa buntu. Nudi numòna anyi? Nyama kàtu ne nsòmbelu yà masandi ayi to, ntambwe, nànsha cimwè cyà ku bintu ebi kacyèna ne byà nànu to; kàdi muntu ngudi naabi, wènda masandi ne mukàjì wa mwena mutumba nèndè ne bikwàbò. Ànu mùdi. . . Cintu ànu cimwècimwè aci, byónsò mbikùmbànàngàne.

³¹⁷ Mpindyewu, eci cìdi kwìnshì eku eci, *eci*, Danà ùvwa mukankù. Kàdi, *eci*, Luubènà ùvwa kwìsù kwà muntu. Kàdi

Efàlàyimà ki ngombe awu. Mpindyewu, nuumvù cimfwànyi aci anyi? Efàlàyimà. . . Mùshindù awu ngùvwàbo bàasa bitùùdilu, mu Bible.

³¹⁸ Mpindyewu, bu nwênù mwà kumòna, Danà ùdi mfùmù wa bisàmbà bisàtù, Yudà ùdi mfùmù wa bisàmbà bisàtù, Luubènà ùdi mfùmù wa bisàmbà bisàtù, ne Efàlàyimà ùdi mfùmù wa bisàmbà bisàtù. Ìnaayi yisàtù yìdi dikùmi ne ìbìdì, bisàmbà dikùmi ne bìbìdì byà Izàlèlèlà. Nwamònu's, cyònsò cyà ku byòbì ciikàle ne dyàbò dibèndelà; ne dibèndelà dyà Yudà òvwa nntambwe; dibèndelà dyà Luubènà, muntu; dibèndelà dyà Efàlàyimà, ngombe; dibèndelà dyà—dyà—dyà Danà òvwa mmukankù.

³¹⁹ Mpindyewu, tàngilàayi paanyimà apa cìdì Yone mwambè: “Ne umwe ùvwa ne kwisù. . .” Tùbalàayaaku kaaba aka mpindyewu, tùmònè ànu ní kacyèna cintu cimwècimwè cìvwa mu Dyulu aci:

. . .nyama wa kumpàla ùvwa mufwàràngàne ne nyama wa ntambwe, (Yudà) . . .nyama mwibìdì ùvwa mufwàràngàne ne kànà kàà ngombe, (mbwena kwamba ne ngombe mwànà) . . .nyama mwisàtù ùvwa kwisù kwà muntu, ne nyama mwinàyi ùvwa . . . mukankù mwikàle wùbùùka.

³²⁰ Ànu menemene mùvwà bisàmbà byà Izàlèlèlà byàsa bitùùdilu mu nyùngulukilu amu, biikàle bàlama, bòbò mbalami bàà pa buloba bàà bukenji bwà ku mushèètè wà cipungidi. Kaa, àlèluuyàh! Kanwènàkù nucimòna anyi?

³²¹ Mòna! Luse, n-k-w-a-s-a w-a n-g-â-s-à, “nkwasà wa ngàsà.” Cintu kacìvwakù mwà kulwa mwaba nànsha wùmwe mu nyùngulukilu wawù amu kacìyi cìpìcila mu bisàmbà abi to. Cìpìcila mu cinyi? Ntambwe; cìpìcila kùdì muntu, meeji a muntu; ne cìpìcila kùdì kabalù kàà mudimu, mùdì ngombe; anyi cìpìcila kùdì mukankù, lubilu lwàwù lukolè alu. Nwamònu anyi? Dyulu, buloba, munkacì amu, ne mu nyùngulukilu mwònsò; nudi numòna's, bàvwa balami. Ne kuulu kwàwù kùvwa Dikunji dyà Kapyà. Mwanèètù, cintu nànsha cimwè kacìvwa cìlengakù nkwasà wa ngàsà awu kacìyi cìseemena. . .

³²² Ne cintu cimwèpelè cìvwa mwà kuseemenakù cìvwa nku mashi. Aalònà ùvwa ùbwelamù musangu wùmwe ku cìdimu mwikàle ne mashi. Mpindyewu nudi nucimòna anyi? Mpindyewu, tàngilàayi. Mfùmù yònsò wa bisàmbà bisàtù mwikàle ùlama nkwasà wa ngàsà, nkwasà wa ngàsà wa Dipungila Dikùlukulu. Mpindyewu, nwafùndu aci anyi, nwênù bònsò? Mpindyewu, cipyacipyà ncyòcì eci, mwanèètù. Tèèlèjàayi eci, pashìishe netùye kumpàla. Mpindyewu, vùlukàayi ne, abu bàvwa balami bàà Dipungila Dikùlukulu. Mbanganyi bàkaadìku bacibalè mu Bible, bamanyè ne ncyà bushùwà? Nwamònu's, ki balami bàà Dipungila Dikùlukulu mbòbò abu.

³²³ Mpindyewu tudi ne mwoyi mu cikwàbò cikondo. Butùmbi's wè! Kaa, mèmè ndi munangè eci cikondo! Kàdi nwènù? Mpindyewu, Nzambi ùdi ne nkwasa wa ngàsà leelù ewu udi ne cyà kulamiibwa. Nudi nwitabuuja aci anyi? Nkwasa wa ngàsà ùdi ùsanganyiibwa penyi? Mu mwoyi wà muntu. Mmwaba kaayi wàkabwelelaye mu mwoyi wà muntu? Mu ditùkù dyà Mpenta pàakabwelà Nyumà Mwímpè (udi mwikàle Nzambi awu) mu mwoyi wà buntu. Ncyà bushùwà anyi? Mpindyewu, tùfundàayi eci nùdilongòlòlaayi bwà kucizòla panwikalà baswè kucizòla. Mpenta, M-p-e-n-t, nêmfundè Mpenta. Eci nnkwasa wa ngàsà, Nyumà Mwímpè. Tèèkaayi emu . . . nênnwàmbilè mùdì bwalu, ncivwija citàmbe kwikala cikumbànangàne, tuteekàayi apa "Nkuci" udi umvwija . . . nyuunyi, nwamònu's. Èyo, bàlama nkwasa wa ngàsà, mpindyewu Nzambi ùdi ne balami bwà nkwasa wa ngàsà leelù ewu anyi? Mpindyewu udi . . . Mpindyewu, tàngilàayi mùdici cizòdiibwe bilenga byà dikèma.

³²⁴ Mwà musómbe ditùkù adi nènku mèmè kumòna cyòci eci, ki mèmè kutùpika kàdi kubanga nyeemakana mwikàle nyùnguluka nyùnguluka nyùngulukila nkwasa awu, ngamba ne: "Butùmbi's wè! Butùmbi's wè! Butùmbi's wè! Butùmbi's wè! Butùmbi's wè," nyùnguluka, nyùnguluka. Charlie, nêngénzè byà bibi kutàmba mùntù misangu mikwàbò ngenza mwitu amu. Mwanèètù wa bakàji Nellie, bu mèmè mwà kwenza nàнку, wèwè's neùngiipàtè mu nzùbù mwèbè ne lùkàsà lwònsò. Huh? Kaa, mèmè's mwà ànu mupicile mu cikondo cyà butùmbi. Mpindyewu, tàngilàayi nùmonè civwàci, cyàkenzà Mukalenge aci.

³²⁵ Mpindyewu, Mpenta, paanyimà pàà Mpenta, bàakafùnda Mukàndà wà (Cinyi?) Byenzedi byà Nyumà Mwímpè, B-y-e-n-z-e-d-i. Ncyà bushùwà anyi? Byenzedi bìdì bibanga ne cinyi, cintu cyà kumpalà bwà kubwela mu lupàndu? Byenzedi 2.38. Cyà ndekeelu ncyòci eci, mwaba awu. Ncyà bushùwà anyi? "Bàakuujiibwa bònsò tètè ne Nyumà Mwímpè ne bàakabanga kwakula mu myakulu mikwàbò. Ki Peetèlò kujuuka e kubàyiisha diyiisha. Bòbò kwamba ne: 'Citudi mwà kwenza ncinyi? Netùbwele mu cyòci aci bishi?' Yèyè ne, Byenzedi 2.38: 'Nyingàlalaayi, nùbatiijiibwè muntu ne muntu wa kunùdì, Dìna dyà Yesù Kilistò.'"

³²⁶ Mpindyewu, vùlukàayi ne, Nzambi ùdi ne balami bwà—bwà nkwasa wa ngàsà awu. Nkwasa wa ngàsà awu udibò bàlama awu ncinyi? Èyo. M-a-a-t, Maatàayi, ku esète; Luukà, Luukà; Maakò; ne Yone. Èvànjeeliyò yàbò yònsò yinaayi ayi yidi yishindika Mukàndà wà Byenzedi wùcivwà wùlwa awu, bàdi bàwùlama mwaba wònsò wùdì muswè kùwùtàngila awu.

³²⁷ Twànjàayi kwangata ànu umwèpelè, umwèpelè cyanàànà, katwèna ne dībà to. Ndi naabì makùmi àbìdì anyi bipite bifùnda kaaba aka, kàdi twàngatàayi ànu umwèpelè cyanàànà pa cyena-bwalu cyà lupàndu eci. Netùpetè dībà dyà kusambila

anyi? To, tukàadi díbà ùmwe jaajaaja, nènku ndi ngeela meeki ne katwàkwikala naadi to ambà ànu nwènù baswè bwà kusambidila babèèdi. Mpindyewu, ndi ne. . . Ndi ne díbà búngì cyanààna. Nwamònu anyi? Èyo.

328 Mpindyewu, mònaayi eci! Maatàayi, Maakò, Luukà, ne Yone, ncinyi aci? Nombà wa pa buloba, wa maaÈvànjeeliyò, inaayi. Èyo, mònaayi.

329 Mpindyewu, Maatàayi 28.19.28, mpindyewu, ki panùdi nwènù bânà bèètù bàà ba-Trinitaires nulalukila mpòpò apu, mwaba awu, 28.19. Èyo. Maatàayi, ku citùpà cyà ndekeelu cyà nshapìtà, mmwambè ne: “Ndaàyaaku, nùkalongeshè bàà matunga ònsò, nubàbàtiiza mu Dìna dyà Taatù, Mwànà, Nyumà Mwìmpè”; kàdi ki Mpenta ulwàlwa ewu, ki Peetèlò kwambayè ne “Nyingàlalaayi, nùbatiijiibwè mu Dìna dyà Yesù.”

330 Kùdi cintu cipampàlámùke mwaba awu. “Maatàayi, wèwè ki mulami wa ku esètè awu anyi?”

331 Ciibi aci cidi bìshi? Ciibi ncinyi? Yesù. Yesù mmwambè ne: “Mushikù wà mbèlu mmubùmbàkàne.” Ncyà bushùwà anyi? Cidi cìfùndiibwa. . . Cidi cìfùndiibwa bìshi ku dìleetà ku dìleetà, s-t-r-a-i-t anyi s-t-r-a-i-g-h-t? *S-t-r-a-i-t* mbwena kwamba ne “mâyi,” “mâyi àdi ciibi.” Udi ubwela bìshi? “Nyingàlalaayi, muntu ne muntu wa kunùdi ne nùbatiijiibwè mu Dìna dyà Yesù Kilistò,” ùkàngula biibi. Èyowà! Yoyòyò!

332 “Kaa, kàdi, Mwanètù Branham, wèwè’s udi ne Maatàayi 28.19 lwà kwinshì aku.” Aci ncyà bushùwà menemene. “Kàdi, Maatàayi, wèwè ki mulami wa ku cyòci aci anyi?”

“Bushùwà’s, mèmè’s ki mulami mu kaabujimà.”

333 Mpindyewu angàtaayi Maatàayi 1.18 nùmonè cidìye wàmba, nùmonè ní ùdi ùlama—ùlama cyòci eci. Mònaayi Maatàayi 1.18 ní ùdi ùlama Maatàayi 1. . . 28 ne Byenzenedi 2.38. Mònaayi ní ùdi ùbilama!

Mpindyewu dilediibwa dyà Yesù Kilistò dyàkenzeka mùshindù ewu: . . .

“Nzambi Taatù nyewù, Nzambi Mwànà, Nzambi Nyumà Mwìmpè,” mùdìbo bàteeta kwamba.

. . . dilediibwa dyà Yesù Kilistò dyàkenzeka mùshindù ewu: Pàvwà . . . mamwèndè Màriyà mubangila kùdi Yòzefù, kumpàlà kwà kabàyi banji kulwa pàmwè, wàkasanganyiiibwa mwikàle ne difù dyà kùdi Nyumà Mwìmpè.

Ngwèpi awu? Aci’s cyàkabàvwija bònsò bàbìdi Umwe’s!

Nènku ebi bìvwa . . . byònsò . . . byàkenzeka, ne . . . Nènku mònaayi, . . .

Mpindyewu Yòzefù bàyendè, bu mùvwàye muntu wa maalu malulàme, . . . kàyi muswè bwà kumunyangila

luumù kumpàlà kwà bantu to, wàkeela meeji a kumubènga mùshindù ewu.

...mònaayi, mwanjèlo wa Mukalenge, ùpweka, kulwayè kùdiye (Nudi bamanyè.) ne kwambayè ne: Yòzefù, wéwè mwànà wa Davìdì, kùcìnyì bwà kwangata Màriyà mukàjèèbè to: bwalu udi mwimicìibwe munda mwèndè awu ngwà kùdi Nyumà Mwìmpè. (Nwamònu anyi?)

Nènku yéyè neàlelè mwànà wa balùme, . . . nebàmwinjìkè dìnà ne YESÙ: . . .

Ebi bìwwa . . . byònsò . . . byàkenjìbwa, bwà kumònakù mwà kuula . . . kùdi mupròfetà, . . .

Bwalu, virgò neimitè difù. . . (Yeshàayi 9.6) . . . virgò neimitè difù, ne . . . neàlelè mwànà wa balùme, nènku nebàmwinjìkè dìnà ne . . . [Disangisha dìdi dyàmba ne: “Emanùwèlè.”—Muf.]

334 Ùdi ùcilama anyi? “Taatù, Mwànà, ne Nyumà Mwìmpè,” Taatù, Mwànà, ne Nyumà Mwìmpè, ànu cyòcì eci’s: myànzù yà Dìnà dimwèpelè adi. Pa nànkù mulamì awu mmwimàne ànu mwaba awu mene bwà kucitwa nyama ku mikòlò. Nwacyùmvù anyi? Kaa, ekèlekèlè! Mpindyewu, mbanganyì bàdi bamanyè nànkù? S’ki cyòcì eci! Yéyè mmulami.

335 Mpindyewu, twánjàayi ànu . . . Ndi ne musùmbà mujimà wà bakwàbò bwà lupàndù, kwangata bakwàbò aba. Kàdi mpindyewu twètù baswè kwenza mulongo wà babèèdi mu katanci kakesè emu, ànu bwà tusunsa tutwè ku dikùmi cyanàànà twánjì tùteetàyìbì cintu kampànda cikwàbò bwà katanci kakesè cyanàànà. Twàngatàayi ndambù wa Mifùndu mpindyewu. Ndi mufwànyine kwikala mufùnde biinè ebi penyì? Mbyòbi ebi. Èyo.

336 Mpindyewu twàngatàayi bwà kumòna ní Maatàayi ewu mpindyewu neàcilamè bwà dyondopa dyà kùdi Nzambì. Nudi ne crayons yènu ne bikwàbò mpindyewu, yinùdi nufùnda naayi cyòcì eci anyi? Èyo. Tùmonèbi Maatàayi ní ùdi ùtàpulula . . . ùcilama. Twàngatàayi Maatàayi 10.1.

337 Twàngatàayi bwà tùmonè Yone ní . . . ànu umwe anyi bàbìdì, twàngatàayi bàbìdì, anyì umwe anyì bàbìdì bàà ku cìdì aba nùnkù, Yone 14.12, ne 15.7.

338 Tùmonèbi ní bàdi bàlama dyondopa dyà kùdi Nzambì banyùngùlùkile Nkwasa wa butùmbi wa Nzambì! Maakò 16, Maakò 11.21 ne 22.

Luukà 10.1 too ne ku 12, ne Luukà 11.29 too ne ku 31. Twánjàayi kwangata ndambù wabò, tùmonèbi ní bàdi bàlama, tùmonèbi ní bàdi bàlama bukenji bwà kufika ku dyondopa dyà kùdi Nzambì byà mwòmùmwè ne mùdìbo bàlama ciibi bwà

dibàtiiza dyà mu Dîna dyà Yesù. Tudi mwà kucyàngacila mu yònsò wa kùdìbo. Ncyà bushùwà.

³³⁹ Mpindyewu twànjàayi ànu kwalukila cyànyima bwà kumòna Maatàayi 10.1. Buulùlaayi ànu cyanàana mpindyewu bwà twètù . . . ne pashiishe netùjikijè mu tusunsa tukwàbò tùtaanu, anyi dikùmi, bwà twòtù tupite búngì, bu Mukalenge mwà kwanyisha. Eyo, twàngatàayi Maatàayi 10, tùmònèbi Maatàayi ní ùdi ùlama Byenzedi byà bàpostòlò.

³⁴⁰ Nuvwa nwela meeji ne—ne Nzambi kàtu ùtèeka balami banyùngùkile Dîyi Dyèndè anyi? Tùmònàayiibi ngombe awu, nyama wa ntambwe, muntu, mukankù ní kabyèna ànu kacya byàsòmba ku biibi abi pa buloba apa mene mpindyewu mene anyi? Èvànjeeliyò nyòyi eyi, Èvànjeeliyò yìnaayi ayi. Nwamònu anyi? Nènku, nudi numòna's, luseke lwònsò lùvwàyi yìya yìvwa yìya ànu kumpàlà. Kayèna yàmba maalu àbèngangana ne a mukwàbò to, yìdi yìtwàngana nyama ku mikòlò ewu ne ewu. Nwamònu anyi? Ewu ùya ne meeji a ngwengwengwe a muntu; mukwàbò ùya ne lubilu lukolè lwà nyuunyi wa mukankù; mukwàbò mmpaasàtà . . . Ewu mmutangadiki, bwà kubùuka mùtù mutangadiki amu, nwamònu's; mukwàbò mmpaasàtà; mukwàbò mmukolè wa biyooyi; mukwàbò mmwena meeji a ngwengwengwe. Nwamònu's, mulama ku nseke yònsò, Nzambi mwikàle ùlama Èvànjeeliyò wa Nyumà Mwimpè ewu! Mwitàbùùjè, wèwè mwanèètù! Eyo.

³⁴¹ Mpindyewu twàngatàayi Maatàayi 10.1.

Nènku pàakabùkìlàyè bayìidi bèndè dikùmi ne bàbìdi kùdiye, wàkabàpeesha bukolè . . . (Hmm!)

Bàakadisanga mu cibambalu cyà kuulu,
 Bònsò munkaci mwà kusambila mu Dîna
 Dyèndè,
 Babàtìijìlwe ne Nyumà Mwimpè,
 Ne bukolè bwà mudimu kulwabù;
 Cyàkabènzèlè Ye bòbò mu ditùkù adi aci
 Yèyè neàkwenzèlè byà mwomùmwè,
 Mémè ndi nsànka be mùndi mwà kwamba ne
 ndi umwe wa kùdìbo.

³⁴² Kaa, anjì pùwishàku ànu mwànà bwà katanci kakesè cyanàana mpindyewu. Anjì tèeleja, tèelejà ne ntéma:

. . . ne wàkabàpèèsha bukolè bwà kulwishangana ne nyumà yà bukooyà, . . .

³⁴³ Bampaasàtà bààbùngì bàtu bàlekela ànu nyumà yà bukooyà yìshàala mu èkéleeziyà wabò; mvwàdilu wa bakàji, ngenzèlù wa maalu, manàyi a twartà, manàyi a mubèlà, maja, madyà à nsupù mu èkéleeziyà, byònsò . . . Kaa, luse wè!

...kulwishangana ne nyumà yà bukooyà, bwà kuyùpata, ne kwondopa mabèèdi a mìshindù yònsò ne màsaamà a mìshindù yònsò.

344 Nudi bamòne mùdi mulami awu musòmbe ku ciibi aku anyi? Mulami wa Èvànjeeliyò bwà kutwà mukàndà wà Byenzedi wàkafùndiibwà awu nyama ku mikòlò!

345 Mpindyewu, mvwa mumvwè mulongeshi munène ànu àbìdi àdi panshi aa, wàmba, kùdi . . . umwe . . . muntu munène's, muntu wa maalu malenga, mèmè mutwilàngàne nendè, mumulabùle ku cyanza, mwanèètù wa maalu malenga. Kwambayè ne: "Kàdi Byenzedi byà bàpostòlò's bìvwa ànu cibùmbà cyà kwibakilapù bwà Èkèleeziyà." Huh! Mu ngaakwilù mukwàbò, yèyè ùvwa ne cibùmbà cyà kwibakilapù aci pambèlu *apa*, nwamònu's. Kàdi pààbì, Byenzedi byà bàpostòlò bìvwa munda, ne Èvànjeeliyò eyi yìdi cibùmbà cyà kwibakilapù bwà kuCii manyika pàmwè ne kuCikùba. Mònaayi mùdi meeji a—a—a muntu mwà kwenza cintu kanà cyònsò's. Mèmè's mvwa mufwànyine kwela meeji àmwèàmwè awu bu kabùyi Bwèndè Yèyè. Nwamònu anyi?

346 Cibùmbà cyà kwibakilapù, Mpenta kàvwa cibùmbà cyà kwibakilapù cyà Èvànjeeliyò to. Èvànjeeliyò yinaayi ayi yìdi cibùmbà cyà kwibakilapù bwà kutwà Mpenta nyama ku mikòlò! Paanyimà pàà bamanè kujuula cibùmbà cyà kwibakilapù eci, Mpenta kulwayè ku diikalakù. Ncyà bushùwa anyi? Cyàkafùndàbo dyàmbedi ncyèpì, m'Mukàndà wà Byenzedi anyi—anyi mbàpostòlò? Bàpostòlò. Yesù wàkaya wènda wènda byenzedi ne ùdyanjila kwamba cìvwà mwà kulwa, ki Maatàayi, Maakò, Luukà, ne Yone, balami bànaayi abu kulwàbò ne kubangabò kufùnda byònsò bìvwàbo bamòne byènzeka abi, bàbìlondelangana ànu menemene mùvwàbì amu, mùvwàbì mwà kwenzeka, cìvwà mwà kulwa kwenzeka. Ki dyàkàmwè bòbò kwibaka cibùmbà ciCinyùngùlùkile, ne ki Cyòci cìlwalwà eci! Amen! Maatàayi, Maakò, Luukà, ne Yone, ki cibùmbà cyà kwibakilapù aci, anyi mudimu wa mulami udi ukùba ntempèlù wa musinga munène awu, Nkwasa wa butùmbi, Dibènesha dyà Mpenta.

347 Kì ndingumba dyà beena Mpenta to, mwanèètù wa balùme, mwanèètù wa bakàjì, bòbò mbaalùkile buludì pambèlù pàà cintu cyònsò nkòong, uh-hum, baalùkile bayè kule kutàmba èkèleeziyà mikwàbò kanà yònsò eyi. Bàdi kule kutamba ne mùvwà ba-Luthériens. Ba-Luthériens bààkashàalakù bìmpè ndambù kutàmba mùvwàbo bòbò, ne aci ncyà bushùwà, batàmbe kufwànanganakù ne cintu. Cyà bushùwà menemene's, Gene, bwalu, mpindyewu, ncìvwakù mumòne Yesù pambèlù pàà èkèleeziyà wa ba-Luthériens to, ùteeta bwà kubwela, kàdi ùteeta . . . bwalu ndi ngeela meeji ne bangabanga Yèyè kàvwakù mwómò to. Kàdi Yèyè—Yèyè ùvwa mu èkèleeziyà wa beena Mpenta kàdi kwipaciibwa. Aci's ncyà bushùwà.

Mpindyewu, Maataàyi 10.1.

348 Mpindyewu tuyaayaaku ku Yone 14.12 eku bwà tùmonebí ní—ní—ní Yone neàtwe bintu byà mushinga mukolè byà Mpenta ebi nyama ku mikòlò. Mu Yone, nshapità wa 14 ku mvensà wa 12, Yesù ngudi wákula ewu:

Bulelèlè, bulelèlè, ndi nnwàmbila ne: Ewu udi ungiitabuuja mémè, byenzedi bìndì ngenza yéyè neàbyènzè pèndè; ne yéyè neènzè byenzedi binène bitàmbe ebi; bwalu ndi nya ku Taatù wanyì.

349 Kaa, mwanèètù, ciibi aci, kùvwà mukankù awu musòmbe mwaba awu mene aku bwalu ki mudimu wa butangadiki ngwòwò awu, nudi bamanyè's, mwikàle ùbùuka bu mukankù. Lubilu lukolè, ùbànda too ne muulu ùkabwela mu cipaapu cyà cipròfetà muulu mwàmwa, nudi numòna's, mwikàle mwà kudyànjila kumòna bintu ne kwamba maalu àkaavwàku, àdiku, ne àlwalwà. Nwamònu anyì? Musòmbe mwaba awu mene mwikàle ùcilama, mwambè ne: "Byenzedi bìndì Mémè ngenza!" Tàngilàayi mukankù awu, nwamònu's.

350 Nyama wa ntambwe nyéyè ewu, musadidi awu. Yesù wàkabàpèèsha bukolè. Ne Yéyè ùdi ùCikùba, Ùdi ùkùba Byenzedi 2.38. Ùdi umutwà nyama ku mikòlò mwaba awu mene, nyama wa ntambwe awu.

351 Ki lubilu lukolè lwà Èvànjeeliyò lùlwalwà elu, ne mukankù ewu, wàmba ne: "Byenzedi bìndì Mémè ngenza nenubyènzè pèènù. Nenwènzè byàbùngì bipite ebi," ubùuka ùya naaCì pa buloba bujimà! Cyenzè bu nyuunyi wa nkuci mwena mulùme uvwabò bakòse mutù, ne bapòngòlòle mashi, bààmyamina pa buloba, wèla lubilà ne: "Wà cijila, wa cijila, wa cijila, kùdì Mukalenge," ùkezula mwena nsudi. Eyowà.

352 Mpindyewu, ndi ne mukwàbò mwaba awu, Yone 15.7. Tùbuululàayi buludi mu nshapità wa 15, ku mvensà wa 7:

Nwènù bashààle munda mwànyi, mpindyewu, ne méyi àanyi. . . (kadiyi díyi dyà mu sèminèrè to) . . . méyi àanyi mashààle munda mwènù, nenùlombè cinwàsàwà nwènù aci, ne nebànwènzèlèci.

353 Neyà bushùwà anyì? Dìbà adi Èvànjeeliyò awu mmulamè mwaba awu mene. Dìbènesha dyà Mpenta edi ndilamiibwe kùdì Yone ne Èvànjeeliyò wendè; mDilamiibwe kùdì Maataàyi, Èvànjeeliyò wendè.

354 Mpindyewu, tuyaayi ku Èvànjeeliyò udi ulonda, Maakò, nshapità wa 16, bwà tùmone ní Maakò ùvwa mulamè Dìbènesha dyà Mpenta edi. Maakò, nshapità wa 16. Mpindyewu, túbàngilàayi apa lwà ku . . . paanyimà. . . ùdi wákula bwà dibiiikà dyà ku lufù. Mpindyewu, tùtungunukàayi too ne kwìnshì ne patùdì tukafikà ku mvensà wa—wa 14 wa Maakò 16:

Paanyimà pàà *yéyè mumanè kumwènekela bàà dikùmi ne umwe pàrwábo basòmbe bàdya, ki kubàdyulayè bwà bupidyà bwàbò ne dipapa dyà mwoyi wàbò, bwalu bóbò kabàvwa biitàbùùje aba bàvwà bamumòne pàrvwàye mubiike ku lufù to.*

355 Kabàvwa biitàbùùje aba bàvwà bàteetà kubàmbila mukenji awu to. Nwamònu's, mùshindù awu ki wùdìbi leelù ewu. Bantu bàdì ne bujaadiki bwà Nyumà Mwimpè; bantu bàákamba ne: "Macimbu's, s'bàdì musumbà wà bansantu babùnguluki bàà mu malaba." Ki Yéyè kubàdyula bwà dipapa dyà mwoyi wàbò, nwamònu's, ne bupidyà bwàbò; bàvwà baMujingùlùle mu dibìikà Dyèndè dyà ku lufù abu.

Ne yéyè wàkabàmbila ne: Ndààyi pa buloba bujimà, nukayiishè cifùkiibwà cyònsò Èvànjeeliyò.

356 Cinyì? Bwà kuyiisha...eci...kùdi Èvànjeeliyò ànu umwèpelè; balami bànaayi. "Nüyiishè cifùkiibwà cyònsò Èvànjeeliyò ewu!" Mpindyewu, vùlukààyi ne, Yéyè ùdi wàngata bàbìdì, balami bònsò bànaayi (Maatààyi, Maakò, Luukà, ne Yone), nwamònu's: "Nüyiishè cifùkiibwà cyònsò Èvànjeeliyò!"

Ewu udi witabuuja ne ùbàtijiibwa neàsungidiibwè; ne ewu udi kàyi witabuuja neàpiishiibwè. (Nwamònu's, bikèngela ùbwelè mu dibàtiiza edi.)

Ewu ùdi witabuuja ne ùbàtijiibwa neàsungidiibwè;...ewu udi kàyi witabuuja neàpiishiibwè. (Kàà, mwanèètù, itàbùùjà, bu wèwè mwà kuswà!)

Ne... (Mutwàngaji, bwà kuswikakaja bikwàbò byà ku byambilu abi)...Ne bimanyinu ebi nebifilè aba bàdì biitabuuja;...

357 Èè, mpindyewu, twànji tùmonebi, ba-Méthodistes bàdì bàmba cinyì? "Bu wèwè mwà kwela mbilà, kwikala ne nsòmbelu mwimpè." Ba-Baptistes bàdì bàmba ne: "Ikàlà ànu ne diitabuuja ne ùbàtijiibwè." Ba-Épiscopaliens bàdì bàmba ne: "Ikàlà mwimàne bu épiscopalien, nùнку ewu, ne inyika mutù pàdì musambu wènda wimbika apu." Beena Kàtòlikè bàdì bàmba ne: "Ambà 'Mwoyi, Màriyà.'" Beena Mpenta bàdì bàmba ne: "Shààla mwena òngumba dyètù. Bàtijiibwà mu Dìnà dya 'Taatù, Mwànà, ne Nyumà Mwimpè.'" Ki bwalu mbwòbù abu's. Nwamònu anyì?

...bimanyinu ebi nebifilè aba bàdì biitabuuja; Mu dìnà dyànyì... (Hmm. Kì mbyà "Taatù, Mwànà, Nyumà Mwimpè" pa bwalu abu to)... Mu dìnà dyànyì bóbò nebùpatè baadémons; nebàakulè mu myakulu mipyamìpyà;

Nebàkwatè nyòka ne byanza;...bóbò banwè cintu kanà cyònsò cidi cishebeyanganà, kacyakubenzela

bwalu to; nebàtentekelè babèèdi byanza, ne babèèdi nebàsangalè. (Amen! Kaa, mwanètù!)

358 Mpindyewu alùkilaayi buludì ku wa 11 awu, nènku pashìishe netwikalè pabwìpi ne kujikija. Maatàayi 11, ne ndi ne 20 ne 21, Yesù ngudi wakula ewu. Byònsò ebi Yesù ngudi wakula, mpindyewu, kakwèna nànsha umwe mùdi Yesù kàyi wàkula to, mu yònsò.

Nènku pààkacyàbu, pàkaavwàbo . . . bàseemena pabwìpi ne Bèètaanìyà, nzala yàkamusùma:

Ne pààkamònàye mucì wà mfigì . . .

359 Ki pààkeelàYe mucì awu mulawu's (awu m'Maatàayi 21). Ndi ne . . . :12, bu nwènù mwà kuswà mfwilaaayikù luse. Maakò 11.21 ne 22:

Nènku Peetèlò wàkamuvùlwija e kumwambilayè ne: Mulongeshi, mòna, mucì wà mfigì wúvwà mwelè mulawu mu njila awu . . .

Kàdi Yesù wàkandamuna e kumwambila ne: Ikàlaayi ne diitabuujà kùdi Nzambì. (Nwamònu anyi?)

Bwalu bulelèlè ndi nnwambila ne: (dìbà adi, mùvwa mmunda) . . . nnwàmbila ne: Ewu yònsò wàmbila mukùnà ewu ne: Tentèmùkà, ne edùbwà mu mbù, ne kàyi wèla mpatà munda mwà mwoyi wèndè to, kàdi . . . wìtabuujà ne bintu byàmbiye abi nebyènzekè, yéyè ùdi mwà kupeta . . . neàpetè byònsò byàmbiye abi.

360 Balùmyànà, ciibi cyà ku sud's ncilama kùdi ngombe. Ciibi cyà ku nord ncilama kùdi nyama wa ntambwe, ciibi cyà ku nord . . . Ndi njinga kwamba ciibi cyà ku esètè. Ne ciibi cyà ku nord ncilama kùdi mukankù munkaci mwà kubùuka, Yone, mutangadiki. Pashìishe ngàngàbukà elu luseke, Luukà, muntu.

361 Mpindyewu, tùmònàayi bì cìdì Luukà wàmba. Angàtaayi Luukà, nshapìt- . . . wa kumpàla awu. Ngeela meeji ne tudi ne Luukà 10.1 too ne ku 12, ki—ki mudimu mubàtùma naawù ngwòwò awu. Nwènù bònsò nudi bamanyè cidìwu, kàdi . . . Luukà, nshapìtà wa 10, ku 1 too ne ku 12. Èyo, tudi bafwànyine kuya ànu kumpàlà ne kucibala cyònsò, kàdi katwàkwikala ne dìbà dyà kwenza nàнку to. “Kwàtaayi njila ndàayi . . .” Nèmbangilè ku mvensà mwi3:

Kwàtaayi njila ndàayi: mònaayi, ndi nnùtùma bu bânà bàà mìkòòkò munkaci mwà mbwà yà diitu.

Kanwàmbulu nì nkabuta kàà mfranga, nì nsàpu wa ku luseke, . . .

362 Nwamònu's: “Kanùyi mu dìnà kampàndà dyà dingumba to. Ndàayi mùndì Mémè nnùtùma amu. Nwamònu ànyi? Kanùyi ne ditwishii bwa dyà ne nenùpetè ndola binunu lukàmà bwà ditàbuluja edi to; nwènù kanùyi naayi, kanùyi to. Nudi

numòna's. Nulongololè tùmpanyè twènù atu." Yèyè ne: "Ndàayi kùndi Mémè nnùtùma aku." Nwamònu's.

Kanwàmbulu nì nkabuta kàà mfrangà, nì nsàpu wa ku luseke, nì mbisàbaatà: . . . kanwèdi muntu nànsa umwe muoyi mu njila amu nànsa.

363 "Kanwimanyi pa kaaba nwamba ne: 'Nèngǎnji kuya mmonè mùdi. . . aba nì mbalàale bishi. . . mùdi aba. . . ' Ndàayi buludi kùndi Mémè nnùtùma aku. Kanùtumu meeji kùdi muntu kampànda mukwàbò to."

Ne ku nzùbù yònsò kunwikalà mwà kubwela aku, . . . nwàmbè ne: Ditalala dùkalè ku nzùbù ewu.

. . . mwòmò mwikàle mwànà wa ditalala, ditalala dyènu nedyàlukilè. . . nedishaalè kùdiye; kabiyi nanku to, nedyàlukilè kunùdi.

Ne dībà òmwèdimwè adi nùshaalè, mu nzùbu umwèumwè awu (eyowa's wè) nùshaalè, nudyà ne nunwà bintu bìdìbo bàfila abi: (Mpindyewu, bintu byònsò byà "kubènga kudyà minyìnyi, ne bikwàbò" ebi. Èkèlekèle, Nzambì wanyi! Nwamònu anyi?) bwalu muena mudimu mmukùmbànyine difutu dyèndè. Kanùyi ku nzùbu ne ku nzùbu to.

364 Kuya ne ba-Jones leelù, ku didyà dyà mundaamuunyà, ne kuya ne—ne babàkà bakwàbò ditùkù didi dilondà, ne bakwàbò kàbìdi didi dilondà adi. "Nùshaalàayi ànu mwòmò amu!"

Apu mpàndi mbwela mu masangisha kampànda, nudi bamanyè's, mòna's ndi nshàala ànu mu nzùbu wa cilàala-beenyi, ne nshàala ànu mwòmò amu, mwòmò amu menemene ki mùndi mpeta ditalala. Nwamònu anyi? Kùyi ku nzùbu ne ku nzùbu to!

Ne mu cimenga kanà cyònsò munwikalà mwà kubwela amu, mwòmò amu bóbò banwàkidilemù, nùdyayi bintu byònsò bìdi bitèèkiibwa kumpàlà kwènù abi:

Nènkù nwòndopè babèèdi—nwòndopè babèèdi bàdimu abu, ne nubàmbilè ne: Bukalenge bwà. . . Nzambì mbulwè pawìpi neenù.

365 Kàdi mpindyewu, èè, ngǎnji mbalè mvensà udi ulonda awu:

Kàdi mu cimenga kanà cyònsò munùdi nubwela, kàdi bóbò kabàyi banwàkidile to, kwàtàayi njila nùye nùpatukè. . . mu cimenga aci mu. . . ditùkù. . . òmwèdimwè adi; . . .

Nànsa mene lupwishi lwà mu cimenga aci, lùdi lulamàte pambidi—pambidi pèètù, tudi. . . (Twǎnjibi kumòna mpindyewu.) . . . Nànsa mene. . . Ne. . . Nànsa mene lupwishi lwà mu cimenga cyènù, lùdi lulamàte pambidi pèètù, tudi tunùtuutwilalù: kàdi

ikàlaayi batwishùbwe bwà eci ne, bukalenge bwà Nzambi bwàfikì pabwìpì neenù.

Kàdi ndi ntwàmbila ne, necùikalè cyà bàtwàla mu ditùkù dyà cilumbulwidi bwà Sodomà, kutàmba bwà aci cimenga.

³⁶⁶ Kaa, mwanètù, ne ditwishibwa dibèneshùbwe adi's! Bôbò kabàyi bamòna, kabàyi bakwakidile to, ndà kumpàla, ambà ànu cyanànà ne: “Èè, panwikalà kanùyì banswè to, nèntuutulé ànu lupwishi, ne lwà ku bisàbaatà byànyì, ne nèmpatukè nye.” Mu ngaakwilù mukwàbò, ambà ne: “Ncyèna mwangàte kantu nànsha kàmwè to; mémè mudyè nì ncinyì cyònsò, nènnùfutèci, ne twètù tuya kutùyaaya.” Yèyè kwamba ne: “Bulelèlè...” Ne cyònsò cyà ku bimenga mwàkayàbo kàdi kabàyi babàkidile amu, cyònsò cyà ku byòbi abi cyàkatùkina mu màyi ne bwàci mbutuùke leelù ewu. Ne cimenga cyònsò—cimenga cyàkabàakidilà aci, ncishààle too ne leelù ewu. Ki bwalu mbwòbù abu's.

³⁶⁷ Mpindyewu, mukwàbò kàbìdì, ne pashùshe tùjikijè. Tùmonèbi, tudì ne 10. 11.29 too ne ku 31, Luukà 11.29 too ne ku 31, pashùshe netùjikijè. Kaa, ndi munangè Eci!

Nènkù pàakakùngwilà bantu . . .

³⁶⁸ Tùmonèbi, ndi mwangàte...Awu n'Luukà, Luukà 11.29 anyi? Èyowà, ngeela meeji ne ewu mmufwànyìne kwikala yèyè. Èyowà:

Nènkù pàakakùngwilà bantu musùmbà mujimà, yèyè wàkabanga kwamba ne: Elu ndukòngo lubi: lùdì lùkèba cimanyinu; kàdi kakwàkwikala . . .kwikala . . . cimanyinu nànsha cimwè . . .cyàlùpèèshàbo to, pa kuumusha cimanyinu cyà Yona mupròfètà.

Bwalu ànu mùvwà Yona cimanyinu kùdì Niinìwà amu, kì . . .mwikàle kàbìdì Mwànà wa muntu kùdì lukòngo elu.

Mukalenge-mukàjì wa ku sud neàjuukè . . .ku cilumbulwidi ne . . .lukòngo elu, ne yèyè nealùpùishè: pààbì yèyè wàkafùma ku bitùpà byà kuleekùlè byà buloba bwà kutèèleja lungènyì lwà Solòmò; kàdi, mònaayi, munène mutàmbe Solòmò ùdì apa.

Bantu bàà mu Niinìwà nebàjuukè ku lufù ku cilumbulwidi ne lukòngo elu, ne . . .nebàlùpùishè: bwalu bàakanyingalala ku diyùsha dyà Yona; kàdi, mònaayi, munène mutàmbe Yona ùdì apa.

³⁶⁹ Cìdì ngamba mpindyewu aci ncinyì? Bwà kujikija, nebikengelè ànu ndekelè bikwàbò bìye. Kàdi, bwà kujikija, ndi muswè kwamba nùnkù bwalu ngànùlamì ntàntà mule be. CìdìYe wàmba kaaba aka ncinyì? “Nekùlwe ditùkù diikalà lukòngò lwà beena lwonji ne beena masandi,” (Mpindyewu

vùlukààyi!) “Iwìkalà mwà kukèba cimanyinu. Ne elu ndukòngò lwà beena lwonji ne beena masandi.” Ki Yèyè kwamba ne: “Lukòngo alu nelùpetè cimanyinu.” Tàngilààyi nùmonè mùdìci cìkùmbanangana ne bikwàbò byònsò byà mu Bible, cimanyinu cyà Yona aci. “Yona ùvwa mu difù dyà mushipa wà bàlenà munda mwà matùkù àsàtù a muunyà ne a bufùku; ki mùdì kàbìdì Mwànà wa muntu ne cyà kwikala mu difù dyà—dyà buloba matùkù àsàtù a muunyà ne a bufùku.” Neciikalè cinyi? Cimanyinu cyà dibìikà dyà ku lufù. Nwamònu anyi? Cimanyinu cyà dibìikà dyà ku lufù necyènjiibwè mu lukòngò lwà beena lwonji ne beena masandi, ne cyàkenzeka mu Mukàndà wà Byenzedi. Yesù wàkabiika ku bafwè, wàkabwela mu Peetèlò, Yakòbò, ne Yone, ne bàpostòlò, ne bóbò bààkenza Mukàndà wà Byenzedi ewu (kabìvwa byenzedi byà bàpostòlò to), bìvwa byenzedi byà Nyumà Mwìmpè ùkwàcila mudimu *mu* bàpostòlò.

³⁷⁰ Ki mmuntu leelù ewu to; n’Nyumà Mwìmpè ùkwàcila mudimu munda mwà muntu, anyi mwà bantu, nwamònu’s, ngudi ukwata mudimu. Ki mmuntu awu to; muntu yèyè ùdì anu dibùngù cyanàànà, nwamònu’s, kàdi Nyumà Mwìmpè m’Maanyi àdì mu dibùngù adi. Nwamònu anyi?

³⁷¹ Kàdi tàngilààyi cyàkenzàbò, tàngilààyi bimanyinu byàkenzàbò byà Yesù abi. Byàkakèngela bwà bóbò kubàbàngidila bwalu... Bàvwa—bàvwa bapangi, kabàyi bamanyè mukàndà to, Peetèlò ne Yone. Kàdi byàkakèngela bwà bóbò kubàbàngidila ne, bàvwa ne Yesù! Bàvwa bènza bintu byàkenzàYe abi. Pa nànkù, nudi numòna’s, Mukàndà wònsò mu Bible, yònsò... Mikàndà yìnaayi ayi, Èvànjeeliyò yìnaayi ayi yìdì yilama Dibènesha dyà Mpenta pàmwè ne Mufundu wònsò bwà kutwà ànu menemene cyàkambàbo nyama ku mikòlò. Nènku mpindiyewu Byenzedi byà bapostòlò bìdì bishindika leelù ewu pàmwè ne Èvànjeeliyò yìnaayi ayi ne Yesù Kìlistò ùdì umwèumwè awu makèèlèlè, leelù, too ne kashidi. Nudi baMunangè anyi?

Bàvwa badisangishe mu cibambalu cyà kuulu
aci,
Bònsò munkaci mwà kusambila mu Dìna
Dyèndè,
Babàtìjìibwe ne Nyumà Mwìmpè,
Ne bukolè bwà mudimu kulwabù;
CyàkabènzelaYe bóbò ditùkù adi aci
Yèyè neàkwenzèlè byà mwomùmwè,
Mémè ndi nsànka be mùndì mwà kwamba ne
ndi umwe wabò.

³⁷² Ngǎnjì ngwímbe:

Bàvwa badisangishe mu cibambalu cyà kuulu,
Bònsò munkaci mwà kusambila mu Dìna
Dyèndè,

Babàtìjìibwe ne Nyumà Mwímpè,
 Ne bukòlè bwà mudimu kulwabù; (Ki cìdì
 cìtùkèngelà leelù ewu ncyacì.)
 Cyàkabènzèlè Ye bòbò ditùkù adi aci
 Yèyè neàkwenzèlè byà mwomùmwè,
 Mémè ndi nsànka be mûndì mwà kwamba ne
 ndi umwe wabò.

Bantu aba bàdi mwà kwikala kabàyi balongè,
 (Kabàyi . . . Ànu bu mùdì Peetèlò, Yakòbò, ne
 Yone amu.)
 Anyì kuditàmbisha bwà luumu lwà pa buloba,
 Mbapètè bònso Mpenta wabò,
 Babàtìjìibwe mu Dìna dyà Yesù;
 Ne bàlondelangana leelù, ne kule ne ku nseke,
 Bukòlè Bwèndè bùcìdì ànu bùmwèbùmwè abu,
 (Bùmwèbùmwè abu ànu mwàkadìbu amu.)
 Mémè ndi nsànka be mûndì mwà kwamba ne
 ndi umwe wabò.

Ndi umwe wabò, ndi umwe wabò,
 Mémè ndi nsànka be mûndì mwà kwamba ne
 ndi umwe wabò.

Umwe wabò, ndi umwe wabò,
 Kaa, mémè ndi nsànka be mûndì mwà kwamba
 ne ndi umwe wabò.

Kaa, lwâyì, bânà bèètù wanyì, kèbaayi
 dibènesha edi
 Dyàkezulà mwoyi wèbè ku mpèkaatù,
 Dyàbangà kudidisha tungonga twà disànka
 Ne dyàlamà musùukà wèbè wùlàkuka kapyà;
 Kaa, ki kulàkukadi kapyà mu mwoyi wányì
 eku,
 Kaa, butùmbi kùdì Dìna Dyèndè,
 Mémè ndi nsànka be mûndì mwà kwamba ne
 ndi umwe wabò.

Umwe wabò, umwe wabò,
 Mémè ndi nsànka be mûndì mwà kwamba ne
 ndi umwe wabò; (Àlèluuyàh!)

Umwe wabò, ndi umwe wabò,
 Mémè ndi nsànka be mûndì mwà kwamba ne
 ndi umwe wabò.

³⁷³ [Katùpà kàà mukàbà wà mèyì munda mutupù—Muf.]
 Cìdì cìseeswisha bantu bààbùngì be. Bàdi . . . Bantu bààbùngì
 pambèlu apa mu mùsèèsù emu bàtù bàya mu èkèleeziyà, mbàà ku
 maèkèleeziyà, bàdi bàseeswishiibwa mwàkaseeswishiibwà Evà
 ku cibangidilu amu. Kí mbamanyè cìdì bwalu to.

³⁷⁴ Kaa, lwàku wàngatè Mucì wà Mwoyi! Mpindyewu, pamutù
 pàà Bakèlùbà . . . Mpindyewu, ndi njinga kwamba cintu

kampànda. Pamutù pàà Bakèlùbà abu kulamabò Nkwasa wa butùmbi ewu, bàdi kaaba aka munkaci mwà kukèba, bàteeta bwà kutùma bantu, kubàlama ku Nkwasa wa butùmbi, bàteeta bwà kubàpìcishila ku ciibi, kubààluja cyàkàbìdì ku Muci wà Mwoyi bwà bààmòna mwà kwangata Eci. Yesù wàkamba ne: “Mémè ndi Dyàmpà dyà Mwoyi didi difùme kùdì Nzambì mu Dyulu. Ewu udi udyà Mubidi Wànyì ne ùnwa Mashi Àànyì ùdì ne Mwoyi wà Cyendèlèlè ne Nèmmubiishè ku lufù ku ditùkù dyà ndekeelu.” Ncyà bushùwà. Kaa, ndi nsànka be!

³⁷⁵ Mbanganyi bàdi bàsaamà mu cibambalu emu? Tùmonààyìbì byanza byènu, elààyì byanza muulu. Èyo. Mbanganyi bàdi bapetè. . . . Aci cidi. . . . Mvwa—mvwa muumvwè Billy bimpè anyi? Ùdi penyì? Mmwabànye twartà twà disambila anyi? Uvwà. . . ? [Katùpà kàà mukàbà wà mèyì munda mutupù—Muf.] Èyo, nganyi udi mupetè. . . [Katùpà kàà mukàbà wà mèyì munda mutupù.]

³⁷⁶ Mpindyewu, tàngilààyì mu nùnkù, nwènù bònso. Mpindyewu, bìdì ànu bu mùdìbì pàdìci cilwa mwinshì mwà Butùmbi kaaba aka, nwamònu’s. Nwamònu anyi? Nwamònu anyi? Cìdì cilwa. . . . M’Bukènkè lwà kuulu eku. Nudi nwendakeena mwab’ewu, nudi numòna’s. Mpindyewu, tàngilààyì, cidi ànu—cidi ànu ndidileeja dyà mu cimfwànyì, ànu didileeja dyà mu cimfwànyì, ki cidici, nwamònu’s. Kì m’Bukènkè abu to. Bukènkè abu’s nyewù bulembèlèlè kaaba aka mene, nwamònu’s, kaaba aka mene kùdì mukàjì ewu. Mbyenzèkè ànu ne mBùbakùlè ne mvwa ngeela meeji ne Bùvwa kumutù kwà muntu kampànda’s.


³⁷⁷ Mpindyewu, nudi numòna bùmwè kàdi mémè mmòna àbìdì. Bùmwè bwà ku wòwò mbwà mu bufùki, ne Bukwàbò n’Citàmbe-mfùkìlu. Kùdì muntu musòmbe pambèlu apa, mu mulongo ewu mutàngile ku Bukènkè bwàbwa. M’Bumulengè. Ngwa ku Seymour, mu Indiana, ne ùdì ne. . . . ùvwa mupetè dipàtakana dyà mashi mu bwongò. Bu wèwè mwà kwitabuuja, mukalenge, Nzambì nèakwondòpè dipàtakana dyà mashi mu bwongò adi. Amen! Itàbùjùjà mpindyewu!

³⁷⁸ Udi witabuuja ne mwoyi wèbè wònsò anyi? Nènku bu Mukalenge Nzambì, Mufùki wa mauulu ne buloba, mwà kwenza ne mémè ngènzèku cintu kampànda bwà kukujaadikila ne n’Nzambì, dìbà adi newitabuuje ne mwoyi wèbè wònsò anyi? Disaamà dyèbè—dyèbè ndisaamà dyà dibinduluka dikèba kùdì dì—dì—dibènga kuya ku mashi. Udi witabuuja ne Nzambì nèakwondòpè anyi? Nànsha wèwè kwèna wa mùneemu to.

³⁷⁹ [Katùpà kàà mukàbà wà mèyì munda mutupù—Muf.] . . . lutàtù lwèbè lùdì cinyi? Nènku, mu kwenza kwà nànkù ne, Yèyè mmufwànyìne kukusàngaja anyi? [Katùpà kàà mukàbà wà mèyì munda mutupù.] . . . mmufwànyìne kukusàngaja, bwalu kí ngwèwè udi muswè kusàngajibwa to, mmwanèèbè wa balùme.

Nwamònu anyi? Yèyè awu ùdi mu Virginie. Udi witabuuja ne ndi mwà kukwambila cidi cìmutàcisha, ku dikwàcisha dyà Nzambi anyi? Ùdi ne byùjà. Aci ncyà bushùwà. Ne kùdi cikwàbò cintu cidi cìmutàcisha, kì mmusùngìdìlbe to. Nènku yèyè ngùdi usambidila. Mpindyewu, Màndàmù Baker, alùkilaaku ku Somerset ne itàbùùjà ne mwoyi wèbè wònsò, Yesù Kilstò neàmwondòpè. [Katùpà kàà mukàbà wà mēyì munda mutupù.]...?...kukusàngàja, udi uMwitaba bu Mwondopi webè anyi? Bu nwènù mwà...[Katùpà kàà mukàbà wà mēyì munda mutupù.]...mwondopi. Pòlò wàkamba musangu kampànda ne...[Katùpà kàà mukàbà wà mēyì munda mutupù.]

³⁸⁰ Batèèleji aba bàdi batèèleje ne ntèmà yònsò too ne díbà ditùkaadi edi mu ditùkù, Mukalenge, mpindyewu, Mukalenge Nzambi, ndi ndòmba bwà luse ne bwìmpè Bwèbè bìikalèku pambidi pààbò.

³⁸¹ Sàtaanà, ndi nkwela kadyòmbò mu Dìnà dyà Yesù Kilstò, pàtukà mu bantu aba! Mbashàale bwà kutèeleja Èvànjeeliyò. Kwèna mwà kubàpangisha kàbìdì to. Bukolè bwà dyabùlù bùdi buswike bantu aba, bùùmukè! 

61-0108 Bwàkabuulwibwà, Nshapità Mwinâyì Citùpà III
Branham Tabernacle
Jeffersonville, Indiana États-Unis

CILUBA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiiibwa bya bipitepite, kwediibwa mu cibànza cya luntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org